

ମାର୍କ ଲିଖିତ ସୁସମାଚାର ମାର୍କ ରାଚାମାନି ନେହଁ କାରୁ ମୂଲୁ ହାଡ଼ା

ଜୀସୁ କ୍ରୀସ୍ତତି ଜୀଝୁ ଅଡ଼େ ଇ ଦାର୍ତତିତା ମାଟି ତାନି କାତା ମାର୍କ ରାଚାମାନି ନେହଁ କାରୁ; ପୁଃନି ମେରାତି ସାରିଗଟା ନେହଁ କାରୁ ପତିୟାଁ ବିତ୍ରାଟି ଇଦି ଆହିମାନେ ର ପତି । ଏ ବାରେ ନେହଁ କାରୁ ଇନେରି । ଏ ପତିୟାଁ ଜୀସୁ କ୍ରୀସ୍ତ ହାଡ଼ି ତାମୁ ମାତିମୁ, ମାର୍କ, ଲୁକ ଅଡ଼େ ଜହନ ରାଚାମାତେରି । ମାର୍କ ରାଚାମାନି ନେହଁ କାରୁ ସାରିଗଟା ନେହଁ କାରୁ ବିତ୍ରାଟି ବାରେତି କିହାଁ ସରୁ କାରୁ । ଇ ନେହଁ କାରୁ ବାରେ କିହାଁ ନକେଏ ଇତିହଁ ଜୀସୁ ଜାର୍ନାଆଡ଼ି ତାମୁ ୨୫-୨୦ ବାର୍ଯା ବିତ୍ରା ରାସ୍କି ଆହାମାନେ ଇଞ୍ଜି ବାଇବଲ ପୁଟି ବୁଦିଗାଟାରି ଏଲେଇଞ୍ଜିମାନେରି । ରମ୍ ଗାଡ଼ାତା ମାଟି କ୍ରୀସ୍ତାନା ଲକୁଣି ରାହାଁ କିହାଲିତାକି ଇ ପତି ରମ୍ ଗାଡ଼ାତା ରାଚାମାତେସି ।

ମାର୍କ ଅର ଦରୁ ଜହନ ମାର୍କ, ଏଞ୍ଜସି ପାଝୁଲ ଅଡ଼େ ବର୍ନବା ତଟେ ମାତେସି । ସାମା ଏଞ୍ଜସି ସେବା କାମାତାକି ହାଲାଆଲିଏ ଏଞ୍ଜାଣି ମନ ଉଣା ଆହାମାତେ କାମା ୧୩:୧୩ । ମାର୍କ ଅଡ଼େ ଷ୍ଟେଣ୍ଡେ ବର୍ନବା ତଲେ ସେବା କାମାତା ହାରେସି କାମା ୧୫:୩୭-୩୯ । ମାର୍କ ପିତରତି ନେହଁ କାରୁ ମାତେସି ୧ପିତ ୫:୧୩ । ମାର୍କ ଜୀସୁ କ୍ରୀସ୍ତତି ଜୀଝୁତି କାତା କି ସେବା କାମାତି ମେସା ହିଲାଆତେସି, ବୁଦିଗାଟାରି ନାମିମାନେରି ମାର୍କ ରାଚାମାନି ନେହଁ କାରୁତା ପିତରତି କାତା ହାରେକା ରାଚାମାନେସି । ମାର୍କ ସୀସୁୟାତି କାମା ଇଞ୍ଜା ଜୀସୁ ରାନ୍ଦି ଦିନାତି କାତା ଜାପ୍ନାଣି ରାଚାମାନେସି ।

ପତିତା ମାନାୟି

୧. ମାର୍କ ପତିତି ମୂଲୁ ହାଡ଼ା । ୧:୧-୧୩
୨. ଗାଲିଲିତା ଜୀସୁ କ୍ରୀସ୍ତତି ସେବା କାମା । ୧:୧୪-୮:୨୧
୩. ଜୀସୁ କ୍ରୀସ୍ତ ଜିରୁସାଲମତା ହାନାୟି । ୮:୨୨-୧୦:୫୨

୪. ଜିରୁସାଲମଟି କାତା, ଜୀସୁ କ୍ରୀସ୍ତ ହାନି କାତା ଅଡ଼େ ଖେଣ୍ଡେ ନିଜିନି କାତା ରାଚାନା ରାପ୍ନାୟି । ୧୧:୧-୧୭:୨୦

ବାପ୍ତିସ୍ମ* ହାନି ଜହନ ଖେକ୍ନାୟି
(ମାତି ୩:୧-୧୨; ଲୁକ ୩:୧-୧୮; ଜହ ୧:୧୯-୨୮)

୧ ମାହାପୁରୁ ମୀରଏସି ଜୀସୁ କ୍ରୀସ୍ତଟି ନେହୁଁ କାରୁ ଇଲେକିଁ ଆଡ଼େ, ୨ ମାହାପୁରୁ ଅଣପୁତି ବଲୁ ଖେହ୍ନି ଜିସାୟ ସାପ୍ତେରିତା ଏନିକିଁ ରାସ୍କି ଆହାମାନେ;

“ମାହାପୁରୁ ଏଲେଇଞ୍ଜି ମାନେସି, ମେହ୍ନୁ ନାନୁ ନା କାରୁ ଖେହ୍ନାଣାଇଁ ନୀ ନକିତା ପାଣ୍ଡିମାଞ୍ଜାଇଁ,

ଏଞ୍ଜାସି ନିଜେତାକି ଜିରୁ ତିୟାରା କିନେସି;

୩ ଲକୁ ହିଲ୍ୟାଆ ଚାୟୁତା ରଅଣି ହାଡ଼ା ଖେଜିମାନେ,

ପ୍ରବୁତି ଜିରୁ ତିୟାରା କିଦୁ,

ଏଞ୍ଜାସି ତାକାଲି ତାକି ଜିରୁ ତିୟି କିଦୁ ।”

୪ ଏମ୍ବାଟିଏ ବାପ୍ତିସ୍ମ† ହାନି ଜହନ ଲକୁ ହିଲ୍ୟାଆ ଚାୟୁତା ଖାହାନା ବଲୁ ଖେକ୍ନେସି, ଅଡ଼େ ବାପ୍ତିସ୍ମ‡ ହାହାନା ଏଲେଇତେସି, “ଜାହାରା ପାପୁତି ପିସପି ଆୟାଲିତାକି ମନ ଖେହ୍ନାହାନା ବାପ୍ତିସ୍ମ§ ଅଦୁ, ଆତିହୁଁ ମାହାପୁରୁ ମୀ ପାପୁ ମେଣ୍ଟୁହାନେସି ।” ୫ ଏମ୍ବାଟିଏ ଜୀହୁଦା ଦେସା ଇଞ୍ଜା ଜିରୁସାଲମ ଗାଡ଼ାତି ବାରେ ଲକୁ ତାନି ତାଣା ଖାହାଲି ମାଟ୍‌ହେରି, ଇଞ୍ଜା ତାମ୍ବୁତାମି କିତି ପାପୁତି ଖେସାନା ଏଞ୍ଜାଣି ତାଣାଟି ଜର୍ଦନ କାତାତା ବାପ୍ତିସ୍ମ* ଅଡ଼େରି ।

୬ ଜହନ ଉଚୁ ବାଣାୟାଁ ତଲେ କେପିତି ହିମ୍ବୁରିକା ତୁରହିମାତେସି, ଅଡ଼େ ଟେଡେଲିତା ର ତଲୁତି ବୁଡ଼ପା ମାଡ଼ା କିହାଁ ଦସା କଡ଼ଞ୍ଜିତେସି, ଗପ୍‌ଏରିକା ଅଡ଼େ ଜାଡ଼ାତି କ୍ରିୟାଁ ଏଞ୍ଜାଣି କାଡ଼ି ମାତେ । ୭ ଜହନ ଏଲେଇଞ୍ଜି ଖେକ୍ନାଲି ମାଟ୍‌ହେସି, “ଆମ୍ବାଆସି ନା କିହାଁ ହାଡ଼େକା ବାଡ଼ୁଲୁ ଗାଟାସି ଏଞ୍ଜାସି ନା ତାୟୁ ଖାହିମାନେସି; ନାନୁ ମେଣ୍ଟୁକୁତାନା ଏଞ୍ଜାଣି ସେପୁୟାଁତି ଡ଼ର୍କା ଜିକେଏ ହୁକ୍‌ହାଲି ପାଡ଼ାଆଅଁ । ୮ ନାନୁ

* ୧: ୧:୧ ମୁଞ୍ଜିନାୟି † ୧:୪ ୧:୪ ମୁଞ୍ଜିନାୟି ‡ ୧:୪ ୧:୪ ମୁଞ୍ଜିନାୟି § ୧:୪ ୧:୪ ମୁଞ୍ଜିନାୟି * ୧:୫ ୧:୫ ମୁଞ୍ଜିନାୟି

ମିଙ୍ଗେ ଏୟୁତଲେ ବାପ୍ତିସ୍ମା[†] ହାହିମାଞ୍ଜାଇଁ, ସାମା ଏଞ୍ଜାସି ମିଙ୍ଗେ ସୁଦୁଜୀଞ୍ଜୁ ତଲେ ବାପ୍ତିସ୍ମା[‡] ହିୟାନେସି ।”

ଜୀସୁ ବାପ୍ତିସ୍ମା[§] ଅନାୟି ଇଞ୍ଜା ତାୟିପାରି କିଞ୍ଜି ଆନାୟି
(ମାତି ୩:୧୩; ୪:୧-୧୧; ଲୁକ ୩:୨୧-୨୨; ୪:୧-୧୩)

^୯ ଏଚିବେଲୀତା ଜୀସୁ ଗାଲିଲିତି ନାଜରତତି ଖାହାନା ଜର୍ଦନ କାତାତା ଜହନ ତାଣାଟି ବାପ୍ତିସ୍ମା^{*} ଅଡେସି । ^{୧୦} ଜୀସୁ ଏୟୁଟି ନିଙ୍ଗା ଖାହିମାଟାଟି ଦେବୁଣିଏ ଲାକପୁରୁ ଦେପି ଆଡେ ଇଞ୍ଜା ସୁଦୁଜୀଞ୍ଜୁ ପାରୁଖା ପଟାଲେହେଁ ତାନି ଲାକ ରେଟା ଖାହିମାଟାଟି ମେସ୍ତେସି । ^{୧୧} *ଅଡେ ଲାକପୁରୁଟି ଇ ହାଡା ଆଡେ, “ନୀନୁ ନା ଜୀଞ୍ଜୁଟି ମୀରୁଏଣାଟି, ନୀ ତାଡେଣଏ ନା ହାରେକା ରାହୁଁ ମାନେ ।” ^{୧୨} ଏ ଦେବୁଣିଏ ସୁଦୁଜୀଞ୍ଜୁ ଏଞ୍ଜାଣାଇଁ ଲକୁ ହିଲାଆ ଟାୟୁତା ଅଡେ, ^{୧୩} ଜୀସୁ ଲକୁ ହିଲାଆ ଟାୟୁତା ରୀ କଡି ଦିନା ପାଡେକା ଡୟାନା ସୟତାନ ତାଣାଟି ତାୟିପାରି କିଞ୍ଜିଆଡେସି; ଏଞ୍ଜାସି ଜାତାଟି ଜନ୍ତୁ ତଲେ ଡୟିଡେସି, ଇଞ୍ଜା ଲାକପୁରୁଟି ଦୁଡୁୟା ଖାହାନା ଏଞ୍ଜାଣି ସେବା କିହିମାରୁ ।

ଜୀସୁ ସାରି ଜାଣା ମୀଣ୍ଟକା ଆହନାରାଇଁ ହାଟିନାୟି
(ମାତି ୪:୧୨-୨୨; ଲୁକ ୪:୧୪-୧୫; ୫:୧-୧୧)

^{୧୪} ଜହନଇଁ କାୟିଦି ଇଲୁତା ଇଟାଲିଏ ଜୀସୁ ଗାଲିଲିତା ଖାଡେସି ଇଞ୍ଜା ମାହାପୁରୁଟି ନେହଁ କାରୁ ଖେକ୍‌ହେସି । ^{୧୫} *କାଲା ଏଜିମାଞ୍ଜାନେ, ଲାକପୁରୁ ରାଜି ଏଗାଞ୍ଜାହିମାନେ, ପାପୁତି ପିସାନା ମନ ଖେଟ୍‌ଦୁ ଇଞ୍ଜା ମାହାପୁରୁଟି ନେହଁ କାରୁଟି ନାମାଦୁ ।”

^{୧୬} ଜୀସୁ ଗାଲିଲି ସାମ୍‌ଦୁରି ଗାରୁଟି ହାଜିମାଟାଟି ସିମନ ଅଡେ ତାନି ତାୟି ଆହିୟଇଁ ସାମ୍‌ଦୁରିତା ମୀଣ୍ଟକା ଜାଲା ମେଡହି ମାଟାଣି ମେସ୍ତେସି, ଇଚିହଁ ଏଞ୍ଜାରି ମୀଣ୍ଟକା ଆହନାରି ମାଟେରି । ^{୧୭} ଜୀସୁ ଏଞ୍ଜାରାଇଁ ହାଟାନା ଏଲେଇରେସି, “ନା ଜେଡ ଖାଦୁ ନାନୁ ମିଙ୍ଗେ

† ୧:୮ ୧:୮ ମୁଞ୍ଜିନାୟି ‡ ୧:୮ ୧:୮ ମୁଞ୍ଜିନାୟି § ୧:୮ ୧:୯ ମୁଞ୍ଜିନାୟି * ୧:୯ ୧:୯ ମୁଞ୍ଜିନାୟି ☆ ୧:୧୧ ୧:୧୧ ମାତି ୩:୧୭; ୧୨:୧୮; ମାର୍କ ୯:୭; ଲୁକ ୩:୨୨ ☆ ୧:୧୫ ୧:୧୫ ମାତି ୩:୨

ଲକ୍ଷ୍ମଣ ଆହୁନାଣି ଜାପ୍‌ହାଲ୍ ।” ୧୮ ଏଞ୍ଜାରି ଦେବୁଣିଏ ଜାଲ୍‌ୟା ପିସାନା ଜାସୁତି ଜେତ ହାଚେରି ।

୧୯ ଏଚେଟିଏ ଜାସୁ ହିରେ ହେକ ହାଜାଲିଏ ଜେବଦି ମୀରକା ଜାକୁବ ଇଞ୍ଜା ତାମି ତାୟି ଜହନଲ୍ ତଂଗତା ଜାଲ୍‌ ମୁଦା କିହିମାଚାଣି ମେସ୍ତେସି । ୨୦ ମେସ୍‌ପନିଏ ଜାସୁ ଏଞ୍ଜାରାଲ୍ ହାଟିତେସି, ଇଞ୍ଜା ଏଞ୍ଜାରି ତାମି ଆବା ଜେବଦିଲ୍ ହଲିୟାଙ୍ଗା ତଲେ ତଂଗତା ପିସାନା ଜାସୁ ଜେତ ହାଚେରି ।

ବୃତ୍ତ ଆଲ୍‌ଗା ମାଚାସି
(ଲୁକ ୪:୩୧-୩୭)

୨୧ ଜାସୁ ଅଡେ ତାମି ସୀସୁୟା କପରନାହୁମ ଗାଡ଼ାତା ଖାଡେରି, ଇଞ୍ଜା ଅର ନେରୁ ଜମିନି ଦିନା ମାଚାକି ଜାସୁ ଜାହୁଦି ଲକ୍ଷ୍ମଣ କୁଟମି ଇଲୁତା† ହାଜାନା ଜାପ୍‌ହାଲି ମାଟ୍‌ହେସି । ୨୨ *ଲକ୍ଷ୍ମଣ ତାନି ଜାପ୍‌ନାଣି ଖେଞ୍ଜାନା କାବା ଆହାହାଚେରି; ଇଚିହି ଏଞ୍ଜାସି ସାସ୍ତେରି ଖେହନାରି ଲେହେଁ ଜାପ୍‌ଆନା ଅଦିକାରା ବେଟାଆହାମାନି ଲେହେଁ ଜାପ୍‌ହି ମାଚେସି ।

୨୩ ଜାସୁ ଜାପ୍‌ହି ମାଚିବେଲାତା ଜାହୁଦି ଲକ୍ଷ୍ମଣ କୁଟମି ଇଲୁଟି‡ ର ବୃତ୍ତ ଆଲ୍‌ଗା ମାଚାସି କାଲ୍‌ଖି ଆହି ଏଲେଇଚେସି, ୨୪ “ଏ ନାଜରିତତି ଜାସୁ ନୀ ତଲେ ମାଙ୍ଗେ ଏନି କାମା ମାନେ, ନୀନୁ କି ମାଙ୍ଗେ ନାସା କିହାଲି ଇମ୍‌ଆଁ ଖାହାମାଞ୍ଜି ? ନୀନୁ ଆମ୍‌ଆତି ନୀନୁ ପୁଞ୍ଜାମାଲ୍; ନୀନୁ ମାହାପୁରୁ ତାଣାଟି ଖାହାମାନି ଏ ସୁଦୁ ମାଣ୍‌ସିତି ।”

୨୫ ଜାସୁ ଏଦାନି ଦାକା ହୀହାନା ଏଲେଇଚେସି, “ପାଲେଏ ଆମ୍‌ ଇଞ୍ଜା ଇଞ୍ଜାଣି ତାଣାଟି ହଚାହାଲାମୁ ।”

୨୬ ଏଚେଟିଏ ଏ ପଲ୍‌ଆ ବୃତ୍ତ ଏଞ୍ଜାଣାଲ୍ ମୁଡ଼ମୁଡ଼ା କିହାନା, କାଜା ଗିୟାତଲେ କିଚ୍‌ତିହି ଏଞ୍ଜାଣି ତାଣାଟି ହଚାହାଚେ । ୨୭ ଏମ୍‌ାଟିଏ ବାରେଜାଣା ହାରେକା କାବା ଆଡେରି, ଇଞ୍ଜା ଇଲେକ୍‌ ଜଲ୍‌କି ଆଡେରି, “ଇଦି ଏନିଲେହେଁତାୟି ? ଇଦି ଅଦିକାରା ବେଟାଆହାମାନି ଲେହେଁତି ପୁଞ୍ଜି ଜାପ୍‌ନାୟି, ଏଞ୍ଜାସି ପଲ୍‌ଆ ବୃତ୍ତୟାଲ୍ ଜିକେଏ ହୁକୁମି ହୀହିମାନେସି, ଅଡେ ଏଞ୍ଜି ଏଞ୍ଜାଣି କାତା ଆସିମାନୁ ।”

† ୧:୨୧ ୧:୨୧ ସିନଗର * ୧:୨୨ ୧:୨୨ ମାତି ୭:୨୮,୨୯ ‡ ୧:୨୩ ୧:୨୩ ସିନଗର

୨୮ ଏମ୍ବାଟିଏ ଏଞ୍ଜାସି କିତି କାମାତି କାରୁ ଏ ରେଟୁଏ ଗାଲିଲି ରାଜିତି ସାରିଖାକିତି ନାସକାଣାଁ ଝେଙ୍ଗାହାଚେ ।

**ଜୀସୁ ହାଚେକା ଲକୁଣି ନେହୁଁ କିନାୟି
(ମାତି ୮:୧୪-୧୭; ଲୁକ ୪:୩୮-୪୧)**

୨୯ ଏମ୍ବାଟିଏ ଏଞ୍ଜାରି ଜୀହୁଦି ଲକୁତି କୁଟମି ଇଲୁଟିଠି ହଚାନା ଜାକୁବ ଅଡେ ଜହନ ତଲେ ଏ ଦେବୁଣିଏ ସିମନ ଇଞ୍ଜା ଆୟିୟ ଇଜ ହାଚେରି । ୩୦ ସିମନ ପୟା ନଟେରି ତାକି ତୁରାମାଚେ, ଅଡେ ଏଞ୍ଜାରି ଏଦାଣି କାତା ରେଟୁଏ ଜୀସୁଇଁ ଝେସ୍ତେରି । ୩୧ ଏମ୍ବାଟିଏ ଏଞ୍ଜାସି ତାଗେ ହାଜାନା ତାନି କେୟୁ ଆସାନା ଏଦାନି ନିକହେସି, ଅଡେ ଏଦାନି ନଟେରି ପିସ୍ତେ, ଇଞ୍ଜା ଏଦି ଏଞ୍ଜାରି ସେବା କିତେ ।

୩୨ ମିଡ଼ଅଲ୍ୟା ବେଲ୍ୟା ଝେଡ଼ା କୁଡ଼ହାଲିଏ ଲକୁ ରଟା ଗାଟାରାଇଁ ଇଞ୍ଜା ବୁଡୁୟାଁ ଆଲ୍‌ଗା ମାଚାରାଇଁ ଜୀସୁ ତାଣା ତାଚେରି, ୩୩ ଇଞ୍ଜା ଗାଡ଼ାତାରି ବାରେ ଜୀସୁ ମାତି ଇଲୁ ଦୁଝେରିତା ରୁଣ୍ଡା ଆଡେରି । ୩୪ ଏମ୍ବାଟିଏ ଜୀସୁ ବାରେଲେହେଡ଼ି ରଟା ଗାଟାରାଇଁ ନେହୁଁ କିତେସି, ଇଞ୍ଜା ହାଚେକା ବୁଡୁଣି ପିସ୍ପି କିତେସି, ଇଞ୍ଜା ଏଞ୍ଜାସି ବୁଡୁୟାଁଣି ଜଲ୍‌ଲି ହୀଆଚେସି, ଇଚିହୁଁ ଏଞ୍ଜି ଏଞ୍ଜାଣାଇଁ ପୁଞ୍ଜିମାରୁ ।

**ଜୀସୁ ଗାଲିଲିତା ମାହାପୁରୁ କାତା ଝେକ୍‌ନାୟି
(ଲୁକ ୪:୪୨-୪୪)**

୩୫ ଝେୟାଆ ମାଚାଟିଏ ଆନ୍ଦେରି ମାଞ୍ଜା ମାଞ୍ଜାନା ଏଞ୍ଜାସି ନିଙ୍ଗା ହଚା ହାଜାନା ର ଲକୁ ହିଲ୍ୟାଆ ଟାୟୁତା ହାଜାନା ପ୍ରାତାନା କିହିମାଚେସି । ୩୬ ସିମନ ଇଞ୍ଜା ତାନି ଆଟ୍‌ହତାରି ଏଞ୍ଜାଣାଇଁ ପାରାଲି ମାଟ୍‌ହେରି, ୩୭ ଏଞ୍ଜାଣାଇଁ ବେଟାଆହାନା ଏଲେଇଚେରି, “ବାରେଜାଣା ନିଙ୍ଗେ ପାରିମାଞ୍ଜାନେରି ।”

୩୮ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ଞ୍ଜାଦୁ ମାର ଏଟ୍‌କା ଗାଡ଼ାତା, ଇଚିହୁଁ ଦାରିମାରି ନାସକାଣାଁ ହାନ; ଏମ୍ବାଆଁ ଜିକେଏ ନାନୁ ମାହାପୁରୁତି ବଲୁ ଝେକ୍‌ଇଁ, ଇଚିହୁଁ ଏଦାଆଁତାକି ନାନୁ ଝାହାମାଇଁ ।”

୩୯ ✨ ଇଞ୍ଜାଁ ଜୀସୁ ବାରେ ଗାଲିଲି ନାୟକାଣାଁ ରେଜି ରେଜିହିଁ ଏଞ୍ଜାରି ବାରେ ଜୀହୁଦି ଲକୁଡି କୁଟମି ଇଲକାଣା* ମାହାପୁରୁ ବଲୁ ଝେକହେସି ଇଞ୍ଜାଁ ବୁଡୁୟାଣି ପିସ୍ପି କିତେସି ।

କାଜା ରଗ ଗାଟାଣାଇଁ ଜୀସୁ ନେହିଁ କିନାୟି
(ମାତି ୮:୧-୪; ଲୁକ ୫:୧୨-୧୬)

୪୦ ଏମ୍ବାଟିଏ ର କାଜା ରଗ ଗାଟାସି ଜୀସୁ ତାଣା ଖାହାନା ମେଣ୍ଡାକୁତାନା ବାଡିମାଲିହିଁ ଜୀସୁଇଁ ଏଲେଇଚେସି, “ନୀନୁ ମନ କିତିହିଁ ନାଙ୍ଗେ ନେହିଁ କିହାଲି ଆଡାଦି ।”

୪୧ ଏମ୍ବାଟିଏ ଜୀସୁ ଏଞ୍ଜାଣାଇଁ କାର୍ମା ମେସେସି, ଇଞ୍ଜାଁ କେୟୁ ଦାସାନା ଏଞ୍ଜାଣାଇଁ ତୀଗାନା ଏଲେଇଚେସି, “ନୀନୁ ମନ କିହିମାଇଁ ନୀନୁ ନେହିଁ ଆମୁ ।” ୪୨ ଏ ଦେବୁଣିଏ ଏଞ୍ଜାଣି ତାଣାଟି କାଜା ରଗ ଗୁଟାଆଡେ, ଇଞ୍ଜାଁ ଏଞ୍ଜାସି ନେହିଁ ଆଡେସି । ୪୩ ଇଞ୍ଜାଁ ଏଞ୍ଜାସି ଏଞ୍ଜାଣାଇଁ ଜାଣେ ହୁକୁମି ହୀହାନା ଝେସା ପାଣ୍ଡିତେସି, ୪୪ “ଜାଗ୍ରାତା ଆମ୍ବାଆରାଇଁ ଏନାଆଁ ଝେହୁଆନି, ସାମା ହାଲାମୁ ଇଞ୍ଜାଁ ପୂଜେରା ତାଣା ହାଜାନା ନିଙ୍ଗ ତସାକତାମୁ, ଇଞ୍ଜାଁ ମସା ଆମିନି ମେରା ହୀହାମାନେସି ଏଦାଆଁ ଲକୁ ନକିତା ନେହିଁ ଆଡାକି ସାକି ହୀନିଲେହେଁ ହେରପାମୁ ।”

୪୫ ସାମା ଏଞ୍ଜାସି ପାଙ୍ଗାତା ହାଜାନା ତାନୁ ନେହିଁ ଆଡି କାତାତି ସାରିଞ୍ଜାକି ଝେକହାଲି ମାଟ୍‌ହେସି, ଇଞ୍ଜାଁ ଜୀସୁ ଆମିନି ଗାଡାତା ପୁଣ୍ଡେ ହଡାଲି ଆଡାଆଡେସି, ସାମା ପାଙ୍ଗାତା ଲକୁ ହିଲଆ ଟାମ୍ଲାଣା ଡୁୟିତେସି; ଅଡେ ସାରି ଞ୍ଜାକିଟି ଲକୁ ଜୀସୁ ତାଣା ଖାହାଲି ମାଟ୍‌ହେରି ।

୨

ଜୀସୁ ଟଟ ଖାୟିତାଣାଇଁ ନେହିଁ କିନାୟି
(ମାତି ୯:୧-୮; ଲୁକ ୫:୧୭-୨୬)

୧ ଏଚରଦିନା ଆୟାଲିଏ ଜୀସୁ କପରନାହୁମତା ଝେଣ୍ଡେ ହାଚେସି, ଇଞ୍ଜାଁ ଏଞ୍ଜାସି ଇଜ ମାନେସି ଇଞ୍ଜାଁ ସାରିଞ୍ଜାକି ଝେଙ୍ଗାହାଚେ

✨ ୧:୩୯ ୧:୩୯ ମାତି ୪:୨୩; ୯:୩୫ * ୧:୩୯ ୧:୩୯ ସିନଗଗ

। ୨ ଏମ୍ବାଆଁ ଇଚେକା ଲକ୍ଷ୍ମ ରୁଣ୍ଡା ଆଚେରି ଇଞ୍ଜା ଦୁଝେରିତା ଜିକେଏ ଚାନ୍ଦୁ ହିଲାଆତେ, ଇଞ୍ଜା ଏଝାସି ଏଝାରାଇଁ ମାହାପୁରୁ କାତା ଝେକ୍‌ହେସି । ୩ ଏମ୍ବାଟିଏ ସାରି ଜାଣା ର ଚଟ ଝାୟିତାଣାଇଁ କାଚେଲିତା ଜୀସୁ ତାଣା ଡେକା ତାଚେରି । ୪ ସାମା ହାରେକା ଲକ୍ଷ୍ମ ମାଚାକି ଏଝାଣି ତାଣା ତାଚାଲି ଆଡାଆଚେରି, ଇଞ୍ଜା ଆମିନି ଚାନ୍ଦୁତା ଜୀସୁ ମାଚେସି, ଏମ୍ବାଆଁ ଇଲୁତି ଡେପରି ରିକ୍‌ହେରି, ଇଞ୍ଜା ଏ ଚଟ ଝାୟିତାଣାଇଁ କାଚେଲି ଝେଣ୍ଡେଏ ଇଲୁ ବିତ୍ରା ରେପ୍‌ହେରି । ୫ ଜୀସୁ ଏଝାରି ନାମ୍ ମେସାନା, ଏ ଚଟ ଝାୟିତାଣାଇଁ ଏଲେଇଚେସି, “ଏ ମାର୍‌ଏଣା ନୀ ପାପୁ ବାରେ ମେଣ୍‌ଜାହାଚେ ।”

୬ ସାମା ଏମ୍ବାଆଁ ମାଟି ଏଚେକା ମେରା ଜାପ୍‌ନାରି କୁଗାନା ତାମି ମନତା ଅଣ୍‌ପିହ୍ କାତାବାର୍ତ୍ତା ଆହିମାଚେରି, ୭ “ଇଝାସି ଏନାଆଁତାକି ଏଲେଇଞ୍ଜି ମାନେସି ? ଇଝାସି ମାହାପୁରୁଇଁ ନିନ୍ଦା କିହିମାନେସି; ମାହାପୁରୁ ପିସ୍‌ପେ ଆମ୍ବାଆସି ପାପୁ ମ୍ବେକ୍‌ହାଲି ଆଡ଼ିନେସି ?”

୮ ଏଝାରି ମନତା ଇଲେକ୍ ଅଣ୍‌ପିମାନାଣି ଜୀସୁ ଦେବୁଣିଏ ଜୀଝୁତା ପୁଞ୍ଜାନା ଏଝାରାଇଁ ଏଲେଇଚେସି, “ମୀରୁ ମୀ ମନ ବିତ୍ରା ଏନାଆଁତାକି ଇଲେକ୍ ଅଣ୍‌ପିମାଞ୍ଜେରି ? ୯ ଏନାଆଁ ଇନାୟି ଉସାସା ? ଏ କାଜା ରଟ ଗାଟାଣାଇଁ ‘ନୀ ପାପୁ ମେଣ୍‌ଜାଚେ ଇନାୟି କି ନିଜାମ୍ ନୀ କାଚେଲି ଡେକାନା ତାକାମ୍ ଇନାୟି ଉସାସା ?’ ୧୦ ସାମା ଦାର୍‌ତିତା ପାପୁ ମ୍ବେକ୍‌ହାଲି ମାଣ୍‌ସି ମାର୍‌ଏଣା ଅଦିକାରା ମାନେ, ଏଦାଆଁ ନୀର୍‌ସ୍ ମୀରୁ ପୁଞ୍ଜାଲି ଆଡ଼ିଦେରି ।” ଏଦାଆଁତାକି ଏ ଚଟ ଝାୟିତାଣାଇଁ ଏଲେଇଚେସି, ୧୧ “ନାନୁ ନିଜେ ଝେସିମାଞ୍ଜାଇଁ ନିଜାମାନା ନୀ କାଚେଲି ଡେକାନା ନୀ ଇଜ ହାଲାମ୍ ।”

୧୨ ଏଚେଟିଏ ଏଝାସି ଦେବୁଣିଏ ନିଜାମାନା କାଚେଲି ଡେକାନା ବାରେଜାଣା ନକ୍‌ଟି ହଟାହାଚେସି; ଏଚେଟିଏ ବାରେଜାଣା କାବାଆହାନା ମାହାପୁରୁତି ଜହରା କିହି ଏଲେଇଚେରି, “ମାମ୍ ଇଲେତି କାବାଆନ୍ତି କାମା ଏଚେଲା ଜିକେଏ ମେସାହିଲାଆତମି ।”

ଜୀସୁ ଲେବିଇଁ (ମାଡ଼ିୟୁ) ହାଟିନାୟି
(ମାଡ଼ି ୯:୯-୧୩; ଲୁକ ୫:୨୭-୩୨)

୧୩ ଜୀସୁ ଅଡ଼େ ଖେଣ୍ଡେ ସାମ୍ବୁରି ଗାଟୁତା ହାଚେସି, ଇଞ୍ଜା ଲକ୍ଷୁ ଏଝାଣି ତାଣା ଖାହାଲିଏ, ଏଝାରାଇଁ ଜାପୁହାଲି ମାଟୁହେସି । ୧୪ ଅଡ଼େ ଜିରୁଟି ହାଜି ହାଜିହୁଁ ଜୀସୁ ଆଲେପି ମୀର୍ଏସି ଲେବିଇଁ* ସିସ୍ତୁ ରୁହନି ତାଣା କୁଗାମାନାଣି ମେସ୍ତେସି, ଇଞ୍ଜା ଏଝାଣାଇଁ ଏଲେଇଚେସି, “ନା ଜେଟ ଖାମୁ” ଏଚେଟିଏ ଲେବି ନିଜ୍ଜାମା ଏଝାଣି ଜେଟ ହାଚେସି ।

୧୫ ଅଡ଼େ ଜୀସୁ ଲେବି ଇଜ ରାନ୍ଦା ତିଞ୍ଜାଲି କୁଗାମାଟାଟି ହାଚେକା ସିସ୍ତୁ ରୁହନାରି ଇଞ୍ଜା ପାପୁ ଗାଟାରି ତାମି ସୀସୁୟାଁ ତଲେ କୁରିଚେରି; ଇଟିହୁଁ ଏଝାରି ହାଚେକା ମାଚେରି ଇଞ୍ଜା ଏଝାଣି ଜେଟ ହାଜିମାଚେରି । ୧୬ ଜୀସୁ ପାପୁ ଗାଟାରି ଇଞ୍ଜା ସିସ୍ତୁ ରୁହନାରି ତଲେ ତିଞ୍ଜି ମାନେସି, ଇଦାଆଁ ମେସାନା ପାରୁସି ଗଟିତି ମେରାପୁନାରି ତାନି ସୀସୁୟାଁଣି ଏଲେଇଚେରି, “ଏଝାସି ଏନାଆଁତାକି ପାପୁ ଗାଟାରି ଅଡ଼େ ସିସ୍ତୁ ରୁହନାରି ତଲେ ରାନ୍ଦା ତିଞ୍ଜି ମାନେସି ?”

୧୭ ଜୀସୁ ଇ କାତା ଖେଞ୍ଜାନା ଏଝାରାଇଁ ଏଲେଇଚେସି, “ନେହୁଁ ଲକ୍ଷୁତାକି ଅସଗୁରୁ ଲଡ଼ା ହିଲେଏ, ସାମା ରଗ ଗାଟାରାକି ଲଡ଼ାମାନେ; ନାନୁ ଦାମୁଁ ଲକ୍ଷୁତାକି ଖାହାହିଲଅଁ ସାମା ପାପୁ ଗାଟାରାକି ଖାହାମାଇଁ ।”

ଉପାସା କିନାଣି ଖେହନାୟି

(ମାତି ୯:୧୪-୧୭; ଲୁକ ୫:୩୩-୩୯)

୧୮ ଜହନତି ସୀସୁୟାଁ ଇଞ୍ଜା ପାରୁସିୟାଁ ଉପାସା କିହିମାଟାଟି, ଏଚେକା ଲକ୍ଷୁ ତାଣା ଖାହାନା ଏଲେଇଚେରି, “ଜହନତି ସୀସୁୟାଁ ଇଞ୍ଜା ପାରୁସିୟାଁତି ସୀସୁୟାଁ ଉପାସା କିନେରି, ସାମା ନୀ ସୀସୁୟାଁ ଏନାଆଁତାକି ଉପାସା କିଅରି ?”

୧୯ ଜୀସୁ ଏଝାରାଇଁ ଏଲେଇଚେସି, “ବୀହା ଲକ୍ଷୁତଲେ ବୀହା ହନେଏସି ମାନି ପାତେକା ବୀହା ଲକ୍ଷୁ ହାକିଟି ମାଞ୍ଜାଲି ଆଡ଼ିନେରିକି ? ବୀହା ହନେଏସି ଏଝାରିତଲେ ମାନି ପାତେକା ଏଝାରି ଉପାସା କିଅରି । ୨୦ ସାମା ଦିନା ଖାନେ ଏଚିବେଲା ଏଝାରି ତାଣାଟି ବୀହା ହନେଏଣାଇଁ ହପୁହା ଅଡ଼ିସାଚେ ଏଚିବେଲା ଏଝାରି ଉପାସା କିନେରି ।”

* ୨:୧୪ ୨:୧୪ ମାତିସୁ

୨୧ “ଆତ୍ମାଆସି ପ୍ଲୁଃଇ ହିମ୍ବରତା ପୁଃନି ପାସକି ତାଟଅସି; ତାଟିସାରେ ପ୍ଲୁଃଇ ହିମ୍ବରତି ପୁଃନି ପାସକି ମୁଦା ଆହ୍ନାଁ ଗାତି ଗେଞ୍ଜକିନେ । ୨୨ ଆତ୍ମାଆସି ପୁଃନି ଅଜ୍ଞୁରି ରାସା ପ୍ଲୁଃଇ ଡକାତା† ଇଟଅସି; ଇଟିସାରେ ଡକା ଡାୟାହାନେ, ଇଞ୍ଜା ଅଜ୍ଞୁରି ରାସା ଅଡେ ଡକା ରିଶ୍ଟିଞ୍ଜା ନସ୍ତୁ ଆନୁ, ଏଦାଆଁତାକି ପୁଃନି ଅଜ୍ଞୁରି ରାସା ପୁଃନି ଡକାତା ଇଟିନାୟି ମାନେ ।”

ଜମିନି ଦିନାତି କାତା ୱେହ୍ନାୟି
(ମାତି ୧୨:୧-୮; ଲୁକ ୬:୧-୫)

୨୩ ର ପାଲି ଜୀସୁ ଜମିନି ଦିନା ତାନି ସୀସୁୟାଁ ତଲେ ଗହ୍ନୁ ରୁଡିୟାଟି ହାଜିମାରେସି, ତାନି ସୀସୁୟାଁ ହାଜି ହାଜିହ୍ନୁ ଗହ୍ନୁୟାଁ ଜେକା ଡାପହାଲି ମାଟହେରି । ୨୪ ଏମ୍ବାଟିଏ ପାରୁସିୟାଁ ଜୀସୁଇଁ ଏଲେଇରେରି, “ମେହ୍ନୁ ଜମିନି ଦିନାତା ଏନାଆଁ କିନାୟି ମେରା ହିଲେଏ, ନୀ ସୀସୁୟାଁ ଏନାଆଁତାକି କିହିମାନେରି ?”

୨୫ ଜୀସୁ ଏଞ୍ଜାରାଇଁ ଏଲେଇରେସି, “ଦାଝୁଦ ଅଡେ ତାନି ତଃସିଜ୍ଞା ହାକି ଆହାମାଗାଟି ଏଞ୍ଜାରି ଏନାଆଁ କିହାମାରେରି, ଏଦାଆଁ ମୀରୁ ଏରେଲା ପଡ଼ଞ୍ଜି ଆହାହିଲଅଡେରି, ୨୬ ଅବିୟତର କାଜା ପୂଜେରା ମାଟିବେଲାତା ଏଞ୍ଜାସି ଏନିକ୍ନି ମାହାପୁରୁ ଇଲୁତା ହଡାନା ଆମିନି ମାହାପୁରୁକି ହେରପିତି ରୁଟି କାଜା ପୂଜେରାଜ୍ଞା ପିସ୍ପେ ଆତ୍ମାଆରି ତିନାଆଗାଟି ମେରା ମାଟେ, ସାମା ଏଦାଆଁ ଦାଝୁଦ ତିଞ୍ଜା ମାଟେସି ଇଞ୍ଜା ତାନି ଆଟ୍‌ହି ତାରାକି ଜିକେଏ ତିଞ୍ଜାଲି ହୀହାମାରେସି ।”

୨୭ ତାୟୁ ଜୀସୁ ଏଞ୍ଜାରାଇଁ ଏଲେଇରେସି, “ଜମିନି ଦିନା ମାଣ୍ଡିତାକି ଆହାମାନେ; ସାମା ମାଣ୍ଡି ଜମିନି ଦିନାତାକି ଆହାହିଲଅସି ।”
୨୮ ଏଦାଆଁତାକି ମାଣ୍ଡି ମୀରୁଏସି ଜମିନି ଦିନାତି ପ୍ରଭୁ ଆଡେସି ।

୩

ଞ୍ଜାୟିତି କେୟୁଗାଟାସି ନେହ୍ନୁ ଆନାୟି
(ମାତି ୧୨:୯-୧୪; ଲୁକ ୬:୬-୧୧)

† ୨:୨୨ ୨:୨୨ ତଲୁ ତଲେ କେପିତି ଅଜ୍ଞୁରି ରାସା ଇଟିନି ବାସ୍ତା ରୁପୁ

୧ ଜୀସୁ ଅଡ଼େ ଖେଣ୍ଡେ ଜୀହୁଦି ଲକ୍ଷ୍ମି କୁଟମି ଇଲୁତା* ହାଚେସି, ଏମ୍ବାଆଁ ରଅସି ମାଚେସି, ଏଝାଣି ର କେୟ୍ ଖାୟାହାଜାମାଚେ । ୨ ଜୀସୁ ଏଝାଣାଇଁ ଜମିନି ଦିନାତା ନେହଁ କିନେସିକି ଆଏ, ଏଝାଣି କପାଟି ଦହ ଦସାଲିତାକି ଗୁରି କିହାନା ସିନିକିହିମାଚେରି । ୩ ଏମ୍ବାଟିଏ ଜୀସୁ ଆମିନି ଲକ୍ଷ୍ମି କେୟ୍ ଖାୟାହାଜାମାଚେ, ଏଝାଣାଇଁ ଜୀସୁ ଏଲେଇଚେସି, “ଝାମ୍ବୁ ମାଦି ନିମୁ ।” ୪ ଇଞ୍ଜା ଜୀସୁ ଏଝାରାଇଁ ଏଲେଇଚେସି, “ଜମିନି ଦିନାତା ଏନାଆଁ କିନାୟି ମେରା ମାନେ ? ନେହଁ କିନାୟି କି ଲାଗେଏ କିନାୟି ? ଜୀହୁତି ଗେଲ୍ପିନାୟି କି ନାସା କିନାୟି ?” ସାମା ଏଝାରି ଖେଣ୍ଡେ ହାଡା ଆୟାଲି ଆଡାଆଚେରି ।

୫ ଏମ୍ବାଟିଏ ଜୀସୁ ଏଝାରି ଆଟ୍ଝା ହିୟାଁତି ମେସାନା ଦୁକୁ ଆଡେସି, ଇଞ୍ଜା କପାଟି ସାରିଝାକି ଏଝାରାଇଁ ସିନିକିହାନା ଏଲେଇଚେସି, “କେୟ୍ ଲାକ ଦାହ୍ମୁ” ଏଝାସି ତାନି କେୟ୍ ଦାସ୍ପନିଏ ଏଦି ନେହଁ ଆହାହାଚେ । ୬ ଏଚେଟିଏ ପାରୁସିୟାଁ ହଚା ହାଜାନା ଜୀସୁଇଁ ପାୟାଲି ତାକି ହେରଦ ଗଟିତି ଲକ୍ଷ୍ମିତଲେ କାଲ୍‌ହାନା କାତା ଆଡେରି ।

**ସାମ୍ବୁରି ଗାଟୁତା ମାନ୍ଦା ଲକ୍ଷ୍ମି
(ମାତି ୪:୨୫; ମାର୍କ ୪:୧; ଲୁକ ୫:୧-୩)**

୭ ଜୀସୁ ଅଡ଼େ ତାନି ସୀସୁୟାଁ ଗାଲିଲି ସାମ୍ବୁରି ଗାଟୁତା ହାଚେରି, ଇଞ୍ଜା ହାରେକା ଲକ୍ଷ୍ମି ଏଝାଣି ଜେଟ ହାଚେରି; ଏଝାରି ଜୀହୁଦା, ୮ ଗାଲିଲି, ଜିରୁସାଲମ, ଇଦମ, ଜର୍ଦନ ଅରଝାକି, ସର ଅଡ଼େ ସିଦନ ଗାଡା ଝାକିତି ଲକ୍ଷ୍ମି ତାନି ବାରେ କିତି କାମାତି କାତା ଖେଞ୍ଜାନା ତାନି ତାଣା ଝାଟେରି । ୯ ଏମ୍ବାଆଁ ଇଚେକା ମାନ୍ଦା ଲକ୍ଷ୍ମି ଆଡେରି ଏ ମାନ୍ଦା ଏନିକଁ ଏଝାଣିଲାକ ଝିହ୍‌ଅରି, ଏଦାଆଁତାକି ଏଝାସି ତାନି ସୀସୁୟାଁଣି ତାଞେତାକି ର ଡ଼ଣା ଡ଼ଗ ପାରା ଇଟାଲି ଖେସ୍‌ସି; ୧୦ ଏଝାସି ହାଚେକା ଲକ୍ଷ୍ମି ନେହଁ କିହାମାଚାକି ରଚା ଗାଟାରି ବାରେ ଏଝାଣାଇଁ ତୀଗାଲି ଏଝାଣି ମୁହେଁ ମୁହେଁ ଆହିମାଚେରି । ୧୧ ଇଞ୍ଜା ପଲ୍‌ଆ ବୃତୁୟାଁ ଆସାମାନାରି ଏଝାଣାଇଁ ମେସ୍‌ପନିଏ, ଏଝାଣି ନକିତା ରିହାନା କାଲ୍‌ଝି ଆହଁ ଏଲେଇଞ୍ଜି ମାଟୁ, “ନୀନୁଏ ମାହାପୁରୁ ମୀରଏଶାତି ।”

* **୩:୧** ୩:୧ ସିନଗର ☆ **୩:୯** ୩:୯ ମାର୍କ ୪:୧; ଲୁକ ୫:୧-୩

୧୨ ଏଞ୍ଜେଲି ଆମ୍ବାଆସି ଇ କାତା ଆମ୍ବାଆରାଇଁ ଝେହୁଆଦୁ ଇଞ୍ଜିଁ ଜୀସୁ ପଲୁଆ ବୁଡୁୟାଁଇଁ ଦାକା ହୀହାନା ହୁକୁମି ହୀତେସି ।

ଜୀସୁ ବାରଜାଣା ସୀସୁୟାଁଣି ଆଡ଼ିନାୟି
(ମାତି ୧୦:୧-୪; ଲୁକ ୬:୧୨-୧୬)

୧୩ ଜୀସୁ ହରୁ ଲାକ ହାଜାନା ଆମିନି ଗାଟାରାଇଁ ମନ କିତେସି ଏଞ୍ଜାରାଇଁ ତାଗେ ହାଡ଼ିତେସି, ଇଞ୍ଜିଁ ଏଞ୍ଜାରି ତାଗେ ଝାଡ଼େରି । ୧୪ ଇଞ୍ଜିଁ ଏଞ୍ଜାସି ବାରଜାଣାତି ଆଚାନା ପାଶୁଡ଼ି ଆଡ଼ାରି ଇଞ୍ଜାନା, ଏଞ୍ଜାରାଇଁ ଏଲେଇତେସି, “ନା ତଲେ ଡ଼ୟାଲି ନାନୁ ମିଙ୍ଗେ ଆଚାମାଞ୍ଜାଇଁ, ଇଞ୍ଜିଁ ଝେକହାଲି ପାଶୁଇଁ । ୧୫ ଇଞ୍ଜିଁ ମୀରୁ ବୁଡୁୟାଁ ପେରହାଲି ଜିକେଏ ଅଦିକାରା ବେଟାଆଡ଼େରି ।”

୧୬ ଜୀସୁ ଇ ବାରଜାଣାତି ଆଡ଼ିତେସି, ଏଞ୍ଜାରି ଆଡ଼େରି ସିମନ ଆମ୍ବାଆରାଇଁ ଜୀସୁ ପିତର ଇଞ୍ଜିଁ ଇଟିତେସି; ୧୭ ଜେବଦି ରୀ ମୀରକା ଜାକୁବ ଅଡ଼େ ତାନି ତାୟି ଜହନ ଆମ୍ବାଆରାଇଁ ବିନେରିଗସ୍ ଇତିହୁଁ ଗୁଣ୍ଡିମାନି ହାଗୁଡ଼ି ମୀରକା ଇଞ୍ଜିହୁଁ ଦରୁ ଇଟିତେସି; ୧୮ ଆନ୍ଦିୟ, ପିଲିପ, ବାର୍ତଲମି, ମାତିୟୁ, ତମା, ଆଲେପି ମୀରସସି ଜାକୁବ, ତଦିୟ, ଦେସାତି ଜୀସୁ ନନି ସିମନ, ୧୯ ଅଡ଼େ ଇସ୍ପାରିୟତ ଜୀହୁଦା, ଆମ୍ବାଆସି ଜୀସୁଇଁ ସାଡୁୟାଁ କେୟୁତା ହେରପିତେସି ।

ଜୀସୁ ଅଡ଼େ ବାଲ୍‌ଜିବୁଲ୍
(ମାତି ୧୨:୨୨-୩୨; ଲୁକ ୧୧:୧୪-୨୩; ୧୨:୧୦)

୨୦ ତାୟୁ ଜୀସୁ ଇଜ ଝାଡ଼େସି; ଅଡ଼େ ଝେଣ୍ଡେ ଇତେକା ଲକୁ ରୁଣ୍ଡା ଆଡ଼େରି ଜୀସୁ ଇଞ୍ଜିଁ ତାନି ସୀସୁୟାଁକି ତିଞ୍ଜାଲି ଜିକେଏ ଆଆଡେ । ୨୧ “ଜୀସୁ ବାୟା ଆଡ଼େସି” ଇଞ୍ଜିଁ ଲକୁ ଏଲେଇନାଣି ଝେଞ୍ଜାନା ତାନି କୁଟମି ଜୀସୁଇଁ ଅହାଲି ଝାଡ଼େରି । ୨୨ ଅଡ଼େ ଜିରୁସାଲମତି ଝାହାମାନି ମେରାପୁନାରି ଏଲେଇତେରି, “ଇଝାଣାଇଁ ବାଲ୍‌ଜିବୁଲ୍ ବୁଡୁ ଆଲ୍‌ଗାମାନେ, ଲାକା ଇଝାସି ବୁଡୁୟାଁଣି ପିସପି କିହିମାତେସି ।”

୨୩ ଏମ୍ବାଟିଏ ଜୀସୁ ଏଞ୍ଜାରାଇଁ ତାଗେ ହାଚାନା ପୁଣ୍ଡିକିନି କାତାତଲେ ଝେସ୍ତେସି, “ସୟତାନ ଏନିକିଁ ସୟତାନଇଁ ପେରହାଲି ଆଡ଼ିନେ ? ୨୪ ର ରାଜି ବାଗା ଆହାନା ତାନି କପାଟି ନିଙ୍ଗିନେ, ଇତିହୁଁ ଏ ରାଜି ଅଡ଼େ ତୀରିତଲେ ଡ଼ୟାଲି ଆଡ଼େଏ ।

୨୫ ଇଞ୍ଜା ର ଇଲୁ କୁଟମିତାରି ବାଗା ଆହାନା ତାମ୍ବୁତାମି କପାଟି ନିକ୍ଷିନେରି ଇତିହିଁ ଏ ଇଲୁତାରି ତୀରିତଲେ ଡୟାଲି ଆଡ଼ଅରି ।
 ୨୬ ଏଲେକିହିଁ ଏ ସୟତାନ ବାଗା ଆହାନା ତାନି କପାଟି ନିକ୍ଷାମାନେ, ଆତିହିଁ ଏଦି ଅଡ଼େ ତୀରିତଲେ ଡୟାଲି ଆଡ଼େଏ, ସାମା ଏଦାନି ବାରେ ନାସା ଆହିମାନେ ।”

୨୭ “ସାମା ଆମ୍ବାଆସି ନକେଏ ବାଡ଼ୟୁ ଗାଟାଣାଇଁ ଦହଆତିହିଁ ତାନି ଇଜ ହଡ଼ାନା ତାନି ଇଜତି ଆସ୍ତି ସରୁ କିହାଲି ଆଡ଼ଅସି; ଏଞ୍ଜାଣାଇଁ ତଲିଏ ଦସିହିଁ ଦେ ଏଞ୍ଜାସି ଏଞ୍ଜାଣି ଇଜତାଣି ସରୁ କିନେସି ।”

୨୮ “ନାନୁ ମିଜ ସାତା ଝେସିମାଞ୍ଜାଇଁ, ଲକୁତି ବାରେ ପାପୁ ଇଞ୍ଜା ଏଞ୍ଜାରି ଏଚେକା ନିନ୍ଦା କାତାତଲେ ମାହାପୁରୁ ନିନ୍ଦା କିନେରି ଏ ବାରେ ପାପୁ ମେଣକ୍ଷିନେ । ୨୯ *ସାମା ଆମ୍ବାଆସି ସୁତୁଜୀଞ୍ଜୁ କପାଟି ନିନ୍ଦା କାତା ଜଲିନେସି, ଏଞ୍ଜାଣି ଆମିନି କାଲାତା ଜିକେଏ ଦହ ମେଣକ୍ଷେଏ, ସାମା ଏଞ୍ଜାସି କାଲାକାଲାତି ପାପୁତି ଦହଗାଟାସି ଆନେସି ।” ୩୦ ଜୀସୁଇଁ ବୃତୁ ଆଲ୍‌ଗାମାନେ ଇଞ୍ଜା ଏଚେକା ଲକୁ ଏଲେଇଞ୍ଜାଲିଏ ଜୀସୁ ଇ କାତା ଝେସେସି ।

ଜୀସୁତି ଇୟା ଅଡ଼େ ତାୟିୟାଁ
 (ମାତି ୧୨:୪୭-୫୦; ଲୁକ ୮:୧୯-୨୧)

୩୧ ଏଚିବେଲା ଜୀସୁତି ଇୟା ଅଡ଼େ ତାୟିୟାଁ ଝାହାନା ଇଲୁ ପାକ୍ଷାତା ନିଚାନା ଜୀସୁଇଁ ହାଟି କିତେରି । ୩୨ ଏମ୍ବାଟିଏ ସାରିଞ୍ଜାକି କୁଗାମାଟି ଲକୁ ଏଲେଇଚେରି, “ମେହ୍‌ମୁ ମୀ ଇୟା, ତାୟିୟାଁ ଅଡ଼େ ତାଜିସ୍ତା ପାକ୍ଷାତା ନିଚାନା ନିକ୍ଷେ ପାରିମାଞ୍ଜାନେରି ।”

୩୩ ଜୀସୁ ଏଞ୍ଜାରାଇଁ ଏଲେଇଚେସି, “ନା ଇୟା ଇଞ୍ଜା ନା ତାୟି ତାଜିସ୍ତା ଆମ୍ବାଆୟି ?” ୩୪ ଇଞ୍ଜା ଏଞ୍ଜାସି ତାନି ସାରିଞ୍ଜାକି କୁଗାମାନି ଲକୁଣି ସିନିକିହାନା ଏଲେଇଚେସି, “ମେହ୍‌ତୁ ନା ଇୟା ଅଡ଼େ ନା ତାୟି ତାଜିସ୍ତା । ୩୫ ଆମ୍ବାଆସି ମାହାପୁରୁତି କାତା ଆହ୍‌ନେସି ଏଞ୍ଜାସିଦେଁ ନା ତାୟି, ତାଜି ଅଡ଼େ ନା ଇୟା ।”

* ୩:୨୯ ୩:୨୯ ଲୁକ ୧୨:୧୦

୪

ବିଚା ମାଟିନାଣି ପୁଣ୍ଠିକିନି କାତା
(ମାତି ୧୩:୧-୯; ଲୁକ ୮:୪-୮)

୧ ✧ ଜୀସୁ ଗାଲିଲି ସାମୁଦ୍ରି ଗାଟୁତା ଅଡ଼େ ଝେଣ୍ଡେ ଜାପୁହାଲି ମାଟୁହେସି, ଅଡ଼େ ହାରେକା ଲକୁ ଏଞ୍ଜାଣି ତାଣା ରୁଣ୍ଡା ଆଡ଼େରି ଇଞ୍ଜା ଜୀସୁ ସାମୁଦ୍ରିତା ମାନି ର. ଡ଼ଂଗତା ହାଜାନା କୁଗିତେସି ଇଞ୍ଜା ଲକୁ ସାମୁଦ୍ରି ଗାଟୁତା ନିଚାମାରେରି । ୨ ଏମ୍ବାଟିଏ ଜୀସୁ ଏଞ୍ଜାରାଇଁ ହାରେକା ପୁଣ୍ଠିକିନି କାତା ଜାପୁହିହିଁ ଏଲେଇଚେସି ।

୩ “ଝେଞ୍ଜୁ, ମେହ୍ଦୁ ର. ବିଚା ମାଟିନାସି ବିଚା ମାଟାଲି ହଡ଼େସି । ୪ ଇଞ୍ଜା ଏଞ୍ଜାସି ମାଟିମାଟାଟି କଚେକା ବିଚା ଜିରୁତା ରୀତେ, ଇଞ୍ଜା ପଚାୟାଁ ଖାହାନା ଏ ପାଡ଼େୟି ପେରହା ତିରୁ । ୫ ଅଡ଼େ କଚେକା ବିଚା ଇଚାୟି ଇରଥା ମାନି ଖାଲୁକା ଲାକ ରୀତେ, ଇଞ୍ଜା ଉଣା ଇରଥା ମାଟାକି ଗାଡ଼େକେଏ ନେୟିଁ ତେ, ୬ ସାମା ଝେଡ଼ା ଆଡ଼ାଲିଏ ନେୟାଁ ମାଟାୟି ଝେହା ହାଚେ ଇଞ୍ଜା ହୀରୁ ଜାଆତାକି ଖାୟାନା ହାହାହାଚେ । ୭ ଅଡ଼େ କଚେକା ବିଚା ହାପୁକା ବୁଟାତା ରୀତେ, ଇଞ୍ଜା ହାପୁକା ବୁଟା ପାତାଆହାନା ଆର୍ନା ତାକିତି ପୁକ୍‌ହାତୁସ୍ତେ ଇଞ୍ଜା ପାଡ଼େୟି ଆୟାଆତେ । ୮ ଅଡ଼େ କଚେକା ବିଚା ନେହିଁ ବୁମିତା ରୀତେ, ଏଦି ନେୟାହାଁ ପାତାଆହାନା, କଡ଼େଦସ, ତାନିକଡ଼ି, ପାସାକଡ଼ି ପାଡ଼େୟି କାମ୍ବିତେ ।”

୯ ଅଡ଼େ ଏଞ୍ଜାସି ଏଲେଇଚେସି, “ଝେଞ୍ଜାଲି ଆମ୍ବାଆରାକି କୀର୍କା ମାନୁ ଏଞ୍ଜାସି ଝେଣ୍ଡାସି ।”

ପୁଣ୍ଠିକିନି କାତାତି ଝେହ୍ନାୟି
(ମାତି ୧୩:୧୦-୧୭; ଲୁକ ୮:୯-୧୦)

୧୦ ଜୀସୁ ରଅସିଏ ମାଟାଟି ତାନି ତଲେତି ଏଚରଜାଣା ଇଞ୍ଜା ବାରଜାଣା ସୀସୁୟାଁ ତଲେ ଏ ପୁଣ୍ଠିକିନି କାତା ଏନାୟି ଇଞ୍ଜାଁ ଝେଚେରି । ୧୧ ଏମ୍ବାଟିଏ ଏଞ୍ଜାସି ଏଞ୍ଜାରାଇଁ ଏଲେଇଚେସି, ମାହାପୁରୁ ରାକିତି ଡ଼ଗୁମାନାଣି ପୁଞ୍ଜାଲି ମିଜେ ବାଡ଼ୟୁ ହୀପକି ଆହାମାନେ,

ସାମା ପାଞ୍ଚାତି ବାରେ ଲକୁଡାକି ଇ ପୁଣ୍ଡିକିନି କାତାତଲେ ଖେସ୍ପି
 ଆହିମାନେ, ^{୧୨} ଏନିକି,
 “ଏଞ୍ଜାରି ମେସି ମେସିହି,
 ମେହିଅରି;
 ଇଞ୍ଜା ଖେଞ୍ଜିଖେଞ୍ଜିହି,
 ତେଲ୍‌ହିଅରି,
 ଏଞ୍ଜାରି ମାହାପୁରୁ ତାଣା ଖେଣ୍ଡା ଖାଡ଼ିହିମା,
 ପାପୁଟି ପିସ୍ପି ଆଡେରିମା ।”

ବିଚା ମାଟିନି କାତା ପୁଣ୍ଡିକିନାୟି
 (ମାତି ୧୩:୧୮-୨୩; ଲୁକ ୮:୧୧-୧୫)

^{୧୩} ଜୀସୁ ଅଡେ ଖେଣ୍ଡେ ଏଞ୍ଜାରାଇଁ ଏଲେଇଚେସି, “ମୀରୁ ଇ ପୁଣ୍ଡି
 କିନାଣି ପୁଞ୍ଜି ହିଲଅତେରି ? ଆଡିହି ନା ପୁଣ୍ଡିକିନି କାତା ଏନିକି
 ପୁଞ୍ଜେରି ? ^{୧୪} ଆମ୍ବାଆସି ମାହାପୁରୁ ବଲୁ ଖେହନାସି ଏଞ୍ଜାସି ବିଚା
 ମାଟିନାସି । ^{୧୫} ଆମିନି ଗାଟାରି ଖେନେରି, ଇଞ୍ଜା ଖେଟି ଦେବୁଣିଏ
 ସୟତାନ ଖାହାନା ଏଞ୍ଜାରିତାଣା ଖେଣ୍ଡି ଆହାମାନି ବଲୁ ମୀଞ୍ଜାଅନେ,
 ଏଞ୍ଜାରି ଜିରୁ ଦାରିତା ରିତି ବିଚାଲେହେଁତାରି । ^{୧୬} ଏଲେକିହି ଏ
 ଖାଲି ଲାକ ରିହାମାନି ବିଚାଲେହେଁତାରି, ଏ ବଲୁ ଖେଣ୍ଡିଏ ରାହୁଟି
 ନାମିନେରି, ^{୧୭} ସାମା ଏଞ୍ଜାରିତାଣା ହୀରୁ ଜୀଆତାକି ଗାଡେକା ତାକି
 ତାରି ମାନେରି, ତାୟୁ ମାହାପୁରୁ ବଲୁ ତାକି କସ୍ତ ବାଦା ଖାଡ଼ିସାରେ
 ଦେବୁଣିଏ ପିହନେରି, ଏଞ୍ଜାରି ଉଣା ଇର୍ଆ ମାନି ଖାଲକା ଲାକତି
 ବିଚାଲେହେଁତାରି । ^{୧୮} ହାପୁକା ବୁଟାତା ମାଟିତି ବିଚା ଏଞ୍ଜାରି,
 ଆମ୍ବାଆରି ବଲୁତି ଖେନେରି, ^{୧୯} ଦାର୍ତିତି ଅଣ୍ଡୁ ଦନତି ବାରେ
 ଜୁପକା ହତାନା ଏଞ୍ଜାରାଇଁ ପୁକ୍‌ହାତୁହନେ, ଇଞ୍ଜା ଏଡି ପାଡେୟି
 ଆୟାଲି ଆଡେଏ । ^{୨୦} ଅଡେ ଆମିନି ଗାଟାରି କାତା ଖେନେରି, ଇଞ୍ଜା
 ନାମିନେରି, ଅଡେ କଡେଦସ, ତାନିକଡ଼ି, ଇଞ୍ଜା ପାସାକଡ଼ି ପାଡେୟି
 କାମିନେରି, ଏଞ୍ଜାରି ନେହି ବୁମିତା ମାଟିତି ବିଚାଲେହେଁତାରି ।”

ମାଣା ପୁକ୍‌ହି ଦୀଞ୍
 (ଲୁକ ୮:୧୭-୧୮)

୨୧ ☆ ଜୀସୁ ଅଡ଼େ ଖେଣ୍ଡେ ଏଝାରାଇଁ ଏଲେଇଚେସି, “ଆମ୍ବାଆସି ଦୀଝିଁ ତୃସାନା ମାଣା ପୁକ୍‌ହାନା କି କାଚେଲି ଡ଼ଇ ଇଚିନେସି ? ଏଦାଆଁ ଏନାଆଁ ଦୀଝିଁ ସତାତା ଇଚଅସି ? ୨୨ ☆ ଇଚିହିଁ ତଞ୍ଜା ଆଆଗାଚାୟି ଏନାୟି ଜିକେଏ ଡ଼ଗୁନା ଡ଼ୟେଏ; ଏନାୟି ଡ଼ଗୁନା ଆହାମାନେ, ଏଡ଼ି ତଞ୍ଜାଆହାଲି ଡ଼ଗୁମାନେ । ୨୩ ଇଚିହିଁ ଆମ୍ବାଆରାକି ଖେଞ୍ଜାଲି କୀକା ମାନୁ ଏଝାସି ଖେଣ୍ଡାସି ।”

୨୪ ☆ ଜୀସୁ ଅଡ଼େ ଏଲେଇଚେସି, “ଏନାଆଁ ଖେଞ୍ଜି ମାଞ୍ଜେରି ଏ କାତାତା ଜାଗ୍ରାତା, ଆମିନି ମାଣା ତଲେ ଲାଠିଦେରି, ଏ ମାଣା ତଲେ ମିଙ୍ଗେ ଲାଠା ହିୟାନେରି, ଅଡ଼େ ମାରୁ ହାରେକା ବେଟାଆଡ଼େରି । ୨୫ ☆ ଇଚିହିଁ ଆମ୍ବାଆରାକି ମାନେ ଏଝାଣାକି ହୀପ୍‌କି ଆନେ; ଅଡ଼େ ଆମ୍ବାଆରାକି ହିଲେଏ, ଏଝାଣି ତାଣା ଏନାୟି ମାନେ, ଏଦାଆଁ ଜିକେଏ ଏଝାଣି ତାଣାଟି ଅଢ଼ିଆନେ ।”

ପାତାଆନି ବିଚାଟି ପୁଣ୍ଡିକିନାୟି

୨୬ ଜୀସୁ ଅଡ଼େ ଏଲେଇଚେସି, “ମାହାପୁରୁ ରାଜି ଇଲେତାୟି, ଏନିକିଁ ର ମାଣସି ବୁମିତା ବିଚା ମାଟିନେସି; ୨୭ ଇଞ୍ଜା ଲାଆଁୟାଁ ଇଦା କିନେସି ଅଡ଼େ ମାଦେନା ତେଝଏଲିନେସି, ଅଡ଼େ ବିଚା ଏନିଆହିଁ ଗଜା ଆହାଁ ପାତାଆନେ ଏଦାଆଁ ଏଝାସି ପୁନଅସି । ୨୮ ଗହଁ ବୁମିଟି ତାନୁଏ ନେୟିନେ, ତଲିଏ ଆକୁ ଆନେ ତାୟୁ ଜେକୁ ଅଡ଼େ ତାୟୁ ଜେକୁତି ପାଡ଼େୟି ଆନେ । ୨୯ ସାମା ଆନା କାମ୍ବିସାରେ ମାଟିତାସି ଏ ଆନାଟି କଚାତଖେଲି ତଲେ ଦାଃଆନେସି ।”

ରାୟି ପାଡ଼େୟି କାତା

(ମାତି ୧୩:୩୧-୩୨; ଲୁକ ୧୩:୧୮-୧୯)

୩୦ ଅଡ଼େ ଜୀସୁ ଏଲେଇଚେସି, “ମାରୁ ମାହାପୁରୁ ରାଜି ଏନାଆଁତଲେ ତୁକ୍‌ନାୟି ? ଇଞ୍ଜା ଏନିଲେହେଁତି ପୁଣ୍ଡିକିନି କାତାତଲେ ଖେହ୍‌ନାୟି ? ୩୧ ଏଡ଼ି ର ହାସୁଁ ପାଡ଼େୟି ଲେହେଁ; ବୁମିତା ମାଟିନି ବେଲାତା ଏଡ଼ି ଦାରୁତିତି ବାରେ ପାଡ଼େୟି କିହାଁ ଡ଼ଣା,

☆ ୪:୨୧ ୪:୨୧ ମାତି ୫:୧୫; ଲୁକ ୧୧:୩୩ ☆ ୪:୨୨ ୪:୨୨ ମାତି ୧୦:୨୬; ଲୁକ ୧୨:୨

☆ ୪:୨୪ ୪:୨୪ ମାତି ୭:୨; ଲୁକ ୭:୩୮ ☆ ୪:୨୫ ୪:୨୫ ମାତି ୧୩:୧୨; ୨୫:୨୯; ଲୁକ ୧୯:୨୭

୩୨ ସାମା ମାଟିତି ଜେଟ ପାତାଆହାନା ବାରେ କୁଟା କିହାଁ କାଜାୟି ଆନେ, ଇଞ୍ଜା ଏଦାନି କମାୟାଁ ଇଲେକିଁ କାଜାଇ ଆନୁ, ଇଞ୍ଜା ହାଗୁ ଲାକ ଉଦ୍ଦିନି ପଗାୟାଁ ଖାହାନା ଏଦାନି କମାଣାଁ ବଣ ଦସାଁ ବାସାଆନୁ ।”

୩୩ ଜୀସୁ ଇଲେକିହିଁ ହାରେକା ପୁଣ୍ଡିକିନି କାତା ଖେସିହିଁ ଏଞ୍ଜାରି ପୁନିଲେହେକିଁ ମାହାପୁରୁ କାତା ଖେସିମାରେସି, ୩୪ ଅଡେ ପୁଣ୍ଡିକିନି କାତା ଆଟ୍‌ଆନା ଜୀସୁ ଏନାଆଁଖା ଖେସି ହିଲାଆତେସି, ସାମା ଲକୁ ହିଲାଆ ବେଲାତା ତାମି ସୀସୁୟାଁଣି ବାରେ ପୁଣ୍ଡି କିହିମାରେସି ।

ଜୀସୁ କାଜା ଗାଲିତି ସାପି କିନାୟି (ମାତି ୮:୨୩-୨୭; ଲୁକ ୮:୨୨-୨୫)

୩୫ ଏ ଦିନା ମିଡ଼ଅଲା ବେଲା ଜୀସୁ ତାମି ସୀସୁୟାଁଇଁ ଏଲେଇଚେସି, “ଖାଦୁ ମାର ସାମ୍‌ଦୁରି ଆତାଲା ହାନ ।” ୩୬ ଏମ୍‌ାଟିଏ ଏଞ୍ଜାରି ଲକୁଣି ପିସାନା ଏଞ୍ଜାସି ଏନିକିଁ ତଂଗତା ମାରେସି ଏଲେକିହିଁ ଏ ଅଡେରି, ଇଞ୍ଜା ଏମ୍‌ାଆଁ ଏଚରଗଟା ତଂଗାୟାଁ ଜିକେଏ ମାରୁ । ୩୭ ଇଞ୍ଜା ଦେବୁଣିଏ ହାରେକା କାଜା ଗାଲି ଆଡେ, ଇଞ୍ଜା ତଂଗ ସାମ୍‌ଦୁରିତି ଗାଲିତାକି ମୁଞ୍ଜାଲି ମାଟ୍‌ହେ । ୩୮ ଏତିବେଲା ଜୀସୁ ତଂଗତି ତାୟୁଞ୍ଜାକି ର ମୁଲାତା ତାରପୁ ଆଂଗାନା ଇଦା କିହାମାରେସି; ଇଞ୍ଜା ସୀସୁୟାଁ ଏଞ୍ଜାଣାଇଁ ନିକହାନା ଏଲେଇଚେରି, “ଏ ଗୁରୁ ମାର ହାନାୟିଦେଁ ନିଜେ ଅଣ୍‌ପୁ ହିଲେଏ କି?”

୩୯ ଏମ୍‌ାଟିଏ ଜୀସୁ ନିଜାନା ଗାଲିତି ଦାକା ହୀହାନା ଏଲେଇଚେସି, “ତୁଙ୍ଗାମୁ” ଇଞ୍ଜା ସାମ୍‌ଦୁରିତି ଏଲେଇଚେସି, “ସାପି ଆମୁ” ଏମ୍‌ାଟିଏ ଗାଲି ପାଲେଏ ଆଡେ ଇଞ୍ଜା ବାରେ ସୁସ୍ତି ଆଡେ । ୪୦ ଇଞ୍ଜା ଜୀସୁ ଏଞ୍ଜାରାଇଁ ଏଲେଇଚେସି, “ମୀରୁ ଏନାଆଁତାକି ଇଚେକା ଆଜିମାଞ୍ଜେରି ? ମୀ ନାମୁ ହିଲେଏ କି?”

୪୧ ଏମ୍‌ାଟିଏ ଏଞ୍ଜାରି ହାରେକା ଆଜାନା ତାମ୍‌ୁ ତାମ୍‌ୁ କାତା ଆଡେରି, “ଇଞ୍ଜାସି ଆମ୍‌ାଆସି ? ଗାଲି ଅଡେ ସାମ୍‌ଦୁରି ଜିକେଏ ଇଞ୍ଜାଣି ହାଡା ମାନଞ୍ଜି ଆହିମାନୁ ।”

୫

ଜୀସୁ ବୃତୁୟାଁ ଆଲଗିତାଣାଇଁ ନେହଁ କିନାୟି
(ମାତି ୮:୨୮-୩୪; ଲୁକ ୮:୨୭-୩୯)

୧ ତାୟୁ ଜୀସୁ ଅଡେ ସୀସୁୟାଁ ଗାଲିଲି ଆତାଲାତି ଗରାସିୟ* ରାଜିତା ଏଗାହାଚେରି । ୨ ଜୀସୁ ଡଂଗଟି ରେପନିଏ ର ବୃତୁ ଆଲଗା ମାଚାସି ମାଡହା ମୁହନି ଟାୟୁଟି ହଡ଼ାଝାହାନା ଜୀସୁଇଁ ବେଟାଆଡେସି । ୩ ଏଝାସି ମାଡହା ମୁହନି ଟାୟୁତା ବାସା କିହିମାଚେସି, ଇଞ୍ଜା ଆମ୍ବାଆସି ଜିକେଏ ଏଝାଣାଇଁ ହିକ୍‌ଶିୟାଁ ତଲେ ଦସାଲି ଆଡ଼ିହିଲାଆଡେରି; ୪ ଇଚିହଁ ଏଝାଣାଇଁ ହାଡ଼େକା ଦେବା ହିକ୍‌ଶିୟାଁ ତଲେ ଦସାମାଚେରି, ସାମା ଏ ହିକ୍‌ଶିୟାଁ ଡାପହାନା କୁଟୁକୁଟା କିଡେସି, ଇଞ୍ଜା ଏଝାଣାଇଁ ଦସା ଇଗାଲି ଆମ୍ବାଆରାକି ଜିକେଏ ବାଡ଼ୟୁ ହିଲାଆଡେ । ୫ ଏଝାସି ଲାଆଁୟାଁ ମାଦେନା ବାରେବେଲା ମାଡହା ମୁହନି ଟାୟୁତା ଅଡେ ହରୁତା ଡୟାନା କିରଡ଼ି ମାଚେସି, ଇଞ୍ଜା ଖାଲକାତଲେ କଡହା କଡିହଁ ରାଣାରାକା କିହା କଡିମାଚେସି ।

୬ ଏଝାସି ହେକଟିଏ ଜୀସୁଇଁ ମେସାନା ହଟି ହଟିହଁ ଝାହାନା ଏଝାଣି କଡାଣା ରିହାଁ ଜହରା କିଡେସି, ୭ ଅଡେ କାଜା ଗିୟାଁତଲେ କିରଡ଼ିହଁ ଏଲେଇଚେସି, “ଏ ବାଡ଼ୟୁଗାଟି ମାହାପୁରୁ ମୀର୍‌ଏଣାତି ଜୀସୁ, ନୀ ତଲେ ନାଙ୍ଗେ ଏନାୟି ମାଚେ ? ନିଙ୍ଗେ ମାହାପୁରୁ ଦରୁତଲେ ପାରମାଣା କିହିମାଞ୍ଜାଇଁ, ନାଙ୍ଗେ କସ୍ତ ହିୟାଆନି ।” ୮ ଏନାଆଁତାକି ଇଚିହଁ ଜୀସୁ ଏଝାଣାଇଁ ଏନାଆଁ ଇଞ୍ଜାଲି ହାଜିମାଚେସି, “ଏ ପଲ୍‌ଆ ବୃତୁତି ଇଝାଣି ତାଣାଟି ହଡ଼ାହାଲାମୁ ।”

୯ ଜୀସୁ ଏଝାଣାଇଁ ଝେଚେସି, “ନୀ ଦରୁ ଏନାୟି ?” ଏଝାସି ଏଲେଇଚେସି, “ନୀ ଦରୁ ‘ମାନ୍ଦା’ ଇଚିହଁ ମାମୁ ହାଡ଼େକା ଜାଣାତମି ।” ୧୦ ଇଞ୍ଜା ଜୀସୁ ଏନିକଁ ଏ ପଲ୍‌ଆ ବୃତୁୟାଁଣି ଏ ରାଜିଟି ଅର ରାଜିତା ପାଣ୍ଡାସି, ଏଦାଆଁତାକି ଏଝି ଜୀସୁଇଁ ହାଡ଼େକା ବାତିମାଲିତୁ ।

୧୧ ଏମ୍ବାଆଁ ହରୁ ଦାରିତା ର ମାନ୍ଦା ପାଜିୟାଁ ମେୟଁମାତୁ । ୧୨ ଅଡେ ଏ ବୃତୁୟାଁ ବାତିମାଲିହଁ ଏଲେଇଚୁ, “ମାଙ୍ଗେ ଏ ପାଜିୟାଁ

* ୫:୧ ୫:୧ କଚେକା ସାସ୍ତେରିତା ଗଦରିୟ ରାସ୍ତକି ଆହାମାନେ

ମାନ୍ଦାତା ହଡ଼ାଲି ପାଣ୍ଡାମ୍ବୁ ।”^{୧୩} ଏଝାସି ଏଝାରାଇଁ ହୁକୁମି ହୀହାଲିଏ, ଏ ପଲ୍ଲଆ ବୁଡୁୟାଁ ଏଝାଣି ତାଣାଟି ହଚାନା ପାଜିୟାଁ ମାନ୍ଦା ବିତ୍ରା ହଚୁ; ଏମ୍ବାଟିଏ ମାନ୍ଦା ପାଜିୟାଁ ତବେ ହଚାନା ତାଗେ ମାଟି ସାମ୍ବୁରିତା ମେଦାନା ହାହାହାଚୁ, ବାରେ ରୀ ମାଣା ପାଜିୟାଁ ମାଚୁ ।

^{୧୪} ଏ ପାଜିୟାଁ ମେଟିମାଟି ଗଡ଼କା ଗାଡ଼ାତା ଅଡ଼େ ନାସକାଣାଁ ଏ କାତା ଖେସକା ହାଚେରି; ଏମ୍ବାଟିଏ ଲକୁ ଏନାଆଁ ଆହାମାନେ ଇଞ୍ଜିଁ ସିନିକିହାଲି ଖାଡ଼େରି ।^{୧୫} ଅଡ଼େ ଏଝାରି ଜୀସୁ ତାଗେ ଖାହାନା, ଏ ବୁଡୁ ଆଲ୍‌ଗା ମାଚାଣାଇଁ ଇଚିହଁ ଆମ୍ବାଆରାକି ନଚେଏ ମାନ୍ଦା ବୁଡୁୟାଁ ଆସାମାଚୁ, ଏଝାଣାଇଁ ହିମ୍ବୁରି ହୁଚାନା ନେହଁ ମନତଲେ କୁଗାମାଚାଣି ମେସାନା ଆଜିତେରି ।^{୧୬} ଆମ୍ବାଆରି ମେସାମାଚେରି, ବୁଡୁ ଆଲ୍‌ଗା ମାଚାସି ଏନିକିଁ ନେହଁ ଆଡ଼େସି, ଅଡ଼େ ପାଜିୟାଁ ଏନିକିଁ ନାସା ଆଚୁ ଏ ବାରେ ଖେସ୍ତେରି ।

^{୧୭} ଏମ୍ବାଟିଏ ଏଝାରି ଜୀସୁଇଁ ତାନି ହାନ୍ଦିଟି ହାଜାଲି ବାତିମାଲିତେରି ।

^{୧୮} ତାୟୁ ଜୀସୁ ତଂଗତା ହଚିମାଚାଟି ଆମିନି ଗାଚାଣାକି ବୁଡୁ ଆଲ୍‌ଗାମାଚେ, ଏଝାସି ତାନିତଲେ ଡ଼ୟାଲି ତାକି ବାତିମାଲିତେସି ।

^{୧୯} ସାମା ଜୀସୁ ହେଲ ହୀଆନା ଏଝାଣାଇଁ ଏଲେଇଚେସି, “ନୀ ଇଜ ନୀ ଲକୁତାଣା ହାଲ୍‌ମାମ୍ବୁ, ଇଞ୍ଜା ପ୍ରବୁ ନିଜେତାକି ଏନି କାମା ଅଡ଼େ ନିଜେତାକି ଏମିନି କାମା କିହାମାଞ୍ଜାନେସି, ଏ ବାରେ ଏଝାରାଇଁ ଖେହ୍‌ମ୍ବୁ ।”

^{୨୦} ଏମ୍ବାଟିଏ ଏଝାସି ହାଜାନା, ଜୀସୁ ଏଝାଣାକି ଏନି କାମା କିହାମାଚେସି, ଏଝାସି ଦେକାପଲିତା† ଖେକ୍‌ହାଲି ମାଚ୍‌ହେସି; ଏମ୍ବାଟିଏ ବାରେଜାଣା କାବା ଆଡ଼େରି ।

ଜାୟିରସ ମାଜ୍‌ମାନି ଜୀସୁ ଇଞ୍ଜା ନେତେରି ଖାଜିମାଟି ଇୟା ନେହଁ ଆନାୟି

(ମାତି ୯:୧୮-୨୬; ଲୁକ ୮:୪୦-୫୬)

^{୨୧} ଜୀସୁ ତଂଗଟି ଗାଣ୍‌ତାନା ଅରଝାକି ଖେଶ୍ତେ ଖାଡ଼େସି, ମାନ୍ଦା ଲକୁ ଏଝାଣି ତାଣା ରୁଣ୍ଡା ଆଡ଼େରି; ଇଞ୍ଜା ଏଝାସି ସାମ୍ବୁରି ଗାଚୁତା ଡ଼ୟିତେସି ।^{୨୨} ଏଚିବେଲା ଜୀହୁଦି ଲକୁତି କୁଟମି ଇଲୁତି‡ କାଜାରି

† ୫:୨୦ ୫:୨୦ ଦସଗଟା ନାସକା ‡ ୫:୨୨ ୫:୨୨ ସିନଗଟା

ବିଦ୍ରାଢ଼ି ଜାୟିରସ ଦରୁଗାଟାସି ରଥସି ଜୀସୁଙ୍କୁ ମେସାନା ଏଝାଣି କତାଣା ରୀତେସି, ^{୨୩} ଇଞ୍ଜା ହାରେକା ବାତିମାଲିହୁଁ ଏଲେଇଚେସି, “ନା ମାଙ୍ଗା ହାନିହୁରେ ଆହାମାନେ; ଏଦି ଏନିକିଁ ନେହୁଁ ଆହାନା ନୀଡିନେ, ଏଦାଆଁତାକି ନୀନୁ ଖାହାନା ଏଦାନି ଲାକ କେୟୁ ଇଟାମୁ ।”

^{୨୪} ଏମ୍ବାଟିଏ ଜୀସୁ ଏଝାଣିତଲେ ହାଚେସି, ଇଞ୍ଜା ହାରେକା ଲକୁ ଏଝାଣିତଲେ ହାଜାଲି ମାଟ୍‌ହେରି, ଇଞ୍ଜା ଏଝାଣି ମୁହେଁ ମୁହେଁ ଝିସ୍‌ପି ଆହିମାଚେରି ।

^{୨୫} ଏରିବେଲାତା ର ଇୟା ବାର ବାର୍ସା ପାତେକା ନେତେରି ଝାଙ୍ଗିନି ରଗତା ନେତେରି ତୁଙ୍ଗାଆନା ନେହୁଁ ଆହି ହିଲାଆତେ, ^{୨୬} ଇଞ୍ଜା ଅସଗୁରୁ ତାଣା ହାଜାନା ଜିକେଏ ହାରେକା ଟାକାୟାଁ କାରୁଁ କିହାମାଚେ, ଅଡେ ଜିକେଏ ନେହୁଁ ଆହାହିଲାଆତେ, ସାମା ହାରେକା କସ୍‌ସୁ ବେଟାଆହି ମାଚେ । ^{୨୭} ଏଦି ଜୀସୁତି କାତା ଝେଞ୍ଜାନା ଲକୁ ମାନ୍ଦାତା ଖାହାନା ତାୟୁ ଝାକିଟି ଏଝାଣି ହିମ୍ବୁରି ତୀଗିତେ; ^{୨୮} ଇଚିହୁଁ ଏଦି ଏଲେ ଇଞ୍ଜିମାଚେ, “ଏଝାଣି ହିମ୍ବୁରି ତୀଗିତିହୁଁ ନେହୁଁ ଆକୁଁ ।”

^{୨୯} ଏ ଦେବୁଣିଏ ଏଦାଣି ନେତେରି ବନାୟି ତୁଞ୍ଜିତେ, ଇଞ୍ଜା ଏଦି ରଗଟି ନେହୁଁ ଆହାମାନେ ଏଦାଆଁ ତାନି ଆଙ୍ଗାତା ପୁଞ୍ଜା କଡିତେ । ^{୩୦} ଦେବୁଣିଏ ଜୀସୁ ତାନି ଆଙ୍ଗାଟି ବାଡ଼ୟୁ ହାଚାଣି ହିୟାତା ପୁଞ୍ଜାନା, ଲକୁ ମାନ୍ଦାତା ଝେଣ୍ଡେ ସିନିକିହାନା ଏଲେଇଚେସି, “ଏମ୍ବାଆୟି ନା ହିମ୍ବୁରି ତୀଗାତେ ?”

^{୩୧} ଏମ୍ବାଟିଏ ତାନି ସୀସୁୟାଁ ଏଲେଇଚେରି, “ନୀନୁତ ମେସିମାଞ୍ଜି ଲକୁ ଏନିକିଁ ନୀ ମୁହେଁ ଆହିମାନେରି, ଅଡେ ଏଲେ ଇଞ୍ଜିମାଞ୍ଜି ଆମ୍ବାଆୟି ନାଙ୍ଗେ ତୀଗାତେ ?”

^{୩୨} ସାମା ଏମ୍ବାଆୟି ତାଙ୍ଗେ ତୀଗିତେ ଏଦାଆଁ ମେସାଲି ଜୀସୁ ସାରିସୁଟୁ ସିନିକିତେସି । ^{୩୩} ଏମ୍ବାଟିଏ ଏ ଇୟା ଖାହାନା ତାଙ୍ଗେତାକି ଏନାୟି ଆହାମାନେ ଏଦାଆଁ ପୁଞ୍ଜା ଆଜିତାକି ତୀରଗିହୁଁ ଝାହାଁ ତାନି କତାଣା ରିହାନା ବାରେ ସାତା କାତା ଏଝାଣାକୁଁ ଝେସ୍ତେ । ^{୩୪} ଏମ୍ବାଟିଏ ଜୀସୁ ଏ ଇୟାନି ଏଲେଇଚେସି, “ଆଲ ମାଙ୍ଗା ନୀ ନାମୁ ନିଙ୍ଗେ ନେହୁଁ କିହାମାଞ୍ଜାନେ; ହିଡ଼ଡ଼ି ତଲେ ହାଲାମୁ ଇଞ୍ଜା ନୀ ରଗଟି ନେହୁଁ ଆମୁ ।”

୩୫ ଜୀସୁ ଇ କାତା ୱେସିମାଚାଟି, ଜୀହୁଦି ଲକୁଡି କୁଟମି ଇଲୁଡି କାଜାଣା ଇଜଟି ରଅସି ୱାହାନା ଏଲେଇରେସି, “ନୀ ମାଙ୍ଗା ହାଡେୟିଏ ଗୁରୁଇଁ ଅଡେ ଏନାଆଁତାକି କସୁ ହୀହିମାଞ୍ଜି ?”

୩୬ ସାମା ଜୀସୁ ଏ କାତା ୱେଞ୍ଜାନା ୱେନାଆଡିଲେହେଁ ଆହାନା ଜାୟିରସଇଁ ଏଲେଇରେସି, “ଆଜାଆନି ସାମା ନାମାମୁ ।” ୩୭ ଅଡେ ଏଞ୍ଜାସି ପିତର, ଜାକୁବ, ଅଡେ ତାନି ତାୟି ଜହନ ପିସ୍ପେ ଆମ୍ବାଆରାଇଁ ତାନିତଲେ ଅଆଡେସି । ୩୮ ଏଞ୍ଜାରି ଜାୟିରସ ଇଜ ଏଜାଲିଏ, ଏମ୍ବାଆଁ ହାରେକା କାଲୁଞ୍ଜି ଆହୁଁ ଡାହିମାନାଣି ମେସ୍ତେସି, ୩୯ ଇଞ୍ଜା ବିଡ୍ରା ହାଜାନା ଏଞ୍ଜାସିକାଣି ଏଲେଇରେସି, “ଏନାଆଁତାକି କାଲୁଞ୍ଜି ଆହୁଁ ଡାହି ମାଞ୍ଜେରି, ଇ ପଦା ହାହାହିଲେଏ ସାମା ଇଦା କିହାମାନେ” ଏମ୍ବାଟିଏ ଏଞ୍ଜାରି ଏଞ୍ଜାଣାଇଁ କାକହେରି ।

୪୦ ଏଞ୍ଜାରି ଏଞ୍ଜାଣାଇଁ ଲାଜା କିହାନା କାକହେରି, ସାମା ଏଞ୍ଜାସି ବାରେଡି ପାଙ୍ଗାତା ପାଣ୍ଡାନା ପଦାନି ଇୟା ଆବା ଅଡେ ତାନି ତାନି ଜାଣା ସୀସୁୟାଁ ତଲେ ଏ ପଦା ମାଟି ତାଣା ହାରେରି, ୪୧ ଇଞ୍ଜା ଏ ପଦାନି କେୟୁ ଆସାନା ଏଦାନି ଏଲେଇରେସି, “ଟଲିତା କୁମ୍” ଇଚିହୁଁ “ଆଲ ମାଙ୍ଗା ନାନୁ ନିଙ୍ଗେ ୱେସିମାଞ୍ଜାଇଁ ନିଙ୍ଗାମୁ ।”

୪୨ ଏ ଦେବୁଣିଏ ପଦା ନିଙ୍ଗାନା ତାକିଡେ (ଇଚିହୁଁ ଏଡି ବାର ବାର୍ଯା ଆହାମାରେ) ଏମ୍ବାଟିଏ ଏଞ୍ଜାରି ହାରେକା କାବା ଆଡେରି । ୪୩ ଇଞ୍ଜା ଇ କାତା ଏନିକିଁ ଆମ୍ବାଆରି ପୁନଅରି, ଏଦାଆଁତାକି ଏଞ୍ଜାସି ଏଞ୍ଜାରାଇଁ ଜାଣ୍ଡେ ହୁକୁମି ହୀଡେସି, ଇଞ୍ଜା “ପଦାନାକି ଏନାଆଁ ଡିଞ୍ଜାଲି ହୀଦୁ” ଇଚେସି ।



ଜୀସୁଇଁ ନାକ୍ରିତତା ଅପାଆଗାଟାୟି
(ମାଟି ୧୩:୫୩-୫୮; ଲୁକ ୪:୧୭-୩୦)

୧ ଜୀସୁ ଏ ଟାୟୁ ପିସାନା ତାନୁ ପାତାଆଡି ନାୟୁଁତା ହାଚେସି ଇଞ୍ଜା ତାନି ସୀସୁୟାଁ ତାନି କ୍ରେଟ ହାଚେରି । ୨ ଜମିନି ଦିନା ୱାହାଲିଏ, ଏଞ୍ଜାସି ଜୀହୁଦି ଲକୁଡି କୁଟମି ଇଲୁଡା* ଜାପୁହାଲି ମାଟୁହେସି; ଇଞ୍ଜା ହାରେକା ତାନି କାତା ୱେଞ୍ଜାନା କାବା ଆହୁଁ ଏଲେଇଚେରି,

* ୭:୨ ୭:୨ ସିନଗର

“ଇଝାଣାକି ଇ ବାରେ ଏମ୍ବିଟି ଆଡେ ? ଇଝାସି ଇଲେତି ବୁଦି ଏନିକି ପୁଚେସି ? ଇଞ୍ଜା ଇଲେତି କାବାଆନି କାମା ଏନି ବାଡ଼ୁୟୁ ତଲେ କିହିମାନେସି ?” ୩ ଇଝାସି ଏ ବାଡ଼ିୟାତି ମୀରୁଏସି ଆଏକି ? ଇଝାସି ମରିୟମନି ମୀରୁଏସି ଇଞ୍ଜା ଜାକୁବ, ଜସି, ଜୀହୁଦା ଇଞ୍ଜା ସିମନତି ତାୟି ଆଏକି ? ଇଞ୍ଜା ତାମି ତାଜିସ୍ତା ଇମ୍ବାଆଁ ମା ତଲେ ହିଲାଉ କି ? ଅଡେ ଏଝାରି ଏଝାଣାଇଁ ଅପାଆଡେରି ।

୪ ✠ଏମ୍ବାଟିଏ ଜୀସୁ ଏଝାରାଇଁ ଏଲେଇଚେସି, “ମାହାପୁରୁ ଅଣ୍ଡପୁତି ବଲୁ ଖେହନାରି ଏଟକା ଲକୁ ତାଣାଟି ମାନି ବେଟାଆନେରି ସାମା ତାମି ନାୟୁତି ଲକୁ ଇଞ୍ଜା ତାମି ଇଲୁ କୁଟମିତି ଲକୁ ଏଝାଣାଇଁ ମାନି କିଅରି ।”

୫ ଇଞ୍ଜା ଏଚରଜାଣା ରଗ ଗାଟାରାଇଁ କେୟୁ ଇଟାନା ନେହୁଁ କିନାଣି ପିସପେ ଏ ଟାୟୁତା ଏନି ବାଡ଼ୁୟୁତି କାମା କିହାଲି ଆଡାଆଡେସି । ୬ ଇଞ୍ଜା ଏଝାରି ନାମାଆତାକି ଜୀସୁ ହାରେକା କାବା ଆଡେସି ଏମ୍ବାଟି ବାରେ ନାସକାଣାଁ ହାଜାନା ଜାପୁହେସି ।

**ଜୀସୁ ବାରଜାଣା ସାସୁୟାଣି ପାଣ୍ଡିନାୟି
(ମାତି ୧୦:୫-୧୫; ଲୁକ ୯:୧-୬)**

୭ ତାୟୁ ଏଝାସି ନାସକା ନାସକାଣାଁ ରେଜି ରେଜିହୁଁ ଜାପୁହାଲି ମାଟୁହେସି, ଏମ୍ବାଟିଏ ବାରଜାଣାତି ତାଗେ ହାଟାନା ଏଝାରାଇଁ ରିଆରି ଲାକା କିହାନା ପାଣ୍ଡାଲି ମାଟୁହେସି ଇଞ୍ଜା ଲାଗେଏ ପଲେଏତି ଜୀସୁୟାଁ ଲାକ ଏଝାରାକି ଅଦିକାରା ହାଡେସି, ୮ ଅଡେ ହାଜାଲିତାକି ବାଡ଼ୁଗା ପିସପେ, ଲହଡ଼ି କି ମଣା କି ଅଟଡ଼ିତା ଟାକାୟାଁ ଅଥାପୁ ଇଞ୍ଜୁ ହୁକୁମି ହାଡେସି; ୯ ସାମା ଏଝାରାଇଁ କତାତା ସେପୁୟାଁ ତୁରହାଲି ଏଲେଇଚେସି, ଇଞ୍ଜା ରୀ ସକାୟାଁ ତୁରହାଲି କାହି କିଡେସି । ୧୦ ଇଞ୍ଜା ଜୀସୁ ଏଝାରାଇଁ ଏଲେଇଚେସି, “ମିଙ୍ଗ ଆମିନି ଇଲୁତା ହାଟାନେରି, ଏମ୍ବାଟି ଖେଣ୍ଡା ଝାଆ ପାଡେକା ଏମ୍ବାଆଁ ଡୟାଦୁ । ୧୧ ✠ସାମା ଆମିନି ଟାୟୁତି ଲକୁ ମିଙ୍ଗ ଆବଅରି, କି ମୀ କାତା ଖେନଅରି, ଏମ୍ବାଟି ଖେଣ୍ଡା ଝାଡାଟି ଏଝାରି ନକିତା ସାକି ହାହାଲି ତାକି ମୀ କତାତି ଦୂଡ଼ି ହାଣ୍ଡୁ ।”

✠ ୭:୪ ୭:୪ ଜହ ୪:୪୪ ✠ ୭:୧୧ ୭:୧୧ କାମା ୧୩:୫୧ ✠ ୭:୧୧ ୭:୧୧ ଲୁକ ୧୦:୪-୧୧

୧୨ ଏମ୍ବାଟିଏ ଏଞ୍ଜାରି ରେଜି ରେଜିହ୍ମ ପାପୁ ପିସାନା ମନ୍ ଝେଟ୍ଟନି କାତା ଝେକ୍‌ହେରି, ୧୩ ✨ଇଞ୍ଜା ହାରେକା ବୃତୁଣି ପିସପି କିତେରି, ଇଞ୍ଜା ହାରେକା ରଗା ଗାଟାରାଇଁ ନିହ୍ମୁଁ ରୁବାନା ନେହ୍ମ କିତେରି ।

ବାପ୍ତିସ୍ମା‡ ହାନି ଜହନତି ହାନାୟି
(ମାତି ୧୪:୧-୧୨; ଲୁକ ୯:୭-୯)

୧୪ ✨ଏମ୍ବାଟିଏ ଜୀସୁ ଦରୁ ସାରି ଝାକି ଝେଙ୍ଗା ହାଜାଲିଏ ହେରଦ ରାଜା ଏଞ୍ଜାଣି କାତା ଝେଚେସି, ଇଞ୍ଜା ଲକୁ ଏଲେଇଞ୍ଜିମାଚେରି, “ବାପ୍ତିସ୍ମା‡ ହାନି ଜହନ ହାତାରି ତାଣାଟି ନିଙ୍ଗାମାନେସି, ଏଦାଆଁତାକି ଇ ବାରେ କାବାଆନି ବାଡ଼ମୁତି କାମା ଏଞ୍ଜାଣି ତାଣା ଆହିମାନେ ।”

୧୫ ସାମା ଏଟକାତାରି ଏଲେଇଞ୍ଜିମାଚେରି, “ଇଞ୍ଜାସି ଏଲିୟ ।”

ଇଞ୍ଜା ଅଡେ ଏଚରଜାଣା ଏଲେଇଞ୍ଜିମାଚେରି, “ମାହାପୁରୁ ଅଣ୍ପୁତି ବଲୁ ଝେହ୍ନାରି ଲେହେଁ ଇଞ୍ଜାସି ଜିକେଏ ମାହାପୁରୁ ଅଣ୍ପୁତି ବଲୁ ଝେହ୍ନାସି ।”

୧୬ ସାମା ହେରଦ ଇଦାଆଁ ଝେଞ୍ଜାନା ଏଲେଇଚେସି, “ଆମିନି ଜହନତି ତାୟ୍ ନାନୁ ଦାପି କିହାମାଇଁ, ଏଞ୍ଜାସି ନିଙ୍ଗାମାନେସି !” ୧୭ ✨ଇଚିହ୍ମ ହେରଦ ତାନି ତାୟି ପିଲିପ ତକ୍ତି ହେରଦିୟାନି ବୀହା ଆହାମାଚାକି, ଏଡାନି ତାକି ତାନୁ ଲକୁଣି ପାଣ୍ଡାନା ଜହନଇଁ ଦସ୍‌ପା ତାଗାନା କାୟିଦିତା ଇଟାମାଚେସି । ୧୮ ଇଚିହ୍ମ ଜହନ ହେରଦଇଁ ଏଲେଇଞ୍ଜାମାଚେସି, “ନୀ ତାୟି ତକ୍ତିନି ଇଚିନାୟି ନୀ ମେରା ହିଲାଆତେ ।” ୧୯ ଏମ୍ବାଟିଏ ହେରଦିୟା କାରବି ଆହାନା ଜହନଇଁ ପାୟାଲି ମନ୍ କିହିମାଚେ ସାମା ଏଦି ଏନାଆଁ କିହାଲି ଆଡ଼ିହିଲାଆତେ । ୨୦ ଇଚିହ୍ମ ହେରଦ ଜହନଇଁ ର ଦାମ୍‌ଗାଟାସି ଅଡେ ସୁଦୁଗାଟାସି ଇଞ୍ଜା ଆଜିମାଚେସି, ଇଞ୍ଜା ଏଞ୍ଜାଣାଇଁ ଗେଲ୍‌ପାଲି ଅଣ୍ପିମାଚେସି, ଏଞ୍ଜାଣି କାତା ଝେଞ୍ଜାନା ଆଜିତିହ୍ମ ଜିକେଏ ଏଞ୍ଜାଣି କାତା ଝେଞ୍ଜାଲି ମନ୍ କିହିମାଚେସି ।

୨୧ ତାୟ୍ ହେରଦିୟାକି ର ପାରୁ ମେଡାଆତେ, ହେରଦ ତାନି ଜାର୍ନା ଦିନାତା କାଜା କାଜା ମନ୍ଦ୍ରିୟାଣି ଇଞ୍ଜା ଗାଲିଲିତି କାଜା କାଜାରାଇଁ

☆ ୭:୧୩ ୭:୧୩ ଜାକୁବ ୫:୧୪ † ୭:୧୩ ୭:୧୪ ମୁଞ୍ଜିନାୟି ☆ ୭:୧୪ ୭:୧୪ ମାତି
୧୭:୧୪; ମାର୍ଚ୍ଚ ୮:୨୮; ଲୁକ ୯:୧୯ ‡ ୭:୧୪ ୭:୧୪ ମୁଞ୍ଜିନାୟି ☆ ୭:୧୭ ୭:୧୭ ଲୁକ
୩:୧୯, ୨୦

ଲାଆଁ ବେଲତା ର ବଜ୍ରତା ହାଟିତେସି; ୨୨ ଇଞ୍ଜା ହେରଦିୟାନି ମାଙ୍ଗା ବିଦ୍ରା ହାଜାନା ଏନାହାଁ ହେରଦ ଇଞ୍ଜା ତାନିତଲେ ବଜ୍ରତା କୁଗାମାଟି ଲକୁଣି ରାହାଁ କିଞ୍ଜକିତେ, ଏମ୍ବାଟିଏ ରାଜା ଏ ପଦାନି ଏଲେଇଚେସି, “ଏନାଆଁ ମନ କିହିମାଞ୍ଜି ରୀସ୍ତାମୁ ନାନୁ ଏଦାଆଁ ନିଙ୍ଗେ ହିୟାଇଁ ।” ୨୩ ଇଞ୍ଜା ଏଞ୍ଜାସି ପଦା ନକିତା ପାରମାଣା କିତେସି, “ନାନୁ ନାଙ୍ଗେ ଏନାଆଁ ରୀସ୍ତାଦି, ରାଜିତି ଆଦା ଜିକେଏ ନାନୁ ନିଙ୍ଗେ ହିୟାଇଁ !”

୨୪ ଏମ୍ବାଟିଏ ଏ ପଦା ହାଜାନା ତାନି ଇୟାନି ଖେରେ, “ନାନୁ ଏନାଆଁ ରୀହଇଁ ?”

ଏମ୍ବାଟିଏ ଏଦି ଏଲେଇଚେ, “ବାପ୍ତିସ୍ତୁଟ୍ ହାନି ଜହନତି ତାୟ୍ଁ ୁ”

୨୫ ଏ ଦେବୁଣିଏ ରାଜା ତାଣା ତବେ ଖାହାନା ଏଲେଇଞ୍ଜି ରୀସ୍ତେ, “ନାଙ୍ଗେ ନାନୁ ବାପ୍ତିସ୍ତୁଟ୍* ହାନି ଜହନତି ତାୟ୍ଁ ୁ ର ସାଡ଼ଞ୍ଜାତା ନୀଏଁ ନାଙ୍ଗେ ହିୟାମୁ ।”

୨୬ ଏମ୍ବାଟିଏ ରାଜା ହାରେକା ଦୁକୁ ଆଡ଼ିହଁ ଜିକେଏ, ତାନୁ କିତି ପାରମାଣା ଅଡ଼େ ବଜ୍ରତା କୁଗାମାଟାରି ତାକି ଆଏ ଇଞ୍ଜାଲି ଆଡ଼ାଆତେସି । ୨୭ ଏଦାଆଁତାକି ରାଜା ଦେବୁଣିଏ ର କହୁଏଁଶାଇଁ ପାଣ୍ଡାନା ତାନି ତାୟ୍ଁ ୁତାଚାଲି ହୁକୁମି ହୀତେସି, ଏମ୍ବାଟିଏ ଏଞ୍ଜାସି ହାଜାନା କାୟିଦି ଇଲୁତା ତାନି ତାୟ୍ଁ ୁଦାତେସି; ୨୮ ଅଡ଼େ ଏଦାଆଁ ର ସାଡ଼ଞ୍ଜାତା ତାଚାନା ପଦାନାକି ହୀତେସି, ଇଞ୍ଜା ପଦା ଏଦାଆଁ ଅହାନା ତାନି ଇୟାନାକି ହୀତେ । ୨୯ ଇଞ୍ଜା ଜହନତି ସୀସୁୟାଁ ଏ କାତା ଖେଞ୍ଜାନା ଖାଡ଼େରି, ଇଞ୍ଜା ତାନି ମାଡ଼ହାତି ଅହାନା ମାଡ଼ହା ଇଟିନି ଚାୟୁତା ଇଟିତେରି ।

ଜୀସୁ ପାସାମାଣା ଲକୁତାକି ତୀହନାୟି
 (ମାତି ୧୪:୧୩-୨୧; ଲୁକ ୯:୧୦-୧୭; ଜହ ୭:୧-୧୪)

୩୦ ତାୟୁ ପାଣ୍ଡୁଖି ଆହାମାଟାରି ଜୀସୁ ତାଣା ଖାଡ଼େରି, ଇଞ୍ଜା ଏଞ୍ଜାରି ଏନା ଏନାଆଁ କିହାମାଚେରି, ଇଞ୍ଜା ଏନା ଏନାଆଁ ଜାପୁହା ମାଚେରି, ଏ ବାରେ ଏଞ୍ଜାଶାଇଁ ଖେସ୍ତେରି । ୩୧ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ମାର ଇମ୍ବାଟି ଲକୁ ହିଲାଆ ଟାୟୁତା ହାନ, ଏମ୍ବାଆଁ ମୀରୁ ଗାଡ଼େକା ଜମାଦୁ ।” ଇଟିହଁ ହାରେକା ଲକୁ ହାଜି ଖାହି

§ ୭:୨୪ ୭:୨୪ ମୁଞ୍ଜନାୟି * ୭:୨୫ ୭:୨୫ ମୁଞ୍ଜନାୟି

ଆହିମାତାକି ଏଝାରାକି ତିଞ୍ଜାଲି ଜିକେଏ ମ୍ନିଆଡେ । ୩୨ ଏମ୍ବାଟିଏ ଏଝାରି ଏଟ୍‌କା ଆହାନା ର ଡଂଗତା ହଟାନା ଲକୁ ହିଲାଆ ଟାୟୁତା ହାଚେରି ।

୩୩ ସାମା ହାଚେରକା ଲକୁ ଏଝାରି ହଟା ହାଚାଣି ମେସ୍ତେରି ଅଡେ ପୁଚେରି, ଇଞ୍ଜା ଲକୁ ବାରେ ଗାଡ଼ାୟାଟି ତାକିହିଁ ହାଜାନା ଏଝାରି ନକିତା ଏଗାହାଚେରି । ୩୪ ✨ଏଝାସି ଡଂଗଟି ରେଚାନା ହାଚେରକା ଲକୁଣି ମେସାନା ଏଝାରାଇଁ କାର୍ମା ଆଡେସି, ଇଚିହିଁ ଏଝାରି ଗଡ଼ ହିଲାଆ ମେଣ୍ଡାୟାଁ ଲେହେଁ ମାଚେରି; ଇଞ୍ଜା ଏଝାସି ଏଝାରାଇଁ ହାଚେରକା କାତା ଜାପୁହେସି । ୩୫ ଗାଡ଼ି ଖେଡ଼ାଆୟାଲିଏ ତାନି ସୀସୁୟାଁ ତାନି ତାଣା ଖାହାନା ଏଲେଇଚେରି, “ଇ ଟାୟୁ ଲକୁ ହିଲାଆ ଟାୟୁ ଇଞ୍ଜା ଆନ୍ଦେରି ଜିକେଏ ଆହିମାନେ; ୩୬ ଲକୁ ଏନିକିଁ ସାରିଝାକି ମାନି ଖାଲ୍‌ହାଝାଡ଼ି ଅଡେ ଗାଡ଼ାତା ହାଜାନା ତାମ୍‌ଜେ ତାକି ତିଞ୍ଜାଲି ରାନ୍ଦା କଡାପେରିଝା, ଏଡାଆଁତାକି ଏଝାରାଇଁ ହେଲ ହୀହାନା ପାଣ୍ଡାମୁ ।”

୩୭ ସାମା ଜୀସୁ ତାନି ସୀସୁୟାଁଇଁ ଏଲେଇଚେସି, “ମୀରୁ ଏଝାରାକି ତିଞ୍ଜାଲି ହୀଦୁ ।”

ଏଝାରି ଏଲେଇଚେରି, “ମାର ରୀ ଖାଞ୍ଜା ଖେଣ୍ଡି ଟାକାୟାଟିଠି ରୁଟି ତାଚାନା ଇଝାରାକି ତିଞ୍ଜାଲି ହୀନାୟି କି ?”

୩୮ ଜୀସୁ ଏଝାରାଇଁ ଏଲେଇଚେସି, “ମୀ ତାଣା ଏଚରଗଟା ରୁଟି ମାନୁ ? ହାଜାନା ସିନିକିଦୁ ।”

ଏଝାରି ଖେଞ୍ଜା ଖାହାନା ଜୀସୁଇଁ ଏଲେଇଚେରି, “ପାସାଗଟା ରୁଟି ଇଞ୍ଜା ରୀ ମୀଣ୍ଡକା ମାନୁ ।”

୩୯ ଇଞ୍ଜା ଜୀସୁ ତାନି ସୀସୁୟାଁଇଁ ଏଲେଇଚେସି, ବାରେ ଲକୁଇଁ ଗଟି ଗଟି କିହିଁ କୁଗି ଜାଡ଼ା ଲାକ କୁଗିକିହାଲି ଖେସ୍ତେସି । ୪୦ ଏଚେଟିଏ ଏଝାରି ପାସାକଡ଼ି ଜାଣା ରୀ କଡ଼ି ଦସ ଜାଣା ଲାକା ମାନ୍ଦା ମାନ୍ଦା ଆହିଁ କୁଗିଚେରି । ୪୧ ଡାୟୁ ଜୀସୁ ଏ ପାସାଗଟା ରୁଟି ଇଞ୍ଜା ରୀ ମୀଣ୍ଡକା ଅହାନା ଲାକପୁରୁ ଝାକି ସିନିକିହାଁ ମାହାପୁରୁଇଁ ଜହରା କିଚେସି, ଅଡେ ରୁଟି ଡିକହାନା ଲକୁତାକି ବାଟି କିହା ହୀହାଲି ତାନି ସୀସୁୟାଁକି ହୀଚେସି, ଇଞ୍ଜା ରୀ ମୀଣ୍ଡକା ଜିକେଏ ଏଲେକିହିଁ ଏ ବାଗା

✨ ୭:୩୪ ୭:୩୪ ମାଡି ୯:୩୭ † ୭:୩୭ ୭:୩୭ ର ଦିନାତି ବୁଡି ର ଖେଣ୍ଡି ଟାକା

କିହାନା ହୀତେସି । ୪୨ ଏମ୍ବାଆଁ ବାରେଜାଣା ତିଞ୍ଜାନା ପାଞ୍ଜିତେରି,
୪୩ ଇଞ୍ଜା ଏଞ୍ଜାରି ହାରାମାଟି ରୁଟି ଅଡ଼େ ମୀଣ୍ଟକା କୁଡ଼ି କିହାନା
ବାରଗଟା ତାଲିତା ନେଞ୍ଜିକିତେରି । ୪୪ ରୁଟି ତିଟି ଲକୁ ପାସାମାଣା
ଝାରଇ ଆବାୟାଁ ମାଚେରି ।

ଜୀସୁ ଏୟୁ ଲାକ ତାକିନାୟି

(ମାତି ୧୪:୨୨-୩୩; ଜହ ୬:୧୫-୨୧)

୪୫ ଏ ଦେବୁଣିଏ ଏଞ୍ଜାସି ତାନି ସୀସୁୟାଁଣି ତଂଗତା ହଟାନା
ଆତାଲାଞ୍ଜାକି ମାନି ବେଡ଼ସାୟିଦା ଗାଡ଼ାତା ହାଜାଲି ତାନି ନବେଏ
ପାଣ୍ଡିତେସି, ଏମ୍ବାଟିଏ ବାରେ ଲକୁଣି ହାଜାଲିତାକି ହେଲ ହାହାଁ
ପାଣ୍ଡିତେସି । ୪୬ ଏଞ୍ଜାରି ତାଣାଟି ହେଲ ଅଡ଼ି ତାୟୁ ଏଞ୍ଜାସି ପ୍ରାଡାନା
କିହାଲି ହୁରୁତା ହାଚେସି । ୪୭ ମିଡ଼ଅଲା ଆହାଲିଏ ତଂଗ ସାମ୍ବୁରି
ମାଦିଏ ମାଚେ, ଇଞ୍ଜା ଜୀସୁ ସାମ୍ବୁରି ଗାରୁତା ରଥସିଏ ମାଚେସି
। ୪୮ ଏମ୍ବାଟିଏ ହାରେକା ଗାଲି ଏଞ୍ଜାରି ଝାକି ଝେଟିମାତାକି ତଂଗ
ତାକି କିହାଲି କସ୍ତୁ ଆହିମାଚାଣି ମେସାନା ଏଞ୍ଜାସି ଝେୟା ନେକେରି
ସାମ୍ବୁରି ଏୟୁ ଲାକ ତାକିହଁ ଏଞ୍ଜାରି ତାଗେ ଝାଡ଼େସି, ଇଞ୍ଜା
ଏଞ୍ଜାରି ତାଗେଟି ଆଗାଡ଼ା ହାଜାଲି ଅଣ୍ପାମାଚେସି, ୪୯ ସାମା ଏଞ୍ଜାରି
ଏଞ୍ଜାଣାଇଁ ସାମ୍ବୁରି ଲାକ ତାକି ମାନାଣି ମେସାନା ବୁଡୁ ଇଞ୍ଜା
ଅଣ୍ପାନା କାଲୁଞ୍ଜି ଆଡ଼େରି । ୫୦ ଇଚିହଁ ବାରେଜାଣା ଏଞ୍ଜାଣାଇଁ
ମେସାନା ଆଜାହାଜା ମାଚେରି ।

ସାମା ଜୀସୁ ଦେବୁଣିଏ ଏଞ୍ଜାରିତଲେ କାତା ଆହାନା ଏଞ୍ଜାଣାଇଁ
ଏଲେଇଚେସି, “ସାସା ଆହ୍‌ଦୁ ନାନୁଏ ଏଞ୍ଜାଚେସଁ, ଆଜାଆଦୁ ।”
୫୧ ଇଞ୍ଜା ଏଞ୍ଜାସି ଏଞ୍ଜାରିତାଣା ହାଜାନା ତଂଗତା କୁଗିତେସି, ଇଞ୍ଜା ଗାଲି
ତୁଞ୍ଜିତେ, ଏମ୍ବାଟିଏ ଏଞ୍ଜାରି ମନ ମନତା ହାରେକା କାବା ଆଡ଼େରି
। ୫୨ ଇଚିହଁ ଏଞ୍ଜାରି ରୁଟିୟାଁ କାତା ପୁଣ୍ଡାୟୁ ପୁଞ୍ଜାହିଲାଆଡ଼େରି,
ଏନାଆଁତାକି ଇଚିହଁ ଏଞ୍ଜାରି ହିୟାଁ ଆଟ୍‌ଝା ଆହାମାଚେ ।

ଗେନେସର ରଗ ଗାଟାରାଇଁ ନେହଁକିନାୟି

(ମାତି ୧୪:୩୪-୩୬)

୫୩ ଏଞ୍ଜାରି ସାମ୍ବୁରି ଗାଣ୍ଟାନା ଗେନେସର ରାଜିତା ଏଜାନା କାତା
ଗାରୁତା ତଂଗତି ଦସ୍ତେରି । ୫୪ ଅଡ଼େ ଏଞ୍ଜାରି ତଂଗଟି ରେତାଲିଏ,

ଦେବୁଣିଏ ଲକ୍ଷ୍ମୀ ଏଝାଣାଙ୍କ ପୁଞ୍ଜାନା, ^{୫୫} ଏ ରାଜିତି ସାରିଖକି ହାଚେରି, ଏଝାରି ଆମିନି ଟାୟୁତା ମାନେରି ଇଞ୍ଜିଁ ଖେଚେରି, ଅଡ଼େ ଜୀସୁ ମାନି ଟାୟୁତା ରଟ ଗାଟାରାଙ୍କ କାଟେଲିତା ତେକା ତାଚାଲି ମାଟୁହେରି । ^{୫୬} ଇଞ୍ଜିଁ ଏଝାସି ଆମିନି ନାସ୍କା, ଅଡ଼େ ଗାଡ଼ାତା ହାଚେସି, ଲକ୍ଷ୍ମୀ ଏ ବାରେ ଟାୟୁତି ହାଟା ବାଜାରାଟି ରଟ ଗାଟାରାଙ୍କ ଏଝାଣି ନକିତା ଏଝାରାଙ୍କ ଇଟିତେରି, ଏଝାରି ଏନିକିଁ ଏଝାଣି ହିମ୍ବୁରି କୁଞ୍ଜୁ ଡାଗିନେରି, ଏଦାଆଁତାକି ଏଝାଣାଙ୍କ ବାତିମାଲିତେରି; ଇଞ୍ଜିଁ ଏଚେକା ଲକ୍ଷ୍ମୀ ଏଝାଣାଙ୍କ ଡାଗିତେରି ଏଝାରି ବାରେ ନେହଁ ଆଡ଼େରି ।



ଆକୁ ଆବାୟାତି ପାଣାପାଟୁ (ମାତି ୧୫:୧-୯)

^୧ ଡାୟୁ ପାରୁସିୟାଁ ଅଡ଼େ ଜିରୁସାଲମଟି ଖାହାମାନି ଏଚରଜାଣା ମେରାପୁନାରି ଜୀସୁ ତାଣା ରୁଣ୍ଡା ଆଡେରି । ^୨ ଏଝାରି ସୀସୁୟାଁ ବିତ୍ରାଟି ଏଚରଜାଣାତି କେସ୍ତା ନରଥାନା ତିଞ୍ଜି ମାଟାଣି ମେସ୍ତେରି । ^୩ ପାରୁସିୟାଁ ଅଡ଼େ ବାରେ ଜୀହୁଦି ଲକ୍ଷ୍ମୀ ଆକୁ ଆବାୟାଁ ଇଟାମାନି ମେରାତି ମାନୁଞ୍ଜି ଆହାନା ନେହଁ କିଁ କେୟୁ ନରଥାସାରେ ତିଞ୍ଜି ହିଲାଆଡେରି, ^୪ ଇଞ୍ଜିଁ ହାଟା ବାଜାରାଟି ଖାହାନା ତାମି ଲାକ ଏୟୁ ଡାଞ୍ଜା କତାଆନା ତିଞ୍ଜି ହିଲାଆଡେରି; ଅଡ଼େ ଗିନା ମୁତା ଇଞ୍ଜିଁ ପିତାଡ଼ା ଡକାୟାଁ, ପାସ୍ପନି ନରନାୟି, ଇଲେତି ହାରେକା ମେରା ମାନୁଞ୍ଜି ଆହାଲି ହୁକୁମି ବେଟା ଆହାମାନେରି ।

^୫ ଏଦାଆଁତାକି ପାରୁସିୟାଁ ଅଡ଼େ ମେରାପୁନାରି ଜୀସୁଙ୍କ ଖେଚେରି, “ନୀ ସୀସୁୟାଁ ତଲିତି ଆକୁ ଆବାୟାଁ ମେରା ତଲେ ତାକାଆନା ଏନାଆଁତାକି କେସ୍ତା ନରଥାନା ତିନେରି?”

^୬ ଜୀସୁ ଏଝାରାଙ୍କ ଏଲେଇଚେସି, “ଆଡ଼େ କୁଟୁ ଗାଟାଡେରି, ମାହାପୁରୁ ଅଣପୁତି ବଳୁ ଖେହ୍ନି ଜିସାୟ ନେହଁ କିଁ ଇ କାତା ଖେସାମାନେସି, ଏନିକିଁ ରାସ୍କି ଆହାମାନେ;

ଇ କୁଡ଼ାତାରି ଖାରଇ ଗୁଡି ତଲେ ନାଜେଁ ସେବା କିୟାନେରି,

ସାମା ଏଝାରି ହିୟାଁ ନା ତାଣାଟିଏ ହାରେକା ହେକ ଡୟିନେ ।

୭ ଏଞ୍ଜାରି ମାଣ୍ଡସିୟାଁ କେପିତି ମୋରାତି ଦାମ୍ବୁତି ନେହଁ କାତା ଇଞ୍ଜଁ
ଜାପୁହାନା, ଉଜେଏ ନା ସେବା କିୟାନେରି ।

୮ ମୀରୁ ମାହାପୁରୁତି ହୁକୁମି ପିସାନା ମାଣ୍ଡସିୟାଁ ମୋରାତି
ଆସାମାଞ୍ଜେରି ।”

୯ ଅଡ଼େ ଜୀସୁ ଏଞ୍ଜାରାଇଁ ଏଲେଇଚେସି, “ମାହାପୁରୁତି ହୁକୁମି
ପିସାନା ମୀ ଜାପୁହାମାଞ୍ଜନାଣି ଆସାଲି ତାକି ମୀରୁ ହୁକୁମି ମାନି
କିହିହିଲଅଚେରି । ୧୦ ଇଚିହଁ ମସା ଏଲେଇଞ୍ଜା ମାନେସି, ‘ତାଲି
ତାଞ୍ଜିଇଁ ଜୀଞ୍ଜୁନଦୁ, ଇଞ୍ଜା ଆମ୍ବାଆସି ତାଲି କି ତାଞ୍ଜିଇଁ ବାକା ଇଚିନେସି,
ଏଞ୍ଜାସି ହାନି ତଣ୍ଡ ବେଗା ଆଚେନସି ।’ ୧୧ ମୀରୁ ଜାପୁହି ମାଞ୍ଜେରି,
‘ଆମ୍ବାଆସି ତାଲି କି ତାଞ୍ଜିଇଁ ଏଲେଇନେସି, ନା ତାଣ୍ଡାଟି ଏନାଆଁ
ହିୟାତିହଁ ନିଙ୍ଗେ ନେହେଁ ଆଚେମା, ଏଡ଼ି କର୍ବାନ ଇଚିହଁ
ମାହାପୁରୁ ତାକି ହେରପି ଆହାମାନାୟି । ୧୨ ଇଞ୍ଜା ମୀରୁ ଏଲେକିହଁ
ତାନି ଇୟା କି ଆବାଇଁ ଏଡ଼ି ସାଚେମି କିହାଲି ହାହି ହିଲଅଚେରି;
୧୩ ଏଲେକିହଁ ଏ ମୀରୁ ମୀ ତାଣ୍ଡା ମାନି ମୋରା ତଲେ ମାହାପୁରୁତି
ବଲୁ ଉଜେଏ କିହିମାଞ୍ଜେରି, ଇଞ୍ଜା ଏଲେକିହଁ ହାଚେରକା କାମା
କିହିମାଞ୍ଜେରି ।”

ମାଣ୍ଡସିଇଁ ଲାଗେଏ କିନାୟି

(ମାତି ୧୫:୧୦-୨୦)

୧୪ ଜୀସୁ ଅଡ଼େ ଝେଣ୍ଡେ ଲକୁଣି ତାଗେ ହାଟାନା ଏଞ୍ଜାରାଇଁ
ଏଲେଇଚେସି, “ମୀରୁ ବାରେ ନା କାତା ଝେଞ୍ଜୁ ଅଡ଼େ ତେଲହାଦୁ ।
୧୫ ମାଣ୍ଡସିତି ପାଙ୍ଗାତା ଇଲେତି ଏନାୟି ହିଲେଏ, ଏଡ଼ି ମାଣ୍ଡସି ବିତ୍ରା
ହଡାନା ଏଞ୍ଜାଣାଇଁ ଲାଗେଏ କିହାଲି ଆଡ଼ିନେ, ସାମା ଏନା ଏନାୟି
ମାଣ୍ଡସି ତାଣ୍ଡାଟି ହଡ଼ିମାନେ, ଏ ବାରେ ଏଞ୍ଜାଣାଇଁ ଲାଗେଏ କିହିମାନେ
।”* ୧୬ ଝେଞ୍ଜାଲି କୀକୀ ମାନାସି ଝେଣ୍ଡାସି ।

୧୭ ଅଡ଼େ ଏଞ୍ଜାସି ଲକୁ ତାଣ୍ଡାଟି ଇଲୁ ବିତ୍ରା ଝାହାଲିଏ ତାନି
ସୀସୁୟାଁ ଏଞ୍ଜାଣାଇଁ ପୁଣ୍ଡିକିନି କାତାତି ଅର୍ଡ଼ ଝେଚେରି । ୧୮ ଏମ୍ବାଟିଏ
ଜୀସୁ ଏଞ୍ଜାରାଇଁ ଏଲେଇଚେସି, “ମୀରୁ ଜିକେଏ ଏଲେକିହଁ ଏ
ପୁନାଆ ଗାଟାଚେରି ? ଏନାୟି ପାଙ୍ଗାଟି ମାଣ୍ଡସି ବିତ୍ରା ହଡ଼ିହଁ

* ୭:୧୫ ୭:୧୫ ଏଚେକା ସାସ୍ତେରିତା ୧୫ ପଦ ଜେଡ଼ ଡ଼ଇକା ମାନି ବଲୁତି ୧୬ ପଦୁତା
ରାସ୍ତକି ଆହାମାନେ;

ଏହି ଏଞ୍ଜାଣାଇଁ ଲାଗେଏ କିହାଲି ଆଡେଏ, ୧୯ ଇତିହାସ ଏହି ଏଞ୍ଜାଣି ହିୟାଁତା ହଡ଼ଆନା ବାଣ୍ଡିତା ହଡ଼ନେ ଇଞ୍ଜା ବାଣ୍ଡିହାନିଲେହେଁ ହଡ଼ାହାନେ ଇଲେଆହାଁ ବାରେ ରାନ୍ଦା ଅଡ଼ହି ଆହିମାନେ, ଇଦାଆଁ ପୁଞ୍ଜି ହିଲଅଡେରି ?”

୨୦ ଅଡ଼େ ଏଞ୍ଜାସି ଏଲେଇରେସି, “ଏନ୍ଦାୟି ମାଣ୍ଡସି ତାଣ୍ଡାଟି ହଡ଼ିମାନେ ଏହି ଏଞ୍ଜାଣାଇଁ ଲାଗେଏ କିହିମାନେ । ୨୧ ଇତିହାସ ମାଣ୍ଡସି ହିୟାଁ ବିତ୍ରାଟି ଲାଗେଏତି ଅଣ୍ଡପୁ ହନେ, ଦାରି କିୟାଲି, ସରୁ କିୟାଲି, ଲକୁଣି ପାୟିନାୟି, ୨୨ ଜୁପକା, ଲାଗେଏ ପଲେଏ କାମା, ନାଡ଼ିକିନାୟି, ତାହାରା, ନିନ୍ଦା କିନାୟି, ତାହାରା ଆନାୟି, କାରୁବି ଆନାୟି; ୨୩ ଏଲେତି ଲାଗେଏତାୟି ବିତ୍ରାଟି ହଡ଼ାଞ୍ଜାହାନା ମାଣ୍ଡସିଇଁ ଲାଗେଏ କିହିମାନେ ।”

ର ଇୟାନି ନାମୁ

(ମାତି ୧୫:୨୧-୨୮)

୨୪ ଏମ୍ବାଟିଏ ଜୀସୁ ଏ ଗାୟୁ ପିସାନା ସରତି ହାନ୍ଦି ଖାକି ହାରେସି, ଇଞ୍ଜା ର ଇଲୁତା ହଡ଼ାନା ଏନିକାଁ ଆମ୍ବାଆରି ପୁନଅରି ଇଞ୍ଜାଁ ଅଣ୍ଡପିମାରେସି, ସାମା ଏଞ୍ଜାସି ତୁରୁନା ତୁୟାଲି ଆଡ଼ାଆଡେସି । ୨୫ ଏ ଦେବୁଣିଏ ର ଇୟା, ଆମ୍ବାଆରି ମାଙ୍ଗାନି ବୃତୁ ଆଲଗାମାରେ, ଏହି ଜୀସୁ କାତା ଖେଞ୍ଜାନା ଖାହାଁ ଏଞ୍ଜାଣି କତାଣା ରାଡେ । ୨୬ ଏ ଇୟା ସୁରପୟିନିକି ଜାଡ଼ିତି ର ଗ୍ରିକ୍ ଇୟା ମାରେ, ତାନି ମାଙ୍ଗାନି ତାଣ୍ଡାଟି ବୃତୁ ପିସପି କିହାଲି ଏହି ଜୀସୁଇଁ ବାଡ଼ିମାଲିଡେ । ୨୭ ଏମ୍ବାଟିଏ ଜୀସୁ ଏଦାନି ଏଲେଇରେସି, “ତଲିଏ କକାରି ପଦାଁଣି ପାଞ୍ଜି କିଦୁ, ଇତିହାସ କକାରି ପଦାୟାଁ ରାନ୍ଦା ଅହାନା ନେସକା ନକିତା ମେଡନାୟି ନେହେଁ ଆଏ ।”

୨୮ ସାମା ଏହି ଏଞ୍ଜାଣାଇଁ ଏଲେଇରେ, “ହାଅ ପ୍ରବୁ ନେସକା ଜିକେଏ କକାରି ପଦାୟାଁ ତୁକହାମାନି ଲିତାଡି ପେରହା ତିନୁ ।”

୨୯ ଏମ୍ବାଟିଏ ଜୀସୁ ଏଲେଇରେସି, “ଇ କାତାତାକି ନୀ ମାଙ୍ଗାନି ତାଣ୍ଡାଟି ବୃତୁ ହଡ଼ା ହାରେୟିଏ, ହାଲାମୁ ।”

୩୦ ଇଞ୍ଜା ଏହି ଇଜ ହାଜାନା ତାନି ମାଙ୍ଗା ପାସ୍ପନିତା ହୁଞ୍ଜାମାନାଣି ଇଞ୍ଜା ବୃତୁ ହଡ଼ା ହାଜା ମାନାଣି ମେସ୍ତେ ।

ର ବେରା ଅଡ଼େ ଗୁଲାଇଁ ଜୀସୁ ନେହାଁ କିନାୟି

୩୧ ଅତ୍ତେ ଖେଣ୍ଡେ ଏଝାସି ସର ହାନ୍ଦିଟି ହାଜାନା ସିଦନ ଅତ୍ତେ ଦସଗଟା ନାସ୍‌କା† ହାନ୍ଦି ହୀହାନା ଗାଲିଲି ସାମ୍‌ଦୁରି ତାଗେ ଖାତେସି । ୩୨ ଇଞ୍ଜା ଲକୁ ର ବେରା ଅତ୍ତେ ଗୁଲାଇଁ ଏଝାଣି ନକିତା ତାଚାନା ଏଝାଣିଲାକ କେୟ୍ ଇଟାଲି ବାଡିମାଲିତେରି । ୩୩ ଜୀସୁ ଲକୁ ତାଣାଟି ରଅଣାଇଁଏ ଏଟ୍‌କା କିହା ଅହାନା ଏଝାଣି ରୀ କୀର୍କାଣା ତାନି ଖାସକା ଇଟିତେସି ଅତ୍ତେ ହୁପାନା ଏଝାଣି ଖେନ୍ଦରି ତୀଗିତେସି, ୩୪ ଅତ୍ତେ ଲାକପୁରୁ ଝାକି ସିନିକିହାନା ଗାଡିକିହିଁ ନେଞ୍ଜାନା ଏଝାଣାଇଁ ଏଲେଇଚେସି, “ଇପପତ” ଇଚିହିଁ “ଦେପି ଆମ୍ବୁ ।”

୩୫ ଏମ୍ବାଟିଏ ଏଝାଣି କୀର୍କା ଦେପିଆତୁ, ଇଞ୍ଜା ଖେନ୍ଦରିତି ଜାଲ୍ଲା ଏ ଦେବୁଣିଏ ଗୁଟାଆତେ, ଇଞ୍ଜା ଏଝାସି ନେହିଁକିଁ ଜଲ୍ଲାଲି ଆଡିତେସି । ୩୬ ଇଞ୍ଜା ଏ କାତା ଆମ୍ବାଆରାଇଁ ଖେହୁଆଦୁ ଇଞ୍ଜାଁ ଏଝାରାଇଁ ଗାଡିକିହିଁ ହୁକୁମି ହୀତେସି; ସାମା ଏଝାସି ଏଝାରାଇଁ ଏଚେକା କାହି କିତେସି, ଏଝାରି ଏଚେକା ଗାଡି ଖେକହେରି । ୩୭ ଅତ୍ତେ ଲକୁ କାବାଆହାନା ଏଲେଇଚେରି, “ଏଝାସି ବାରେ କାମା ନେହିଁକିଁ କିହିମାନେସି; ଏଝାସି ବେରାୟାଁଇଁ ଖେଞ୍ଜାଲି ଗୁଲାୟାଁଇଁ ଜଲିନି ବାଡୁୟ୍ ଜିକେଏ ହୀହିମାନେସି ।”

୮

ଜୀସୁ ସାରି ମାଣା ଲକୁକି ତିଞ୍ଜାଲି ହୀନାୟି (ମାତି ୧୫:୩୨-୩୯)

୧ ଏଚିବେଲା ହାରେକା ମାନ୍ଦା ଲକୁ ରୁଣ୍ଡା ଆତେରି, ଅତ୍ତେ ଏଝାରିତାଣା ତିନାୟି ଉନାୟି ଏନାୟି ହିଲାଆତାକି ଜୀସୁ ସୀସୁୟାଁଣି ତାଗେ ହାଟାନା ଏଝାରାଇଁ ଏଲେଇଚେସି, ୨ “ଲକୁତାକି ନାଙ୍ଗେ କାର୍ମା ହଟିମାଞ୍ଜାନେ, ଇଚିହିଁ ଇଝାରି ତାନିଦିନା ଆତେରିଏ ନା ତଲେ ମାଞ୍ଜାମାନେରି, ଅତ୍ତେ ଇଝାରି ତାଣା ଏନାୟି ତିନାୟି ହିଲେଏ । ୩ ଏଝାରାଇଁ ତୀହୁଆନା ପାଣ୍ଡିସାରେ, ଖେଣ୍ଡୁହାନାଟି ଏଝାରି ହାହା ଜିକେଏ ହାନେରି । ଏଝାରି ବିତ୍ରାଟି ଏଚରଜାଣା ହେକଟି ଝାହାମାନେରି ।”

† ୭:୩୧ ୭:୩୧ ଦେକାପଲି

୪ ସୀସୁୟାଁ ଏଞ୍ଜାଣାଙ୍କ ଏଲେଇଚେରି, “ଇମ୍ବୀଆଁ ଇ ଲକୁ ହିଲୀଆ ଚାୟୁତା ଆମ୍ବାଆସି ଆମ୍ବିଟି ରୁଟି ତାଚାନା ଇଞ୍ଜାରାଙ୍କ ପାଞ୍ଜି କିନେସି ?”

୫ ଜୀସୁ ଏଞ୍ଜାରାଙ୍କ ଖେଚେସି, “ମୀ ତାଣା ଏଚରଗଟା ରୁଟି ମାନୁ ?” ଏଞ୍ଜାରି ଏଲେଇଚେରି, “ସାତାଗଟା ।”

୬ ଏମ୍ବୀଟିଏ ଜୀସୁ ଲକୁଣି ବୁମିତା କୁଗାଲି ହୁକୁମି ହୀତେସି; ଅଡେ ଏଞ୍ଜାସି ସାତାଗାଟା ରୁଟି ଅହାନା ଜହରା କିହାନା ଏ ବାରେ ଡିକହାନା ବାଟି କିହାଲି ତାନି ସୀସୁୟାଁକି ହୀତେସି, ଅଡେ ଏଞ୍ଜାରି ଲକୁତାକି ବାଟି କିହା ହୀତେରି । ୭ ଇଞ୍ଜା ଏଞ୍ଜାରିତାଣା ଏଚରଗଟା ଡଣା ମୀଶକା ମାରୁ; ଏ ବାରେତି ଜିକେଏ ଜୀସୁ ମାହାପୁରୁ ତାଣା ଜହରା କିହାନା ବାଟି କିହା ହୀହାଲି ସୀସୁୟାଁଙ୍କ ଏଲେଇଚେସି । ୮ ଏମ୍ବୀଟିଏ ଏଞ୍ଜାରି ତିଞ୍ଜାନା ପାଞ୍ଜିତେରି ଇଞ୍ଜା ହାରିତାଣି ସାତା ତାଲି କୁଡି କିତେରି । ୯ ଏଞ୍ଜାରି ବାରେ ସାରି ମାଣା ଲକୁ ମାଚେରି । ଏଚେଟିଏ ତାୟୁ ଏଞ୍ଜାରାଙ୍କ ହେଲ ହୀତେସି, ୧୦ ଇଞ୍ଜା ଦେବୁଣିଏ ତାନି ସୀସୁୟାଁ ତଲେ ତଂଗତା ହଚାନା ଦଲ୍‌ମନୁ ଗାଡାତା ହାଚେରି ।

ପାରୁସିୟାଁ ସିନା ରୀହ୍‌ନାୟି

(ମାତି ୧୭:୧-୪)

୧୧ *ତାୟୁ ପାରୁସିୟାଁ ଖାହାନା ଜୀସୁତଲେ ବାଦିବାଦା କିହାଲି ମାଟ୍‌ହେରି ଇଞ୍ଜା ଏଞ୍ଜାଣାଙ୍କ ତାୟିପାରି କିହାଲିତାକି ହାଗୁ ଲାକଟି ର ସିନା ରୀସ୍ତେରି । ୧୨ *ଜୀସୁ ଜୀସୁତା କିଲିବିଲି ଆହାନା ଗାଡି ନେଞ୍ଜାନା ଖେସ୍ତେସି, “ଇ ଜୁଗୁଡି ଲକୁ ଏନାଆଁତାକି ସିନା ପାରିମାନେରି ? ନାନୁ ମିଜେ ସାତା ଖେସିମାଞ୍ଜାଇ, ନୀଏତି ମାଣ୍‌ସିକି ଏନି ସିନା ହୀପ୍‌କି ଆଏ ।”

୧୩ ଅଡେ ଏଞ୍ଜାସି ଏଞ୍ଜାରାଙ୍କ ପିସାନା ଅଡେ ଖେଣ୍ଡେ ତଂଗତା ହଚାନା ଆତାଲାଞ୍ଜାକି ହାଚେସି ।

ହେରଦ ଅଡେ ପାରୁସିୟାଁ ପୂଲାଗୁଣ୍ଡା

(ମାତି ୧୭:୫-୧୨)

୧୪ ଏଚିବେଲାତା ସୀସୁୟାଁ ରୁଟି ଅହାଲି ବାଣାଆଡେରି; ତଂଗତା ଏଞ୍ଜାରିତାଣା ରଣ୍ଡିଏ ରୁଟି ମାଚେ । ୧୫ *ତାୟୁ ଜୀସୁ ଏଞ୍ଜାରାଙ୍କ

☆ ୮:୧୧ ୮:୧୧ ମାତି ୧୭:୩୮; ଲୁକ ୧୧:୧୭ ☆ ୮:୧୨ ୮:୧୨ ମାତି ୧୭:୩୯; ଲୁକ ୧୧:୨୯
☆ ୮:୧୫ ୮:୧୫ ଲୁକ ୧୨:୧

ଜାଣେ ହୁକୁମୀ ହୀତେସି, “ଜାଗ୍ରାତା ଆଦୁ, ପାରୁସିୟାଁ ଅଡ଼େ ହେରଦତି ପୂଲ୍ଲାରୁଣ୍ଡାଟି ଜାଗ୍ରାତା ଆହାନା ମାଞ୍ଜୁ ।”

୧୭ ଏଚେଟିଏ ଏଞ୍ଜାରି ତାମ୍ବୁ ତାମ୍ବୁସୁ ଖେସ୍ପିଆହୁଁ ଏଲେଇଞ୍ଜାଲି ମାଟ୍‌ହେରି, “ମା ତାଣା ରୁଟି ହିଲେଏ ଇଞ୍ଜୁଁ ଏଞ୍ଜାସି ମାଙ୍ଗେ ଏଲେଇଞ୍ଜିମାଞ୍ଜାନେସି ।”

୧୮ ଜୀସୁ ଏଦାଆଁ ପୁଞ୍ଜାନା ଏଞ୍ଜାରାଇଁ ଏଲେଇଚେସି, “ମୀ ତାଣା ରୁଟି ହିଲେଏ ଇଞ୍ଜୁଁ ଏନାଆଁତାକି ମୀରୁ ମୀରୁ ଖେସ୍ପି ଆହିମାଞ୍ଜେରି ? ମୀରୁ ନୀଏଁ ପାତେକା ପୁଞ୍ଜି ହିଲଅତେରି କି ତେଲ୍‌ହି ହିଲଅତେରି ? ୧୮ *କାଣ୍‌କା ମାଞ୍ଜାନା ମେସି ହିଲଅତେରି ? ଅଡ଼େ, କୀର୍କା ମାଞ୍ଜାନା ଖେଞ୍ଜି ହିଲଅତେରି ? ମୀରୁ ଇଦାଣି ଅଣପି ହିଲଅତେରି ? ୧୯ ଏ ପାସାମାଣା ଲକ୍ଷୁ ବିତ୍ରା ନାନୁ ଏଚିବେଲ୍ଲା ପାସାଗଟା ରୁଟି ଡିକ୍‌ହା ମାଚେଏଁ, ଏଚିବେଲ୍ଲା ମୀରୁ ଏଚର ତାଲି ହାରିତାଣି କୁଡ଼ି କିତେରି, ଏଦି ମୀ ଅଣ୍‌ପୁତା ହିଲେଏ କି ?” ଏଞ୍ଜାରି ଏଞ୍ଜାଣାଇଁ ଏଲେଇଚେସି, “ବାର ତାଲି ।”

୨୦ “ଅଡ଼େ ଏ ସାରି ମାଣା ଲକ୍ଷୁ ବିତ୍ରା ନାନୁ ଏଚିବେଲ୍ଲା ସାତାଗଟା ରୁଟି ଡିକ୍‌ହା ମାଚେଏଁ, ଏଚିବେଲ୍ଲା ମୀରୁ ଏଚର ତାଲି କୁଡ଼ି କିହାମାଚେରି ?” ଏଞ୍ଜାରି ଏଲେଇଚେସି, “ସାତା ତାଲି ।”

୨୧ ଏଚିବେଲ୍ଲା ଜୀସୁ ଏଞ୍ଜାରାଇଁ ଏଲେଇଚେସି, “ମୀରୁ ଏନାଆଁ ନୀଏଁ ପାତେକା ତେଲ୍‌ହାଲି ଆଡ଼ିହିଲଅତେରି ?”

ବେତ୍‌ସାୟିଦାତା ର କାଣାଇଁ ମେସ୍‌ପିକିନାୟି

୨୨ ତାମ୍ବୁ ଏଞ୍ଜାରି ବେତ୍‌ସାୟିଦାତା ଖାଡ଼େରି, ଅଡ଼େ, ଲକ୍ଷୁ ର କାଣାଇଁ ଏଞ୍ଜାଣି ତାଣା ତାଚାନା ଏଞ୍ଜାଣାଇଁ ତାଗାଲି ତାକି ଜୀସୁଇଁ ବାଡ଼ିମାଲିତେରି । ୨୩ ଏଦାଆଁତାକି ଜୀସୁ କାଣାତି କେନ୍ଦୁ ଆସାନା ଏଞ୍ଜାଣାଇଁ ନାୟୁଁ ପାଙ୍ଗାତା ଅଡ଼େସି, ଇଞ୍ଜା ଏଞ୍ଜାଣି କାଣ୍‌କାଣାଁ ହୁପ୍‌କା ରୁବାନା ଅଡ଼େ ଏଞ୍ଜାଣିଲକ୍ କେନ୍ଦୁ ଇଟାନା ଏଞ୍ଜାଣାଇଁ ଖେଚେସି, “ନୀନୁ ଏନାଆଁ ମେସାଲି ଆଡ଼ିମାଞ୍ଜି କି ?”

* ୮:୧୮ ୮:୧୮ ମାର୍କ ୪:୧୭

୨୪ ଏଞ୍ଜେଲ୍ ସିନିକିହାନା ଏଲେଇରେସି, “ନାନୁ ମାଣ୍ଡିୟାଁଇଁ ମେସିମାଇଁ, ଇଚିହିଁ ନାନୁ ମାର୍କା ଲେହେଁ ଏନାଇ ତାକି ମାନାଣି ମେସିମାଇଁ ।”

୨୫ ତାୟୁ ଜୀସୁ ଅଡ଼େ ଖେଶ୍ଟେ ଏଞ୍ଜାଣି କାଣକାଣାଁ କେୟୁ ଇଚିତେସି; ଏମ୍ବାଟିଏ ଏଞ୍ଜାସି ନେହିଁ କିଁ ମେସାଲି ଆଡ଼ିତେସି, ନେହିଁ ଆହାନା ବାରେ ତାରିତଲେ ସିନିକିହାଲି ମାଟ୍‌ହେସି । ୨୬ ତାୟୁ ଜୀସୁ ଏଞ୍ଜାଣାଇଁ ତାନି ଇଜ ପାଣ୍ଡାନା ଏଲେଇରେସି, “ଏ ନାୟୁଁ ବିତ୍ରା ଜିକେଏ ଖେଶ୍ଟେ ହାଲାଆନି ।”

ପିତର ଜୀସୁଇଁ କ୍ରୀସ୍ତ ଇଞ୍ଜିଁ ଝେକ୍‌ନାୟି
(ମାତି ୧୭:୧୩-୨୦; ଲୁକ ୯:୧୮-୨୧)

୨୭ ଏଚେଟିଏ ଜୀସୁ ଅଡ଼େ ତାନି ସୀସୁୟାଁ କାୟିସରିୟା ପିଲିପି ରାଜିତି ନାୟକାଞ୍ଜାକି ହାଚେରି, ଅଡ଼େ ଜିରୁତା ଏଞ୍ଜାସି ତାନି ସୀସୁୟାଁଇଁ ଝେଚେସି, “ନାନୁ ଆମ୍ବାଆତେଏଁ ଇଞ୍ଜିଁ ଲକୁ ଏଲେଇଞ୍ଜି ମାଞ୍ଜାନେରି ?”

୨୮ ☆ଏମ୍ବାଟିଏ ଏଞ୍ଜାରି ଏଞ୍ଜାଣାଇଁ ଏଲେଇଚେରି, “ବାପ୍ତିସ୍ତା* ହାନି ଜହନ, ଅଡ଼େ ଆମ୍ବା ଆମ୍ବାଆରି ଏଲିୟ, ସାମା ଆମ୍ବା ଆମ୍ବାଆରି ଏଲେଇଞ୍ଜି ମାଞ୍ଜାନେରି ମାହାପୁରୁ ଅଶ୍‌ପୁତି ବଲୁ ଝେହ୍‌ନାରି ବିତ୍ରାଟି ରଅସି ।”

୨୯ ☆ଏଞ୍ଜାସି ଏଞ୍ଜାରାଇଁ ଝେଚେସି, “ସାମା ନାନୁ ଆମ୍ବାଆତେଏଁ ଇଞ୍ଜିଁ ମୀରୁ ଏଲେଇଞ୍ଜି ମାଞ୍ଜାଦେରି ?” ପିତର ଏଞ୍ଜାଣାଇଁ ଏଲେଇଚେସି, “ନାନୁ କ୍ରୀସ୍ତି ।”

୩୦ ଏମ୍ବାଟିଏ ଜୀସୁ ଏଞ୍ଜାରାଇଁ ତାନି କାତାତି ଆମ୍ବାଆରାଇଁ ଏନାଆଁ ଝେହ୍‌ଆଦୁ ଇଞ୍ଜିଁ ଜାଣେ କିହିଁ ହୁକୁମି ହୀତେସି ।

ଜୀସୁ ତାନି ଦୁକୁ ଇଞ୍ଜା ତଣ୍ଡ ପାଣ୍ଡନି କାତା ଝେହ୍‌ନାୟି
(ମାତି ୧୭:୨୧-୨୮; ଲୁକ ୯:୨୨-୨୭)

୩୧ ଅଡ଼େ, ଜୀସୁ ଏଞ୍ଜାରାଇଁ ଜାପ୍‌ହାଲି ମାଟ୍‌ହେସି, “ଇଚିହିଁ ମାଣ୍ଡିସି ମୀରଏସି ହାରେକା ଦୁକୁ କସ୍ତ ବେଟାଆନାୟି ମାନେ ଇଞ୍ଜା ପ୍ରାଟିନାଙ୍ଗା, କାଜା ପୂଜେରାଙ୍ଗା, ଇଞ୍ଜା ମେରାପୁନାରି ତାଣ୍ଡାଟି

☆ ୮:୨୮ ୮:୨୮ ମାର୍କ ୭:୧୪,୧୫; ଲୁକ ୯:୭,୮ * ୮:୨୮ ୮:୨୮ ମୁଞ୍ଜନାୟି ☆ ୮:୨୯ ୮:୨୯ ଜହ ୭:୨୮,୨୯

ଅପାଆଗାଗାସି ଆହାନା ପାୟୁଞ୍ଜି ଆନାୟି ମାନେ, ଅଡ଼େ ତାନିଦିନା ଜେତ ଖେଣ୍ଡେ ନିଜିନାୟି ମାନେ ।” ୩୨ ଈ କାତା ଏଞ୍ଜାସି ତୀରପୁତଲେ ଖେସ୍ତେସି । ଏମ୍ବାଟିଏ ପିତର ଏଞ୍ଜାଣାଇଁ ଅରଞ୍ଜାକି ଅହାନା ଦାକା ହୀହାନା ଲାଗାଲି ମାଟ୍‌ହେସି । ୩୩ ସାମା ଏଞ୍ଜାସି ତାୟୁଞ୍ଜାକି ତିରଞ୍ଜାହାଁ ତାନି ସୀୟୁୟାଁସି ସିନିକିହାନା ପିତରଇଁ ଦାକା ହୀହାନା ଏଲେଇରେସି, “ସୟତାନ, ନା ନକିଟି ହେକ ହାଲାମ୍, ଇଟିହିଁ ନୀନୁ ମାହାପୁରୁ କାତା ଅଣ୍ପାଆନା ମାଣ୍‌ସିୟାଁ କାତା ଅଣ୍ପିମାଞ୍ଜି ।”

୩୪ ☆ଏମ୍ବାଟିଏ ଜୀସୁ ତାନି ସୀୟୁୟାଁ ତଲେ ଲକୁଣି ହାଟାନା ଏଲେଇରେସି, “ଆମ୍ବାଆସି ନା ଜେତ ଖାହାଲି ମନ କିନେସି, ଆତିହିଁ ଏଞ୍ଜାସି ଜାହାରାଇଁ ପସ୍‌ପେସି, ଇଞ୍ଜା ଏଞ୍ଜାସି ତାନି କ୍ରସ ଡେକାନା ନା ଜେତ ଖାପେସି । ୩୫ ☆ଇଟିହିଁ ଆମ୍ବାଆସି ତାନି ଜୀଞ୍ଜୁ ଗେଲପାଲି ମନ କିନେସି, ଏଞ୍ଜାସି ଏଦାଆଁ ହାଞ୍ଜି କିନେସି; ସାମା ଆମ୍ବାଆସି ନା ତାକି ଇଞ୍ଜା ନେହିଁ କାରୁତାକି ତାନି ଜୀଞ୍ଜୁ ହୀନେସି, ଏଞ୍ଜାସି ଏଦାଆଁ ନୀଟ୍‌ନେସି । ୩୬ ଅଡ଼େ, ମାଣ୍‌ସି ଈ ଦାର୍‌ତିତା ମାନାଣି ବାରେ ମେଡ଼ି କିହାନା ତାନି ଜୀଞ୍ଜୁତି ହାଞ୍ଜି କିନେସି, ଆତିହିଁ ଏଞ୍ଜାଣାକି ଏନ୍‌ଲିବା ? ୩୭ ଅଡ଼େ, ମାଣ୍‌ସି ତାନି ଜୀଞ୍ଜୁତି ବାଦୁଲି ଏନାଆଁ ହୀହାଲି ଆଡ଼ିନେସି ? ୩୮ ଏଦାଆଁତାକି ଆମ୍ବାଆସି ଈ କାଲାତି ଦାରି କିନାରି ଅଡ଼େ ପାପୁଗାଟି ଲକୁ ବିତ୍ରା ନାଞ୍ଜେ ଅଡ଼େ ନା ବଲୁ ତାକି ଲାଜା ଆନେସି, ମାଣ୍‌ସି ମୀର୍‌ଏସି ଏଟିବେଲା ସୁଦୁ ଦୁତୁୟାଁ ତଲେ ତାନି ଆବାତି ଗାଞ୍ଜୁରମି ତଲେ ଖାନେସି, ଏଟିବେଲା ଏଞ୍ଜାସି ଜିକେଏ ଏଞ୍ଜାଣି କାତାତାକି ଲାଜା ଆନେସି ।”

୯

୧ ଅଡ଼େ ଜୀସୁ ତାନି ସୀୟୁଣି ଏଲେଇରେସି, “ନୀନୁ ମିଙ୍ଗେ ସାତା ଖେସିମାଞ୍ଜାଇଁ, ଇମ୍ବାଆଁ ଏତରଜାଣା ମାନେରି ମାହାପୁରୁତି ରାଜି ବାଡ଼ୁୟୁ ତଲେ ଖାନାଣି ମେହ୍‌ଆ ପାତେକା ହାଅରି ।”

ଜୀସୁ ଅର ଖାଣା ଆନାୟି
(ମାତି ୧୭:୧-୧୩; ଲୁକ ୯:୨୮-୩୨)

☆ ୮:୩୪ ୮:୩୪ ମାତି ୧୦:୩୮; ଲୁକ ୧୪:୨୭ ☆ ୮:୩୫ ୮:୩୫ ମାତି ୧୦:୩୯; ଲୁକ ୧୭:୩୩; ଜହ ୧୨:୨୫

୨ ✨ ସ ଦିନା ତାମ୍ବୁ ଜୀସୁ ଖାର୍‌ଇ ପିତର, ଜାକୁବ ଅଡ଼େ ଜହନଇଁ ତାନିତଲେ ଏଟକା କିହାନା ଏଝାରାଇଁ ର ପାତାଆଡ଼ି ହରୁତା ଅଡ଼େସି । । ୩ ଅଡ଼େ ଏଝାସି ଏଝାରି ନକିତା ଅର ଖାଣା ଆଡ଼େସି, ଏଝାଣି ହିମ୍ବରି ଇଲେକିଁ ଉଜେଡ଼ି ଆହାନା ହାରେକା ଦବ୍‌ଲା ଆଡ଼େ, ଇ ଦାରତିତା ଆମ୍ବାଆସି ଏଲେତି ଦବ୍‌ଲା କିହାଲି ଆଡ଼ଅସି । ୪ ମସା ଅଡ଼େ ଏଲିୟ ଜୀସୁତଲେ ହାଡ଼ାକାତା ଆହିମାଚାଣି ତାନି ଜାଣା ସୀସୁୟାଁ ମେସ୍ତେରି । ୫ ଏମ୍ବାଟିଏ ପିତର ଜୀସୁଇଁ ଏଲେଇଚେସି, “ଏ ରୁରୁ ମାର ଇ ଟାମ୍ବୁତା ମାନାୟି ହାରେକା ନେହାୟି; ମାର ତାନିଗଟା ଗୁଡ଼ାୟାଁ କେପିନ, ନିଜେତାକି ରଣ୍ଡାଆଁ, ମସାକି ରଣ୍ଡାଆଁ ଅଡ଼େ ଏଲିୟକି ରଣ୍ଡାଆଁ ।” ୬ ପିତର ଏନାଆଁ ଜଲ୍ଲାଲି ଆନେ ଇଞ୍ଜିଁ ପୁଞ୍ଜା ହିଲାଆଡେସି, ଏନାଆଁତାକି ଇଚିହିଁ ଏଝାରି ହାରେକା ଆଜାମାଚେରି ।

୭ ✨ ଇଞ୍ଜା, ଇଚାୟି ଦୁନ୍ଦ୍ରା ଖାହାନା ଏଝାରାଇଁ ପ୍ରିକ୍‌ହେ, ଅଡ଼େ ଏ ଦୁନ୍ଦ୍ରାଟି ଇ ହାଡ଼ା ଖାଡ଼େ, “ଇଝାସି ନା ଜୀଝୁତି ମୀରଏସି, ଇଝାଣି ବଲ୍ଲୁ ଖେଞ୍ଜୁ ।” ୮ ଦେବୁଣିଏ ଏଝାରି ସାରିଝାକି ସିନିକିତେରି, ତାନିତଲେ ଜୀସୁଇଁ ପିସ୍‌ପେ ଆମ୍ବାଆରାଇଁ ମେହ୍‌ଆଡେରି ।

୯ ଏଝାରି ହରୁଟି ରେଚା ଖାହି ମାଚାଟି ଜୀସୁ ଏଝାରାଇଁ ଜାଣ୍ଡେ ହୁକୁମି ହୀହାନା ଏଲେଇଚେସି, “ମୀରୁ ଏନାଆଁ ମେସାମାଞ୍ଜେରି, ଏ ବାରେ ହାଡ଼ାରି ବିତ୍ରାଟି ମାଣସି ମୀରଏସି ଖେଣ୍ଡେ ନିଜାଆ ପାଡେକା ଆମ୍ବାଆରାଇଁ ଖେହ୍‌ଆଦୁ ।”

୧୦ ଏମ୍ବାଟିଏ ଏଝାରି ଏ କାତା ଆସାନା “ହାଡ଼ାରି ବିତ୍ରାଟି ଖେଣ୍ଡେ ନିଜାମାୟି ଏନାୟି ?” ଏ କାତାତି ତାନି ବିତ୍ରା ଖେସ୍‌ପି ଆଡ଼େରି । ୧୧ ✨ ଅଡ଼େ ଏଝାରି ଜୀସୁଇଁ ଖେଚେରି, “ନକେଏ ଏଲିୟ ଖାନାୟି ଆନେ, ମେରାପୁନାରି ଏନିକିଁ ଇ କାତା ଖେହ୍‌ନେରି ?”

୧୨ ଏମ୍ବାଟିଏ ଜୀସୁ ଏଝାରାଇଁ ଏଲେଇଚେସି, “ଏଲିୟ ନକେଏ ଖାହାନା ବାରେ ମେରା ଅଡ଼େ ଖେଣ୍ଡେ ଇଚିନାୟି ସାତା, ସାମା ମାଣସି ମୀରଏସି ହାରେକା ଦୁକୁ ବେଟାଆହାନା ଅପାଆଗାଟାସି ଆନେସି, ଇଦି ଏନିକିଁ ଏଝାଣି କାତା ରାସ୍‌କି ଆହାମାନେ ? ୧୩ ସାମା

✨ ୯:୨ ୯:୨ ୨ପିତ ୧:୧୭,୧୮ ✨ ୯:୭ ୯:୭ ମାତି ୩:୧୭; ମାର୍କ ୧:୧୧; ଲୁକ ୩:୨୨
 ✨ ୯:୧୧ ୯:୧୧ ମାତି ୧୧:୧୪

ନାନୁ ମିଙ୍ଗେ ଖେସିମାଞ୍ଜାଇଁ, ଏଲିୟ ଖାତେସିଏ, ଅଡ଼େ ଏଞ୍ଜାଣି କାତା ଏନିକିଁ ରାସ୍‌କି ଆହାମାନେ, ଏଲେକିହିଁ ଏଞ୍ଜାରି ଏଞ୍ଜାଣାଇଁ ଜିକେଏ ଏନାଆଁ ମନ ଏଦାଆଁ କିହାମାନେରି ।”

ବୁଡୁ ଆଲଗାମାଟି କକାଣାଇଁ ନେହିଁ କିନାୟି
(ମାତି ୧୭:୧୪-୨୧; ଲୁକ ୯:୩୭-୪୩)

୧୪ ତାୟୁ ଏଞ୍ଜାରି ସୀସୁୟାଁ ତାଣା ଖାହାନା ମେସ୍ତେରି, ଏଞ୍ଜାରି ସାରିଞ୍ଜାକି ହାରେକା ମାନ୍ଦା ଲକୁ ଅଡ଼େ ମେରାପୁନାରି ଏଞ୍ଜାରିତଲେ ବାଦିବାଦା ଆହିମାନେରି । ୧୫ ଲକୁ ବାରେ ଏଞ୍ଜାଣାଇଁ ମେସ୍‌ପନିଏ ହାରେକା କାବାଆହାନା ଅଡ଼େ ଦାବ୍‌ଡି ଖାହାନା ଜହରା କିତେରି । ୧୬ ଏମ୍ବାଟିଏ ଜୀସୁ ଏଞ୍ଜାରାଇଁ ଖେଚେସି, “ମୀରୁ ଏଞ୍ଜାରିତଲେ ଏନାଆଁତାକି ବାଦିବାଦା ଆହିମାଞ୍ଜେରି ?”

୧୭ ଲକୁ ବିତ୍ରାଟି ରଅସି ଏଞ୍ଜାଣାଇଁ ଏଲେଇଚେସି, “ଏ ଗୁରୁ, ନାନୁ ନା ମୀରୁଏଣାଇଁ ନୀ ତାଣା ତାତାମାଚେସି; ଏଞ୍ଜାଣାଇଁ ର ଗୁଲ୍ଲା ବୁଡୁ ଆଲଗାମାନେ । ୧୮ ଏମିନି ଚାୟୁତା ଏଦି ଏଞ୍ଜାଣାଇଁ ଆହନେ, ଏଞ୍ଜାଣାଇଁ ଡ଼ଇ ଡ଼କ୍‌ନେ, ଇଞ୍ଜାଁ ଏଞ୍ଜାଣି ଗୁଡିଟି ପମ୍‌ଲି ହନେ, ଅଡ଼େ ଏଦି ପାଲକା ଟୀଟି କିନେ, ଇଞ୍ଜାଁ ଏଞ୍ଜାସି ଖାୟାହାଜି ମାନେସି; ଏଞ୍ଜାଣାଇଁ ପିସ୍‌ପି କିହାଲି ନାନୁ ନୀ ସୀସୁୟାଁଇଁ ଏଲେଇଚେସି, ସାମା ଏଞ୍ଜାରି ଆଡାଆଚେରି ।” ୧୯ ଜୀସୁ ଏଞ୍ଜାରାଇଁ ଏଲେଇଚେସି, “ଆଡେ ନାମାଆଗାଟି କୁଡାତାଚେରି, ଏଚରଦିନା ନାନୁ ମୀ ତଲେ ଡ଼ୟିଇଁ ? ଏଚରଦିନା ମୀ ଲେମ୍‌ମାନାଣି ଅରୁହିଇଁ ? କକାଣାଇଁ ନା ତାଣା ତାଦୁ ।” ୨୦ ଏମ୍ବାଟିଏ ଏଞ୍ଜାଣାଇଁ ଜୀସୁ ତାଣା ତାଚେରି । ଅଡ଼େ, ଜୀସୁଇଁ ମେସ୍‌ପନିଏ ଏ ବୁଡୁ ଏଞ୍ଜାଣାଇଁ ହାରେକା ତିରୁଞ୍ଜି କିତେ ଇଞ୍ଜାଁ ବୁମିତା ତରଗାନା ଗୁଡିଟି ପମ୍‌ଲି ହପ୍‌ହାନା ଡ଼ସାଲି ମାଟ୍‌ହେସି । ୨୧ ଏଚିବେଲ୍ଲା ଜୀସୁ ତାନି ଆବାଇଁ ଖେଚେସି, “ଏଚରଦିନା ଆଡେ ଇଞ୍ଜାଣାଇଁ ଇଲେ କିହିମାନେ ?” ଏଞ୍ଜାସି ଏଲେଇଚେସି, “ଡ଼ଣା ଖେଡାଟିଏ ୨୨ ଏଦି ଏଞ୍ଜାଣାଇଁ ହାଞ୍ଜି କିହାଲି ଏଚେ ଏଚେତା ହିରୁତା ଅଡ଼େ ଏୟୁଣାଁ ମେଡ଼ହାମାନେ; ସାମା ନାନୁ ଏନାଆଁ କିହାଲି ଆଡିତ୍ତି, ମାଙ୍ଗେ କାର୍ମା ଆହାନା ମା ସାୟେମି ଆୟାମୁ ।”

୨୩ ଏମ୍ବାଟିଏ ଜୀସୁ ଏଝାଣାଇଁ ଏଲେଇରେସି, “ଏନାଆଁ ଇତି ? ଇତିହିଁ କିହାଲି ଆଡ଼ିତହିଁ ! ଆମ୍ବାଆସି ନାମିନେସି ଏଝାଣାକି ବାରେଏ ଆନେ ।”

୨୪ ଏ ଦେବୁଣିଏ କକାଣି ତାମି ଆବା କାଜା ଗିୟାତଲେ ଏଲେଇରେସି, “ନାନୁ ନାମିମାଇଁ ନା ନାମାଆଗାଟାଣି ଗୁଟି କିହାଲି ସାୟେମି କିୟାମୁ ।”

୨୫ ତାୟୁ ମାନ୍ଦା ଲକୁ ରହେଁଏ ହଟିହିଁ ଝାହି ମାଟାଣି ମେସାନା, ଜୀସୁ ଏ ପଲୁଆ ବୁଡୁତି ଦାକା ହାହାନା ଏଲେଇରେସି, “ଆଡେ ଗୁଲ୍ଲା ଅଡେ ବେରା ବୁଡୁତି, ନାନୁ ନିଞ୍ଜେ ହୁକୁମି ହାହିମାଞ୍ଜାଇଁ, ଇଝାଣି ତାଣାଟି ହଟାହାଲାମୁ, ଇଞ୍ଜା ଏରେଲା ଜିକେଏ ଇଝାଣି ତାଣା ହଡ଼ଆନି ।”

୨୬ ଏମ୍ବାଟିଏ ଏଦି ହାରେକା କିରଡ଼ିହିଁ କକାଣାଇଁ ତିରୁଝି କିହାନା ବୁମିତା ତ୍ରକହାନା ହଟାହାରେ, ଅଡେ କକାସି ହାଡ଼ିଲେହେଁ ଆଡେସି, ଇଲେକିହିଁ ହାରେକା ଲକୁ ଏଲେଇଞ୍ଜିମାରେରି, “କକାସି ହାଡେସି ।” ୨୭ ସାମା ଜୀସୁ ଏଝାଣି କେୟୁ ଆସାନା ନିକହେସି, ଇଞ୍ଜା ଏଝାସି ନିତେସି ।

୨୮ ଇଞ୍ଜା ଜୀସୁ ଇଜ ଝାହାଲିଏ ତାନି ସାସୁୟା ମେଣେଏ ଝେରେରି, “ମାମ୍ବୁ ଏନାଆଁତାକି ଏଝାଣାଇଁ ପିସ୍ପି କିହାଲି ଆଡାଆତମି ?”

୨୯ ଜୀସୁ ଏଝାରାଇଁ ଏଲେଇରେସି, “ପ୍ରାଡାନା* କିଆନା ଅଡେ ଏନିକହିଁ ଜିକେଏ ଇଲେତି ବୁଡୁ ପେର୍ହାଲି ଆଡାଆୟି ।”

ତାନି ହାକିତି କାରୁ ଅଡେ ଝେଣ୍ଡେ ଝେହ୍ନାୟି

(ମାତି ୧୭:୨୨-୨୩; ଲୁକ ୯:୪୩-୪୫)

୩୦ ଏଝାରି ଏ ଟାୟୁଟି ହାଜାନା ଗାଲିଲି ମାଦିଟି ହାରେରି, ଇଞ୍ଜା ଆମ୍ବାଆସି ପୁନାଆପେସି ଇଞ୍ଜା ଏଝାଣି ମନ ହିଲାଆତେ; ୩୧ ଇତିହିଁ ଜୀସୁ ତାନି ସାସୁୟାଣି ଇ କାତା ଝେସିହିଁ ଜାପୁହି ମାରେସି, “ମାଣ୍ଡସି ମାର୍‌ସି ମାଣ୍‌ସିୟା କେୟୁତା ହେର୍ପିଆନେସି, ଅଡେ ଏଝାରି ଏଝାଣାଇଁ ପାୟିନେରି, ଇଞ୍ଜା ଏଝାସି ହାଡ଼ି ତାୟୁ ତାନିଦିନା ଜେଟ ଝେଣ୍ଡେ ନିଜିନେସି ।”

* ୯:୨୯ ୯:୨୯ ଏରେକା ସାସ୍ପେରିତା ପ୍ରାଡାନା ଇଞ୍ଜା ଉପାସା ରାସ୍‌କି ଆହାମାନେ ।

୩୨ ସାମା ଏଞ୍ଜାରି ଏ କାତାତି ତେଲ୍‌ହାଆତେରି, ସାମା ଏଞ୍ଜାଣାକ୍ ଝେଞ୍ଜାଲି ଆଜିମାଚେରି ।

ଆମ୍ବାଆସି କାଜସି

(ମାତି ୧୮:୧-୫; ଲୁକ ୯:୪୭-୪୮)

୩୩ ତାୟ୍ ଏଞ୍ଜାରି କପରନାହୁମତା ଖାତେରି । ଜାସୁ ଇଜ ଏଜାନା ସୀସୁୟାଣି ଝେଚେସି, “ମୀରୁ ଜିରୁତା ଏନାଆଁ କାତା ଆହିମାଚେରି ?”

୩୪ ☆ସାମା ଏଞ୍ଜାରି ହାଡ଼ା ଆଆନା ପାଲେଏ ଡ଼ୟିତେରି, ଇଚିହିଁ ଆମ୍ବାଆସି କାଜସି ଇ କାତା ଆସାନା ଜିରୁତା କାତା ଆହିମାଚେରି ।

୩୫ ☆ଏମ୍ବାଟିଏ ଜାସୁ କୁଗାନା ବାର ଜାଣାକ୍ ହାଡ଼ିତେସି ଇଞ୍ଜା ଏଞ୍ଜାରାକ୍ ଏଲେଇଚେସି, “ଇଚିହିଁ ଆମ୍ବାଆସି କାଜସି ଆହାଲି ମନ କିନେସି,

ଆତିହିଁ ଏଞ୍ଜାସି ବାରେତି କିହା ଉଣା ଅଡ଼େ ବାରେତି ସେବା କିନାସି ଆପେସି ।” ୩୬ ଅଡ଼େ ଏଞ୍ଜାସି ର ଉଣା କକାଣାକ୍ ଅହାନା ଏଞ୍ଜାରି ମାଦି ନିପ୍‌ହେସି ଇଞ୍ଜା ଏଞ୍ଜାଣାକ୍ ପମାନା ଏଞ୍ଜାରାକ୍ ଏଲେଇଚେସି,

୩୭ ☆“ଆମ୍ବାଆସି ନା ଦରୁ ତାକି ଇଲେତି ଉଣା କକାରି ବିତ୍ରାଟି ରଅଣାକ୍ ଆବିନେସି, ଏଞ୍ଜାସି ନାଙ୍ଗେ ଆବାନେସି; ଅଡ଼େ ଆମ୍ବାଆସି ନାଙ୍ଗେ ଆବାନେସି, ଏଞ୍ଜାସି ଖାରୁଇ ନାଙ୍ଗେ ଆବଅସି, ସାମା ନାଙ୍ଗେ ପାଣ୍ଡାତାଣାକ୍ ଜିକେଏ ଆବିନେସି ।”

ମା କପାଟି ନିଙ୍ଗାଆ ଗାଟାସି ମା ତଲେତାସି

(ଲୁକ ୯:୪୯-୫୦)

୩୮ ଜହନ ଏଞ୍ଜାଣାକ୍ ଏଲେଇଚେସି, “ଏ ଗୁରୁ ମା ଗତିତା ହିଲ୍‌ଆଗାଟାସି ରଅସି ନୀ ଦରୁତଲେ ବୁଡୁଣି ପେବୁହି ମାଟାଣି ମେସୁମି, ଇଞ୍ଜା ଏଞ୍ଜାସି ମା ଗତିତା ହିଲ୍‌ଆତାକି ଏଞ୍ଜାଣାକ୍ କାହିକିତମି ।”

୩୯ ସାମା ଜାସୁ ଏଲେଇଚେସି, “ଏଞ୍ଜାଣାକ୍ କାହିକିଆଦୁ; ଇଚିହିଁ ନା ଦରୁତଲେ କାବାଆନି କାମା କିହାନା ଝେଣ୍ଡେ ନାଙ୍ଗେ ନିନ୍ଦା କିନ୍ଦାନେସି, ଇଲେତି ଲକୁ ଆମ୍ବାଆସି ହିଲଅସି; ୪୦ ☆ଇଚିହିଁ ଆମ୍ବାଆସି ମା କପାଟି ନିଙ୍ଗାଆ ଗାଟାସି ଏଞ୍ଜାସି ମା ତଲେତାସି ।

☆ ୯:୩୪ ୯:୩୪ ଲୁକ ୨୨:୨୪ ☆ ୯:୩୫ ୯:୩୫ ମାତି ୨୦:୨୭,୨୭; ୨୩:୧୧; ମାର୍କ ୧୦:୪୩,୪୪; ଲୁକ ୨୨:୨୭ ☆ ୯:୩୬ ୯:୩୬ ମାତି ୧୦:୪୦; ଲୁକ ୧୦:୧୭; ଜହ ୧୩:୨୦
 ☆ ୯:୪୦ ୯:୪୦ ମାତି ୧୨:୩୦; ଲୁକ ୧୧:୨୩

୪୧ ☆ନାନୁ ମିଙ୍ଗେ ସାତା ଝେସିମାଞ୍ଜାଇଁ, ମୀରୁ କ୍ରୀସ୍ତତି ଲକ୍ଷୁ ଇଞ୍ଜିଆମ୍ବାଆସି ଜିକେଏ ମିଙ୍ଗେ ଜାରେକା ଏୟୁ ଗସାଲି ହିୟାନେସି, ଏଝାସି ଏନିଜିକେଏ ତାନି ଦାନାତି ଜାକ୍ଅସି ।”

ନାମୁତା ପାପୁ କିଝି କିନାଣି ତଣ୍ଡ
(ମାତି ୧୮:୭-୯; ଲୁକ ୧୭:୧-୨)

୪୨ ଅଡେ ଆମ୍ବାଆସି ନାମାମାନି ଇ ଉଣାୟାଁ ବିତ୍ରାଟି ରଥଣାଇଁ ପାପୁ କିଝି କିନେସି, ଏଝାଣି ହେରକିତା କାଜା ଜେତାଝାଲି ଦସାନା ଏଝାଣାଇଁ ସାମଦୁରିତା ମେଡ଼ହିହିଁ ନେହେଁ ଆଡେମା । ୪୩ ☆ମୀ କେୟୁ ମିଙ୍ଗେ ପାପୁ କିଝିକିୟାନେ, ଇଚିହିଁ ଏଦାଆଁ ଜାଚାନା କୁତାଦୁ; ରୀ କେୟା ମାଞ୍ଜାନା ନର୍କ ଇଚିହିଁ ତୁମ୍ବାଆଗାଟି ହିରୁ ଗାଡ଼ୟୁତା ମେଡ଼ପି ଆନି ବାଟା କଲା ଆହାନା ଜୀଝୁତା ହଡ଼ନାୟି ମିଙ୍ଗେ ତାକି ନେହେଁ । ୪୪ ଇଚିହିଁ ନର୍କତା ଏମ୍ବାତି ପିଡ଼କା ଏରେଲା ହାଉ, ଅଡେ ହିରୁ ଏରେଲା ତୁମ୍ବେଏ ।† ୪୫ ଅଡେ ମୀ କତା ମିଙ୍ଗେ ପାପୁ କିଝିକିୟାନେ, ଏଦାଣି ରାଡ଼ହା କୁତାଦୁ, ରୀ କତାୟାଁ ନେହେଁ ମାଞ୍ଜାନା ନର୍କତା ମେଡ଼ପି ଆନି ବାଟା ସଟା ଆହାନା ଜୀଝୁତା ହଡ଼ନାୟି ମିଙ୍ଗେ ତାକି ନେହେଁ । ୪୬ ଇଚିହିଁ ନର୍କତା ଏମ୍ବାତି ପିଡ଼କା ଏରେଲା ହାଉ, ଅଡେ ହିରୁ ଏରେଲା ତୁମ୍ବେଏ ।‡ ୪୭ ☆ଇଞ୍ଜାଁ ମୀ କାନୁ ମିଙ୍ଗେ ପାପୁ କିଝିକିୟାନେ ଇଚିହିଁ ଏଦାନି ଡେଝା କୁତାଦୁ, ରୀ କାଣକା ନେହେଁ ମାଞ୍ଜାନା ନର୍କତା ମେଡ଼ପି ଆନି କିହାଁ ର କାନୁ ତଲେ ମାହାପୁରୁ ରାଜିତା ହଡ଼ନାୟି ମିଙ୍ଗେ ତାକି ନେହେଁ । ୪୮ ଇଚିହିଁ ନର୍କତା ଏମ୍ବାତି ପିଡ଼କା ଏରେଲା ହାଉ, ଅଡେ ହିରୁ ଏରେଲା ତୁମ୍ବେଏ ।

୪୯ “ହାରୁ ତଲେ ଏନିକିଁ ପୂଜା ହୀନାୟି ସୁଦୁ ଆନେ, ଏଲେକିହିଁ ଏ ହିରୁତଲେ ବାରେ ସୁଦୁ କିଝିଆନେ ।”

୫୦ ☆“ହାରୁ ନେହାୟି, ସାମା ହାରୁ ମୁଆସାରେ ଆତିହିଁ ଏନିକିଁ ମୁପି କିନାୟି ଆନେ ? ମୀରୁ ମୀ ତାଣା ହାରୁ ଲେହେଁ ଆଦୁ, ଅଡେ

☆ ୯:୪୧ ୯:୪୧ ମାତି ୧୦:୪୨ ☆ ୯:୪୩ ୯:୪୩ ମାତି ୫:୩୦ † ୯:୪୪ ୯:୪୪ କଚେକା ସାସ୍ତେରିତା ଈ କାତା ରାସ୍ତକି ଆହାହିଲେଏ । ‡ ୯:୪୬ ୯:୪୬ କଚେକା ସାସ୍ତେରିତା ଈ କାତା ରାସ୍ତକି ଆହାହିଲେଏ । ☆ ୯:୪୭ ୯:୪୭ ମାତି ୫:୨୯ ☆ ୯:୫୦ ୯:୫୦ ମାତି ୫:୧୩; ଲୁକ ୧୪:୩୪,୩୫

ରଥରେ ରଥଶାଳି ହିତୁଡ଼ି ଜୀଝୁତଲେ ନେହୁଁ ଆହୁଁ ଡ଼ୟାଦୁ ।”

୧୦

ତକ୍ତି ତକ୍ତା ପିସ୍ପିଆନ୍ତି କାତା ଜୀସୁ ଜାପ୍ନାୟି
(ମାତି ୧୯:୧-୧୨; ଲୁକ ୧୭:୧୮)

୧ ଏ ଗାୟୁଟି ଜୀସୁ ହାଜାନା ଜୀହୁଦା ରାଜିତି ହାନ୍ଦି ଅଡ଼େ ଜର୍ଦନ କାତା ଆତାଲ୍ୟାଝାକି ଝାଡ଼େସି; ଇଞ୍ଜା ଲକୁ ଅଡ଼େ ଝେଣ୍ଡେ ଏଝାଣି ତାଣା ରୁଣ୍ଡା ଆହାଲିଏ, ଏଝାସି ତାନି ନେରା ଲେହେଁ ଏଝାରାଇଁ ଅଡ଼େ ଜାପ୍ନାଲି ମାଟ୍‌ହେସି ।

୨ ଏମ୍ବାଟିଏ ପାରୁସିୟାଁ ଏଝାଣି ତାଣା ଝାହାନା ଏଝାଣାଇଁ ତାୟିପାରିକିହୁଁ ଝେରେରି, “ଜାହାରା ତକ୍ତିନି ପିସାଲି ଆବାୟାକି ନେରା କି ?”

୩ ଜୀସୁ ଏଝାରାଇଁ ଏଲେଇରେସି, “ମସା ମିଙ୍ଗେ ଏନ୍ତି ହୁକୁମି ହାହାମାଞ୍ଜାନେସି ?”

୪ ☆ଏଝାରି ଏଲେଇରେରି, “ପିହୁନି ଆକୁ ରାଚାନା ତକ୍ତିନି ପିସାଲି ମସା ହେଲ ହାହାମାଞ୍ଜାନେସି ।”

୫ ଏମ୍ବାଟିଏ ଜୀସୁ ଏଝାରାଇଁ ଏଲେଇରେସି, “ମୀ ଆଟ୍‌ଝା ହିୟାତି ମେସାନା ଏଝାସି ମିଙ୍ଗେତାକି ଇ ହୁକୁମି ରାଚାମାନେସି । ୬ ସାମା ମାଣସି ଗାଡ଼ି ଆଡ଼ି ବେଲଟିଏ ଏଝାସି ଏଝାରାଇଁ ଇୟା ଅଡ଼େ ଆବା କିହୁଁ ମାହାପୁରୁ ଗାଡ଼ିକିଡେସି । ୭ ଏଦାଆଁତାକି ଆବା ତାଲି ତାଞ୍ଜିଇଁ ପିହୁନେସି, ଇଞ୍ଜା ତାନି ତକ୍ତି ତଲେ ଆଣ୍ଡିନେସି, ୮ ଇଞ୍ଜା ଏଝାରି ରିଆରି ଆଏ, ସାମା ରଣ୍ଡିଏ ଆଙ୍ଗା ଆନେରି । ୯ ଇଞ୍ଜା ମାହାପୁରୁ ଏନାଆଁ ଆଣ୍ଡି କିହାମାନେସି, ମାଣ୍ଡିଏ ଏଦାଆଁ ଏଟ୍‌କା କିଆପେସି ।”

୧୦ ତାୟୁ ସୀସୁୟାଁ ଇଜ ଇ କାତାତି ଜୀସୁଇଁ ଅଡ଼େ ଝେଣ୍ଡେ ଝେରେରି । ୧୧ ☆ଏମ୍ବାଟିଏ ଜୀସୁ ଏଝାରାଇଁ ଏଲେଇରେସି, “ଆମ୍ବାଆସି ତାନି ତକ୍ତିନି ପିସାନା ଏଟ୍‌କାତାଣି ବାହା ଆନେସି, ଏଝାସି ତଲିତି ତକ୍ତିନି କପାଟି ଦାରିକାମା କିନେସି । ୧୨ ଅଡ଼େ ତକ୍ତି ତାନି ତକ୍ତାଇଁ ପିସାନା ଏଟ୍‌କାତାଣାଇଁ ବାହା ଆନେ, ଆତିହୁଁ ଏଡ଼ି ଦାରିକାମା କିନେ ।”

କକାରି ପଦାଁଣି ଜୀସୁ ବର ହୀନାୟି
(ମାତି ୧୯:୧୩-୧୫; ଲୁକ ୧୮:୧୫-୧୭)

୧୩ ଏଝାସି ଏନିକି କକାରି ପଦାଁଣି ତୀଗିନେସି, ଏଦାଆଁତାକି ଲକ୍ଷ୍ମି ଏଝାରାଇଁ ଜୀସୁ ତାଣା ତାଚାଲି ମାଟ୍‌ହେରି; ସାମା ସୀସୁୟାଁ ଏଝାରାଇଁ ଦାକା ହୀତେରି । ୧୪ ଜୀସୁ ଏଦାଆଁ ମେସାଁ କାରବି ଆହାନା ଏଝାରାଇଁ ଏଲେଇଚେସି, “କକାରି ପଦାଁଣି ନା ତାଣା ଖାହାଲି ହୀଦୁ, ଏଝାରାଇଁ ଆଂଗାଆଦୁ; ଇଚିହୁଁ ମାହାପୁରୁତି ରାଜି ଇଲେତି ଲକ୍ଷ୍ମିତାୟି । ୧୫ ନାନୁ ମିଙ୍ଗ ସାତା ଝେସିମାଞ୍ଜାଇଁ, ଆମ୍ବାଆସି କକାରି ପଦାୟାଁ ଲେହେଁ ମାହାପୁରୁତି ରାଜି ଆବଅସି, ଏଝାସି ଏନିଜିକେଏ ଏମ୍ବାଆଁ ହଡାଲି ଆଡଅସି ।” ୧୬ ଇଞ୍ଜାଁ ଏଝାସି ଏଝାରାଇଁ କତାଣା ଜଙ୍ଗାନା ଏଝାରି ଲାକ କେୟୁ ଇଟାନା ବର ହୀତେସି ।

ର ଦନ ଗାଟି ଦାଂଗଣେଏସି
(ମାତି ୧୯:୧୭-୩୦; ଲୁକ ୧୮:୧୮-୩୦)

୧୭ ଜୀସୁ ଅଡେ ଝେଣ୍ଡେ ହାଜିମାଚାଟି ରଅସି ଦାବଡି ଖାହାନା ଏଝାଣି ନକିତା ମେଣ୍ଡାକୁତାନା ଏଝାଣାଇଁ ଝେଚେସି, “ଏ ନେହୁଁ ଗୁରୁ କାଲାକାଲାତି ଜୀସୁ ବେଟାଆହାଲି ନାନୁ ଏନାଆଁ କିଇଁ?”

୧୮ ଏମ୍ବାଟିଏ ଜୀସୁ ଏଝାଣାଇଁ ଏଲେଇଚେସି, “ନାଙ୍ଗେ ନେହୁଁତି ଇଞ୍ଜୁଁ ଏନାଆଁତାକି ଏଲେଇଞ୍ଜି ମାଞ୍ଜାଦି ? ରଅଣି ପିସ୍‌ପେ ଇଚିହୁଁ ମାହାପୁରୁ ପିସ୍‌ପେ ଅଡେ ଆମ୍ବାଆସି ନେହୁଁସି ହିଲଅସି ।

୧୯ ନାନୁ ସାସ୍ତେରିତି ବାରେ ହୁକୁମିକା ପୁଞ୍ଜାମାଞ୍ଜି, ଲକ୍ଷ୍ମି ପାୟାଆଦୁ, ଦାରିକାମା କିଆଦୁ, ସରୁ କିଆଦୁ, ମିଟି ସାକି ଜଲାଆଦୁ, ଲକ୍ଷ୍ମି ନାଡ଼ି କିଆଦୁ, ଇଞ୍ଜାଁ ତାଲି ତାଞ୍ଜିଇଁ ଜୀସୁନଦୁ ।”

୨୦ ଏଝାସି ଏଝାଣାଇଁ ଏଲେଇଚେସି, “ଏ ଗୁରୁ ଇ ବାରେ ନାନୁ ଡଣା ଝେଡାଟିଏ ମାନୁଝି ଆହିମାଇଁ ।”

୨୧ ଜୀସୁ ଏଝାଣାଇଁ ତୀରେ ସିନିକିହାଁ ଜୀସୁ ନଡେସି ଇଞ୍ଜାଁ ଏଲେଇଚେସି, “ନାନୁ ର କାମାତା ଡଣା ମାଞ୍ଜି, ନାନୁ ହାଜାନା ନୀ ଦନ ବାରେ ପାରଚାନାହାଁ ହିଲଆ ଗାଟାରାକି ଦାନା ହୀମ୍ବୁ, ଅଡେ ନା ଜେଚ ଖାମ୍ବୁ, ଇଞ୍ଜାଁ ନାନୁ ଲାକପୁରୁ ଦନ ବେଟାଆଦି ।” ୨୨ ସାମା ଇ କାତାତା

ଏଞ୍ଜାଣି ମୁମ୍ମୁ ହୁପାଲି ଆହାହାଚେ, ଇଞ୍ଜା ଏଞ୍ଜାସି ଦୁକୁ ଆହାନା ହାଚେସି, ଇଚିହିଁ ଏଞ୍ଜାଣାକି ହାଚେକା ଦନ ମାଚେ ।

୨୩ ଏମ୍ବାଟିଏ ଜୀସୁ ସାରିଞ୍ଜାକି ସିନକିହାନା ତାନି ସୀସୁୟାଣି ଏଲେଇଚେସି, “ଦନ ଗାଟାରି ହାଚେକା କସ୍ତଲେ ମାହାପୁରୁ ରାଜିତା ହତ୍ତନେରି ।”

୨୪ ଏଞ୍ଜାଣି କାତା ଝେଞ୍ଜାନା ସୀସୁୟା କାବା ଆଚେରି, ସାମା ଜୀସୁ ଅଚେ ଝେଞ୍ଜେ ଏଞ୍ଜାରାଇଁ ଏଲେଇଚେସି, “ଆଚେ କକାଚେରି ମାହାପୁରୁ ରାଜିତା ହତ୍ତନାୟି ହାଚେକା କସ୍ତ । ୨୫ ମାହାପୁରୁତି ରାଜିତା ଦନ ଗାଟାରି ହତ୍ତନି କିହାଁ ସୁଜା କାଣିଟି ଉଟୁ ହତ୍ତନାୟି ଉସାସା ।”

୨୬ ଏମ୍ବାଟିଏ ଏଞ୍ଜାରି ହାଚେକା କାବାଆହାନା ତାମ୍ମୁ ତାମ୍ମୁ କାତା ଆଚେରି, “ଆଚିହିଁ ଆମ୍ବାଆସି ଗେଲପି ଆହାଲି ଆଡିନେସି?”

୨୭ ଜୀସୁ ଏଞ୍ଜାରାଇଁ ତୀରିତଲେ ସିନକିହାନା ଏଲେଇଚେସି, “ଇଦି ମାଣସିକି ଆଡାଆଗାଟାୟି, ସାମା ମାହାପୁରୁକି ଆଏ; ଇଚିହିଁ ମାହାପୁରୁ ବାରେ କିହାଲି ଆଡିନେସି ।”

୨୮ ପିତର ଏଞ୍ଜାଣାଇଁ ଏଲେଇଚେସି, “ମେହ୍ମୁ ମାମ୍ମୁ ରୁରେ ପିସାନା ନୀ ଜେଚ ଝାହାମାନମି ।”

୨୯ ଜୀସୁ ଏଲେଇଚେସି, “ନାନୁ ମିଜେ ସାତା ଝେସିମାଞ୍ଜାଇଁ, ଆମିନି ଲକୁ ନା ନେହିଁ କାରୁତାକି ଲକୁ କି ତାୟିକି ତାଜି କି ତାଲି, ତାଞ୍ଜି, କକାରି ପଦାଣି କି ବୁମି ବାଡା ପିସାମାନେରି, ୩୦ ଅଚେ ଇ କାଲାତା କସ୍ତ ବେଟାଆହିଁ, ଝାଞ୍ଜା ଗୁଣୁତି ଇଲକା, ତାୟି, ତାଜି, ତାଲି ତାଞ୍ଜି, କକାରି ପଦାୟାଁ ଅଚେ ବୁମି ବାଡା, ଇଞ୍ଜା ଝାନି ଜୁଗୁତା କାଲାକାଲାତି ଜୀଝୁ ବେଟାଆଅସି, ଇଲେତି ଲକୁ ଆମ୍ବାଆସି ହିଲଅସି । ୩୧ ☆ସାମା ନକିତା ମାନି ହାଚେକା ଲକୁ ତାୟୁ ଆନେରି, ଇଞ୍ଜା ତାୟୁ ମାନି ହାଚେକା ଲକୁ ନକିନେରି ।”

ଜୀସୁ ତାନି ପାଲି ତାନି ହାନି କାତା ଝେହ୍ନାୟି

(ମାତି ୨୦:୧୭-୧୯; ଲୁକ ୧୮:୩୧-୩୪)

୩୨ ଏଞ୍ଜାରି ଜିରୁସାଲମତା ହାଜିମାଟାଟି ଜିରୁତା ମାଚେରି ଇଞ୍ଜା ଜୀସୁ ଏଞ୍ଜାରି ନକି ନକିତା ହାଜିମାଚେସି, ଅଚେ ଏଞ୍ଜାରି

କାବାଆହାନା ତାହୁଁ ଖାହିଁମାନି ଲକ୍ଷ୍ମୀ ଆଜାମାରେରି, ଇଞ୍ଜା ଏଞ୍ଜାସି
 ଝେଣ୍ଡେ ବାରଜାଣାତି ଏଟ୍‌କା କିହାନା ତାଜେତାକି ଏନା ଏନାୟି
 ଆହାଲି ହାଜିମାନେ, ଏ ବାରେ ଏଞ୍ଜାରାଇଁ ଝେସାଲି ମାଟ୍‌ହେସି ।
 ୩୩ ଜୀସୁ ଏଲେଇଚେସି, “ମେହ୍‌ଦୁ ମାର ଜିରୁସାଲମତା ହାଜିମାନାୟି;
 ମାଣ୍‌ସି ମାର୍‌ଏସି କାଜା ପୂଜେରାଜା ଅଡ଼େ ମେରାପୁନାରି କେୟୁତା
 ହେରପିଆନେସି, ଅଡ଼େ ଏଞ୍ଜାରି ଏଞ୍ଜାଣାଇଁ ହାନ୍ତି ତଣ୍ଡ ହୀହାନା ଏଟ୍‌କା
 କୁଡ଼ାତାରି କେୟୁତା ହେରପିନେରି, ୩୪ ଇଞ୍ଜା ଏଞ୍ଜାରି ଏଞ୍ଜାଣାଇଁ କିଜିଞ୍ଜି
 କିନେରି, ଏଞ୍ଜାଣିଲକ ହୁପିନେରି, ଏଞ୍ଜାଣାଇଁ ସାଟ୍‌ଣି ତଲେ ଝେନେରି,
 ଇଞ୍ଜା ପାୟିନେରି, ଅଡ଼େ ତାନି ଦିନାଟିଏ ଝେଣ୍ଡେ ନିଜିନେସି ।”

ଜାକୁବ ଅଡ଼େ ଜହନ ବାତିମାଲିନାୟି
 (ମାତି ୨୦:୨୦-୨୮)

୩୫ ତାହୁଁ ଜେବଦି ମୀରକା ଜାକୁବ ଅଡ଼େ ଜହନ ଜୀସୁ ତାଣା
 ଖାହାନା ଏଲେଇଚେରି, “ଏ ଗୁରୁ ମା ଅଣ୍‌ପୁ ମାୟୁ ନୁୀ ତାଣାଟି ଏନାଆଁ
 ରୀହନମି ଏଦାଆଁ ମା ତାକି ନୀନୁ କିମ୍ପୁ ।”

୩୬ ଇଞ୍ଜା ଜୀସୁ ଏଞ୍ଜାରାଇଁ ଝେଚେସି, “ନୀନୁ ମୀ ତାକି ଏନାଆଁ କିଇଁ
 ଇଞ୍ଜା ମୀରୁ ଅଣପିମାଞ୍ଜେରି ?”

୩୭ ଏଞ୍ଜାରି ଏଞ୍ଜାଣାଇଁ ଏଲେଇଚେରି, “ନୀନୁ ଗାଞ୍ଜୁରମିଗାଟି ରାଜିତା
 କୁରିସାରେ ଏନିକ ମା ବିତ୍ତାଟି ରଅତମି ନୀ ଚିଞ୍ଜି ଚଟ ଅଡ଼େ
 ରଅତମି ନୀ ଚେବୁ ଚଟ କୁରିନମି ଇ ବର ମାଜେ ହିୟାମ୍ପୁ ।”

୩୮ ☆ସାମା ଜୀସୁ ଏଞ୍ଜାରାଇଁ ଏଲେଇଚେସି, “ମୀରୁ ଏନାଆଁ
 ରାସିମାଞ୍ଜେରି ଏଦାଆଁ ପୁଞ୍ଜାହିଲଅତେରି । ନୀନୁ ଆମିନି ସଲ୍‌ତା
 ଗସିମାଇଁ, ଏମ୍ପାଆଁ ମୀରୁ ଗସାଲି ଆଡ଼ିଦେରି ? ଇଞ୍ଜା ନୀନୁ
 ଆମିନି ବାପ୍ତିସ୍ମତା* ବାପ୍ତିସ୍ମ† ଅହିମାଇଁ ଏମ୍ପାଆଁ ମୀରୁ ବାପ୍ତିସ୍ମ‡ ଆହାଲି
 ଆଡ଼ିଦେରି ?”

୩୯ ଏଞ୍ଜାରି ଏଲେଇଚେରି, “ଆଡ଼ିନମି ।”

ଜୀସୁ ଏଞ୍ଜାରାଇଁ ଏଲେଇଚେସି, “ନୀନୁ ଆମିନି ସଲ୍‌ତା ଗସିମାଇଁ
 ଏମ୍ପାଆଁ ଗସାଲି ଆଡ଼ିଦେରି, ଇଞ୍ଜା ନୀନୁ ଆମିନି ବାପ୍ତିସ୍ମତା§ ବାପ୍ତିସ୍ମ*

☆ ୧୦:୩୮ ୧୦:୩୮ ଲୁକ ୧୨:୫୦ * ୧୦:୩୮ ୧୦:୩୮ ମୁଞ୍ଜିନାୟି † ୧୦:୩୮ ୧୦:୩୮
 ମୁଞ୍ଜିନାୟି ‡ ୧୦:୩୮ ୧୦:୩୮ ମୁଞ୍ଜିନାୟି § ୧୦:୩୯ ୧୦:୩୯ ମୁଞ୍ଜିନାୟି * ୧୦:୩୯
 ୧୦:୩୯ ମୁଞ୍ଜିନାୟି

ଆହିମାଙ୍କୁ ମୀରୁ ଏମ୍ବାଆଁ ବାପ୍ତିସ୍ମା[†] ଆଦେରି; ^{୪୦} ସାମା ନା ଚିଃନି ଅଡ଼େ ଚେବ୍ରିଝାକି କୁଗାଲି ହାହାଲି ନା ଅଦିକାରାତି କାତା ଆଏ, ଆମ୍ବାଆରାକି ମାହାପୁରୁ ଟାୟୁ କେପାମାନେସି ଏଞ୍ଜାରି କୁଗିନେରି ।”

^{୪୧} ଏଟକାତି ଦସ ଜାଣା ଇଦାଆଁ ଖେଞ୍ଜାନା ଜାକୁବ ଅଡ଼େ ଜହନଇଁ କାରବି ଆହାଲି ମାଟ୍‌ହେରି । ^{୪୨} ☆ଏମ୍ବାଟିଏ ଜୀସୁ ଏଞ୍ଜାରାଇଁ ତାଗେ ହାଟାନା ଏଲେଇଚେସି, “ଆମିନି ଗାଟାରି ଏଟକା କୁଡ଼ାତି ସାଲୁଝି କିନାରି ଲେହେଁ ଆହାମାନେରି, ଏଞ୍ଜାରି ଲାକ ସାଲୁଝି କିନେରି, ଅଡ଼େ ଏଞ୍ଜାରି କାଜାପାଣା ଗାଟାରି ଏଞ୍ଜାରି ମୁହେଁ ସାଲୁଝି କିନେରି, ଇଦାଆଁ ମୀରୁ ପୁଞ୍ଜୁ । ^{୪୩} ☆ସାମା ମୀ ବିତ୍ତା ଏଲେକିହୁଁ ଆଏ; ସାମା ମୀ ବିତ୍ତା ଆମ୍ବାଆସି କାଜାସି ଆହାଲି ମନ କିନେସି, ଏଞ୍ଜାସି ମୀ ସେବା କିପେସି, ^{୪୪} ଅଡ଼େ ମୀ ବିତ୍ତା ଆମ୍ବାଆସି କାଜାସି ଆହାଲି ମନ କିନେସି, ଏଞ୍ଜାସି ବାରେତି ହଲେଏସି ଆପେସି । ^{୪୫} ଇଚିହୁଁ ମାଣସି ମୀରୁଏସି ଜିକେଏ ସେବା ବେଟାଆହାଲି ଖାହାହିଲଅସି, ସାମା ସେବା କିହାଲି ଇଞ୍ଜା ହାରେକା ଲକୁଣି ପାପୁଟି ପିସ୍‌ପି କିହାଲିତାକି ତାନି ଜୀଞ୍ଜୁ ହାହାଲି ଖାହାମାନେସି ।”

ଜୀସୁ ବାଟିମୟ କାଣାଇଁ ନେହୁଁକିନାୟି
(ମାତି ୨୦:୨୯-୩୪; ଲୁକ ୧୮:୩୫-୪୩)

^{୪୬} ତାୟୁ ଏଞ୍ଜାରି ଜିରିହତା ଏଗାଡେରି, ଅଡ଼େ ଏଞ୍ଜାସି ତାନି ସୀସୁୟାଁ ଇଞ୍ଜା ମାନ୍ଦା ଲକୁତଲେ ଜିରିହତି ହାଜିମାନି ବେଲାତା ଟିମାୟ ମୀରୁଏସି ବାଟିମୟ ଦରୁଗାଟି ର କାଣା, ରୀସ୍‌ପାଲି ଜିରୁ ଦାରିତା କୁଗାମାରେସି । ^{୪୭} ଏଞ୍ଜାସି ନାଜରିତତି ଜୀସୁ, ଇମ୍ବାଟି ହାଜିମାନେସି ଇଞ୍ଜା ଖେଞ୍ଜାନା ଏଞ୍ଜାସି କାଜା ରିୟାତଲେ ଏଲେଇଚେସି, “ଏ ଦାଞ୍ଜୁଦ ମୀରୁଏଶାତି ଜୀସୁ ନାଞ୍ଜେ କାର୍ମା ମେସ୍ତାମୁ ।”

^{୪୮} ଏମ୍ବାଟିଏ ହାରେକା ଲକୁ ଏଞ୍ଜାଣାଇଁ ପାଲେଏ ଆହାଲି ଦାକା ହୀଡେରି, ସାମା ଏଞ୍ଜାସି ଅଡ଼େ କାଜା ହାଡ଼ାତଲେ ଏଲେଇଚେସି, “ଏ ଦାଞ୍ଜୁଦ ମୀରୁଏଶାତି ଜୀସୁ ନାଞ୍ଜେ କାର୍ମା ମେସ୍ତାମୁ ।”

† ୧୦:୩୯ ୧୦:୩୯ ମୁଞ୍ଜିନାୟି ☆ ୧୦:୪୨ ୧୦:୪୨ ଲୁକ ୨୨:୨୫,୨୬ ☆ ୧୦:୪୩ ୧୦:୪୩ ମାତି ୨୩:୧୧; ମାର୍ଚ୍ଚ ୯:୩୫; ଲୁକ ୨୨:୨୬

୪୯ ଏମ୍ବାଟିଏ ଜୀସୁ ନିଚାନା ଏଲେଇଚେସି, “ଏଞ୍ଜାଣାଇଁ ହାଟାଦୁ ।” ଏଞ୍ଜାରି ଏ କାଣାଇଁ ହାଟାନା ଏଲେଇଚେରି, “ସାସା ଆହାନା ନିଙ୍ଗାମ୍ବୁ, ଏଞ୍ଜାସି ନିଙ୍ଗେ ହାଟିମାଞ୍ଜାନେସି ।”

୫୦ ଏମ୍ବାଟିଏ ଏଞ୍ଜାସି ନିଙ୍ଗାନା ତାନି ହିମ୍ବରି କୁତାନା ଜୀସୁ ତାଣା ଖାଡେସି ।

୫୧ ଜୀସୁ ଏଞ୍ଜାଣାଇଁ ଏଲେଇଚେସି, “ନାନୁ ନିଙ୍ଗେତାକି ଏନାଆଁ କିଇଁ ଇଞ୍ଜିଁ ନୀନୁ ଅଣ୍ଡିପିମାଞ୍ଜି ?” ଏ କାଣା ଏଞ୍ଜାଣାଇଁ ଏଲେଇଚେସି, “ଏ ଗୁରୁ ନାନୁ ଏନିକିଁ ମେସାଲି ଆଡ଼ିଇଁ ।”

୫୨ ଜୀସୁ ଏଞ୍ଜାଣାଇଁ ଏଲେଇଚେସି, “ହାଲାନୁ ନୀ ନାନୁ ନିଙ୍ଗେ ନେହଁ କିୟାତେ ।” ଏ ଦେବୁଣିଏ ଏଞ୍ଜାସି ମେସାଲି ଆଡ଼ିତେସି, ଇଞ୍ଜା ଏଞ୍ଜାରି ଜେଟ ଜେଟ ହାଚେସି ।

୧୧

ଜୀସୁ ଜିରୁସାଲମତା ହଡ଼ନାୟି

(ମାତି ୨୧:୧-୧୧; ଲୁକ ୧୯:୨୮-୪୦; ଜହ ୧୨:୧୨-୧୯)

୧ ଏଚିବେଲା ଏଞ୍ଜାରି ଜିରୁସାଲମ ତାଗେ ଆହାନା ଜୀତ ହରୁ ତାଗେ ବେଡ଼ପାଗି ଇଞ୍ଜା ବେତନିୟାଁ ତାଗେ ଖାଡେରି, ଏଚିବେଲା ଏଞ୍ଜାସି ତାନି ସୀସୁୟାଁ ବିତ୍ରାଟି ରିଆରାଇଁ ଇ କାତା ଖେସା ପାଣ୍ଡିତେସି,

୨ “ମୀ ନକିତା ମାନି ଏ ନାୟୁତା ହାଜୁ; ଏ ନାୟୁତା ହଡ଼ଞ୍ଜିଏ ଆମିନି ଲାକ ଆମ୍ବାଆରି ଏଚେଲା ହଟା ହିଲଅରି ଇଲେତି ର ଗାଡ଼ଦେ ତାଲୁତି ଦସାମାନାଣି ମେହ୍ଦେରି; ଏଦାନି ହୁକହାନା ତାଦୁ ।

୩ ଅଡେ ଆମ୍ବାଆସି ଏନାଆଁ କିହିମାଞ୍ଜେରି ଇଞ୍ଜିଁ ମିଙ୍ଗେ ଖେଞ୍ଜାନେସି, ଆତିହଁ ଏଲେଇଞ୍ଜୁ, ଇଦାଣି ତାଣା ମା ପ୍ରବୁକି ଲଡ଼ାମାନେ, ଅଡେ ଖେଣ୍ଡେ ଇଦାଣି ଖେଡ଼ାକିଆନା ପାଣ୍ଡାନେସି ।”

୪ ଏଞ୍ଜାରି ହାଜାନା ଦୁଖେରିଦାରି ଆଂଗେଣିତା ର ଗାଡ଼ଦେ ତାଲୁତି ଦସାମାନାଣି ମେସାନା ଏଦାଣି ହୁକହେରି, ୫ ଏମ୍ବାଟିଏ ଏମ୍ବାଆଁ ନିଚାମାଟି ଲକୁ ବିତ୍ରାଟି ଏଚରଜାଣା ଖେଚେରି, “ଗାଡ଼ଦେ ତାଲୁତି ପିସାନା ଏନାଆଁ କିହିମାଞ୍ଜେରି ?”

୬ ଜୀସୁ ଏନିକିଁ ଖେସାମାଚେସି, ଏଞ୍ଜାରି ଏଲେକିଁ ଏଞ୍ଜାରାଇଁ ଏଲେଇଚେରି; ଏମ୍ବାଟିଏ ଏଞ୍ଜାରି ଏଞ୍ଜାରାଇଁ ହେଲ ହୀଚେରି । ୭ ଜୀସୁ

ନକିତା ଗାଡ଼ଦେ ତାଲୁତି ତାରାନା ଏଞ୍ଜାରି ଏଦାଣି ଲାକ ତାମି ହିମ୍ବରିକା ପାଢ଼େସ୍ରି, ଅଡ଼େ ଜୀସୁ ଏଦାନିଲେକ କୁରିତେସି ।^୮ ଅଡ଼େ ହାରେକା ଜିରୁତା ତାମି ହିମ୍ବରିକା ପାଢ଼େସ୍ରି ଅଡ଼େ ଏବ୍‌କାତାରି ଜାଡ଼ାତି ଗରାୟ୍ନା ଚୁଣ୍ଡା ତାରାନା ପାଢ଼େସ୍ରି ।^୯ ଇଞ୍ଜା ନକିତା ତାୟ୍‌ଞ୍ଜାକି ହାଜିମାନି ଲକୁ କାଜା ହାଡ଼ାତଲେ ଏଲେଇଚେରି, “ହସାନା ମାହାପୁରୁ ଦରୁଟି ଆମ୍ବାଆସି ଖାହିମାନେସି, ଏଞ୍ଜାସି ନେହାସି ।^{୧୦} ମା ଆକୁ ଦାହୁଦତି ଆମିନି ରାଜି ଖାହିମାନେ, ଏଦି ଜହରା, ଲାକପୁରୁତି ହସାନା ।”

^{୧୧} ତାୟ୍‌ ଜୀସୁ ଜିରୁସାଲମତା ଖାହାନା ମାହାପୁରୁ ଇଲୁତା ହାଚେସି, ଇଞ୍ଜା ସାରିଞ୍ଜାକି ମାନାଣି ବାରେ ସିନକିହାନା ମିଡ଼ଅଲ୍ଲା ଆହାଲିଏ ବାରଜାଣା ସୀସୁୟ୍ନା ତଲେ ବେତନିୟ୍ନାତା ହାଚେସି ।

ଜୀସୁ ତୟ୍‌ ମାର୍‌ନୁତି ବାକା ଇଚିନାୟ୍‌

(ମାତି ୨୧:୧୮-୧୯)

^{୧୨} ତାନି ଅର ଦିନା ବେତନିୟ୍ନାତି ଖାହିମାଚାତି ଜୀସୁ ହାକି ଆଡ଼େସି; ^{୧୩} ଇଞ୍ଜା ହେକଟି ଆକା ମାନି ର ତୟ୍‌ ମାର୍‌ନୁତି ଆକା ମେସାନା ଏମ୍ବାଆଁ ପାଡ଼େୟ୍‌ ବେଟାଆନି ଆସା ତଲେ ତାଗେ ହାଚେସି । ସାମା ତାଗେ ଖାହାନା ଏଞ୍ଜାସି ଆକା ପିସ୍‌ପେ ଅଡ଼େ ଏନାଆଁ ପ୍ଲାଃଆଡେସି, ଇଚିହୁଁ ଏଦି ତୟ୍‌ ଆୟ୍‌ନି ଖେଡ଼ା ହିଲାଆଡେ ।^{୧୪} ଏମ୍ବାଟିଏ ଜୀସୁ ଏଦାଣି ଏଲେଇଚେସି, “ନୀ ପାଡ଼େୟ୍‌ ଲକୁ ଏଚେଲ୍ଲା ତିନାଆପେରି ।” ଏଞ୍ଜାଣି କାତା ତାମି ସୀସୁୟ୍ନା ଖେଞ୍ଜାମାଚେରି ।

ଜୀସୁ ମାହାପୁରୁ ଇଲୁତା ହାନାୟ୍‌

(ମାତି ୨୧:୧୨-୧୭; ଲୁକ ୧୯:୪୫-୪୮; ଜହ ୨:୧୩-୨୨)

^{୧୫} ତାୟ୍‌ ଏଞ୍ଜାରି ଜିରୁସାଲମତା ଖାଡ଼େରି, ଅଡ଼େ ଜୀସୁ ମାହାପୁରୁ ଇଲୁତା ହଡ଼ାନା ଏ ଟାୟ୍‌ତା ବେବାରା କିହିମାତି ଲକୁଣି ପାଙ୍ଗାତା ପେରହାଲି ମାଟ୍‌ହେସି, ଇଞ୍ଜା ଟାକାୟ୍‌ ବେବାରା ଗାଟାରି କୁଚ୍‌ୟ୍‌ ଅଡ଼େ ପଟାୟ୍‌ ବେବାରା କୁଚ୍‌ୟ୍‌ ତିରିମ୍ବୁପ୍‌ହେସି ।^{୧୬} ଇଞ୍ଜା ପ୍ରାତାନା ଇଲୁ ବିଡ଼ାଟି ଆମ୍ବାଆରାକି ଏନାଆଁ ଅହାଲି ତାଚାଲି ହେଲ ହୀଆଡେସି, ^{୧୭} ତାୟ୍‌ ଜୀସୁ ଏଞ୍ଜାରାଇଁ ଜାପ୍‌ହିହୁଁ ଏଲେଇଚେସି, “ଦାମ୍‌ ପତିତା ରାସ୍‌କି ଆହାମାନେ, ନା ଇଲୁ ବାରେ କୁଡ଼ାତି ଲକୁତାକି

ପ୍ରାତାନା ଇଲୁ ଇଞ୍ଜିଁ ୱେଙ୍ଗିନେ ? ସାମା ମୀରୁ ଏଦାଆଁ ତଂଗାୟାଁ ପାଝୁ କିହାମାଞ୍ଜେରି ।”

୧୮ ଇ କାତା ୱେଞ୍ଜାନା କାଜା ପୂଜେରାଞ୍ଜା ଅଡ଼େ ମେରାପୁନାରି ଏଞ୍ଜାଣାଇଁ ଏନିକିଁ ନାସା କିହାଲି ଆଡ଼ିନେରି, ଏଦାଆଁ ପାରୁ ପାରାଲି ମାଟ୍‌ହେରି; ଇତିହିଁ ଲକୁ ଏଞ୍ଜାଣି ଜାପୁନି ତାଣା କାବା ଆହିମାଚାକି ଏଞ୍ଜାରି ଏଞ୍ଜାଣାଇଁ ଆଜିମାଚେରି ।

୧୯ ଏ ଦିନା ମିଡ଼ଅଲ୍ଲା ବେଲ୍ଲା ଜୀସୁ ଅଡ଼େ ସୀସୁୟାଁ ଗାଡ଼ାଟି ହାଚେରି ।

**ୱାୟିତି ତୟା ମାରୁନୁତି ଜାପିନାୟି
(ମାତି ୨୧:୨୦-୨୨)**

୨୦ ଅର ଦିନା ଲାଲ୍‌ଏ ଏ ଜିରୁତି ହାଜିମାଚାଟି ଏଞ୍ଜାରି ତୟା ମାରୁନୁ ତାକିଟିଏ ୱାୟିତାଣି ମେସ୍ତେରି । ୨୧ ଏମ୍ପାଟିଏ ପିତର ତଲିତି କାତା ଅଣ୍‌ପାନା ଏଲେଇଚେସି, “ଏ ଗୁରୁ ମେହ୍‌ମୁ ନୀନୁ ଆମିନି ତୟା ମାରୁନୁତି ବାକା ହୀହାମାଚି ଏଡ଼ି ୱାୟାହାଚେୟିଏ ।”

୨୨ ଜୀସୁ ଏଞ୍ଜାରାଇଁ ଏଲେଇଚେସି, “ମାହାପୁରୁ ତାଣା ନାମାଦୁ । ୨୩ ☆ନୀନୁ ମିଙ୍ଗେ ସାତା ୱେସିମାଞ୍ଜାଇଁ, ଆମ୍ପାଆସି ଇ ହୁରୁତି ନୀନୁ ନିଙ୍ଗାନା ସାମ୍‌ଦୁରିତା ତରୁଗାମୁ ଇନେସି, ଇଞ୍ଜା ତାନି ହିୟାତା ଆନାମାନା ଆଆନା, ଏନାଆଁ ଜଲିମାଇଁ ଏଡ଼ି ଆନେ ଇଞ୍ଜିଁ ନାମିନେସି, ଏଞ୍ଜାଣାକି ଏଡ଼ି ଆନେ । ୨୪ ଏଦାଆଁତାକି ନୀନୁ ମିଙ୍ଗେ ୱେସିମାଞ୍ଜାଇଁ, ମୀରୁ ଏନାଆଁ ପ୍ରାତାନା କିଦେରି ଅଡ଼େ ରାହ୍‌ଦେରି, ଏ ବାରେ ମିଙ୍ଗେ ମେଡ଼ା ଆୟାତେ ଇଞ୍ଜିଁ ନାମାଦୁ, ଏଚେଟିଏ ଏ ବାରେ ସାତେଏ ବେଟାଆଡ଼େରି । ୨୫ ☆ଇଞ୍ଜାଁ ମୀରୁ ଆମିନି ବେଲ୍ଲାତା ପ୍ରାତାନା କିହାଲି ନିଦେରି, ଇଞ୍ଜାଁ ଆମ୍ପାଆରି କପାଟି ଏଡ଼ି କାତା ମାତିହିଁ, ଏଞ୍ଜାଣି ପାପୁ ମ୍ଲେକ୍‌ଦୁ, ଏନିକିଁ ମୀ ଲାକପୁରୁତି ଆବା ଜିକେଏ ମୀ ପାପୁତି ମ୍ଲେକ୍‌ହାନ୍‌ସି । ୨୬ ସାମା ମୀରୁ ଏଞ୍ଜାଣି ପାପୁ ମ୍ଲେକ୍‌ଅଚେରି, ଆତିହିଁ ମୀ ଲାକପୁରୁତି ଆବା ଜିକେଏ ମୀ ବାରେ ପାପୁତି ମ୍ଲେକ୍‌ହଅସି ।”*

☆ ୧୧:୨୩ ୧୧:୨୩ ମାତି ୧୭:୨୦; ୧କର ୧୩:୨ ☆ ୧୧:୨୫ ୧୧:୨୫ ମାତି ୬:୧୪,୧୫
* ୧୧:୨୬ ୧୧:୨୬ କଚେକା ସାସ୍ତେରିତା ଇ କାତା ରାସ୍‌କି ଆହାହିଲେଏ ।

ଜୀସୁତି ଅଦିକାରୀ

(ମାତି ୨୧:୨୩-୨୭; ଲୁକ ୨୦:୧-୮)

୨୭ ତାହୁଁ ଏଝାରି ଅଡ଼େ ଝେଣ୍ଡେ ଜିରୁସାଲମତା ଝାଡ଼େରି; ଇଞ୍ଜା ଏଝାସି ପ୍ରାତାନା ଇଲୁତା ହଡ଼ିମାତି ବେଲତା କାଜା ପୂଜେରାଙ୍ଗା ମେରାପୁନାରି ଇଞ୍ଜା ପ୍ରାତିନାଙ୍ଗା ଏଝାଣି ତାଣା ଝାହାନା ଝେଚେରି, ୨୮ “ନାନୁ ଆମିନି ଅଦିକାରୀ ତଲେ ଇ ବାରେ କିହିମାଞ୍ଜି ? ଇଞ୍ଜା ଇ ବାରେ କିହାଲି ଆମ୍ବାଆସି ଇ ଅଦିକାରୀ ହିୟାତେସି ?”

୨୯ ସାମା ଜୀସୁ ଏଝାରାଇଁ ଏଲେଇଚେସି, “ନାନୁ ମିଙ୍ଗେ ର କାତା ଝେଞ୍ଜାଇଁ, ନାଙ୍ଗେ ଝେସ୍ତାଦୁ, ଆତିହଁ ନାନୁ ଆମିନି ଅଦିକାରୀ ତଲେ କିହିମାଇଁ, ଏଦାଆଁ ମିଙ୍ଗେ ଝେସ୍ତାଇଁ । ୩୦ ଜହନତି ବାପ୍ତିସ୍ତା† ଲାକପୁରୁଟି କି ମାଣ୍ଡିୟାଁ ତାଣାଟି ଆହାମାଚେ ? ଏଦାଆଁ ନାଙ୍ଗେ ଝେସ୍ତାଦୁ ।”

୩୧ ଏଚେଟିଏ ଏଝାରି ତାମ୍ବୁତାମ୍ବୁ କାତା ଆହାଲି ମାଟ୍‌ହେରି, “ଲାକପୁରୁଟି ଇନାୟି, ଆତିହଁ ଏଝାସି ଏଲେଇଞ୍ଜାନେସି ମୀରୁ ଏଦାଆଁତାକି ଏଝାଣାଇଁ ନାମାଆଚେରି ? ୩୨ ଅଡ଼େ ମାଣ୍ଡି ତାଣାଟି ଇନାୟି, ଏଝାରି ଲକୁଣି ଆଜିମାଚେରି; ଇଚିହଁ ବାରେଜାଣା ଜହନ ସାତା ମାହାପୁରୁ ଅଣ୍ଟପୁତି ବଲୁ ଝେହ୍‌ନାସି ଇଞ୍ଜା ମାନୁଝି ଆହିମାଚେରି ।” ୩୩ ଏଦାଆଁତାକି ଜୀସୁଇଁ ଏଝାରି ଏଲେଇଚେରି, “ମାମ୍ବୁ ପୁଞ୍ଜାହିଲଅମି ।” ଜୀସୁ ଏଝାରାଇଁ ଏଲେଇଚେସି, “ନାନୁ ଆମିନି ଅଦିକାରୀ ତଲେ କିହିମାଇଁ ଏଦାଆଁ ନାନୁ ଜିକେଏ ମିଙ୍ଗେ ଝେସ୍ତାଆଁ ।”

୧୨

ଅଞ୍ଜୁରି ବାଡ଼ାତା ଲାଗେଏତି ବାଡ଼ା କାମାକିନାରି

(ମାତି ୨୧:୩୩-୪୭; ଲୁକ ୨୦:୯-୧୯)

୧ ଏମ୍ବାଟିଏ ଏଝାସି ଏଝାରାଇଁ ପୁଣ୍ଡିକିନି କାତାତଲେ ଝେସାଲି ମାଟ୍‌ହେସି, “ରଥସି ର ଅଞ୍ଜୁରି ବାଡ଼ା କିହାନା ବାଡ଼ା ସାରିଝାକି ବେୟିଁ ଗୁର୍ତେସି, ଇଞ୍ଜା ଅଞ୍ଜୁରି ପାଡ଼େୟି ପାଚାଲି ର ଗାଡ଼ୁୟି କାର୍‌ହାନା ଏମ୍ବାଆଁ କାଃଆନାରାକି କାଃଆନି ଇଲୁ କେପିତେସି, ଇଞ୍ଜା

† ୧୧:୩୦ ୧୧:୩୦ ମୁଞ୍ଜନାୟି

କାମା କିନାରାକି ଏ ବାଡ଼ା ବାଗା ହୀହାନା ହେକ ରାଜି ହାଚେସି । ୨ ତାୟୁ କାମାକିନାରି ତାଣାଟି ଅଜ୍ଞୁରି ବାଡ଼ାତି ପାଡ଼େୟି ବାଗା ବେଟାଆହାଲି ଏଝାସି ର ହଲେଏଣାଲ୍ ପାଡ଼େୟି କାମ୍ବିନିଝେଡ଼ା ଏଝାରିତାଣା ପାଣ୍ଡିତେସି । ୩ ସାମା ଏଝାରି ଏଝାଣାଲ୍ ଆସାନା ଝେତେରି ଇଞ୍ଜା ଝାରଇ କେୟୁଟି ପାଣ୍ଡିତେରି । ୪ ଏଝାସି ଅଡ଼େ ଏଝାରିତାଣା ଅଡ଼େ ର ହଲେଏଣାଲ୍ ପାଣ୍ଡିତେସି; ଏଝାରି ଏଝାଣାଲ୍ ଜିକେଏ ତାୟୁ ଡ଼ାୟେ ଝେଚାନା ହୀଣି କିତେରି । ୫ ଏଝାସି ଅଡ଼େ ରଅଣାଲ୍ ପାଣ୍ଡିତେସି; ଏଝାରି ଏଝାଣାଲ୍ ଜିକେଏ ପାୟିତେରି, ଏମ୍ବାଟିଏ ଏଝାସି ଅଡ଼େ ହାଚେକା ଜାଣାତି ପାଣ୍ଡିତେସି; ଏଝାରି ବିତାଟି ଏଚରଜାଣାତି ଝେତେରି ଇଞ୍ଜା ଏଚରଜାଣାତି ପାୟିତେରି । ୬ ତାନି ତାଣା ରଅସିଏ ଡ଼ୟିତେସି, ଏଝାସି ତାନି ଜୀଝୁତି ମୀରଏସି, ତାୟୁ ଅଣ୍ଡିତେସି ଏଝାରି ନା ମୀରଏଣାଲ୍ ମାଦି କିନେରି' ଇଞ୍ଜା ଏଝାସି ଏଝାଣାଲ୍ ପାଣ୍ଡିତେସି । ୭ ସାମା ଏ କାମାକିନାରି ତାୟୁ ଡ଼ାୟୁ କାତା ଆଡ଼େରି, 'ଇଝାସିତ ଅଦିକାରା ଗାଟାସି, ଝାଦୁ ଇଝାଣାଲ୍ ପାୟିନ; ଆତିହ ବାଡ଼ାତି ଅଦିକାରା ମାଦି ଆନେ ।' ୮ ଏମ୍ବାଟିଏ ଏଝାରି ଏଝାଣାଲ୍ ଆସାନା ପାୟିତେରି ଇଞ୍ଜା ଅଜ୍ଞୁରି ବାଡ଼ାତି ପାଜାତା ମେଡ଼ହାଡ଼ୁସ୍ତେରି ।”

୯ ଜୀୟୁ ଏଝାରାଲ୍ ଝେଚେସି, “ଝେସ୍ତାଦୁ, ଇଦାଆଁ ତାୟୁ ଏ ଅଜ୍ଞୁରି ବାଡ଼ାତି ସାଝୁକାରି ଏନାଆଁ କିନେସି ? ଏଝାସି ଝାହାନା କାମା କିନାରାଲ୍ ନାସା କିନେସି ଇଞ୍ଜା ଏଚକାତି କାମା କିନାରାକି ଏ ଅଜ୍ଞୁରି ବାଡ଼ା ହୀନେସି । ୧୦ ମୀରୁ ଦାମ୍ବୁ ପତିତା ଇ କାତା ପଡ଼ଝି ଆହାହିଲଅତେରି ?

ଇଲୁ କେପିନାରି ଆମିନି ଝାଲିତି ମିଣ୍ଡଏ ଇଞ୍ଜା ଅପାଆତେରି,
ଏଦିଏ ଇଲୁତି ମୂଲୁ ଝାଲି ଆଡ଼େ ।

୧୧ ମାହାପୁରୁ ତାଣାଟି ଇଦି ଆଡ଼େ,

ଇଞ୍ଜା ଏଦି ମା କାନୁତାକି ର କାବା ଆନାୟି ।”

୧୨ ଏଚେଟିଏ ଜୀହୁଦି ଲକୁଡି କାଜାରି ଏଝାଣାଲ୍ ଆସାଲି ଅଣ୍ଡିମାଚେରି, ସାମା ଏଝାରି ଲକୁଣି ଆଜିତେରି; ଇଚିହ ଏ ପୁଣ୍ଡିକିନି କାତା ଏଝାରାଲ୍ ସିନକିହାନା ଝେସିମାଚେସି ଇଞ୍ଜା ପୁଚେରି, ଇଞ୍ଜା ଏଝାରି ଏଝାଣାଲ୍ ପିସାନା ହାଜାଡ଼ୁସ୍ତେରି ।

ସିସ୍ତ୍ର ହୁାନାଣି ଖେନାୟି
(ମାତି ୨୨:୧୫-୨୨; ଲୁକ ୨୦:୨୦-୨୬)

୧୩ ତାୟୁ ଜୀସୁ କାତାତି ଦହ ଆସାଲି ତାକି ଏଝାରି ପାରୁସି ଅଡେ ହେରଦ ଗଚିତି ଏଚେକା ଲକୁଣି ଏଝାଣି ତାଣା ପାଣ୍ଡିତେରି । ୧୪ ଏଝାରି ଝାହାନା ଏଝାଣାଲ୍ ଏଲେଇଚେରି, “ଏ ଗୁରୁ ମାମ୍ସୁ ପୁଞ୍ଜାମାନମି, ନୀନୁ ସାତା କାତା ଖେହନାତି ଅଡେ ଆମ୍ବାଆରାଲ୍ ଆଜାଆ ଗାଟାତି; ଇଚିହ୍ମ ନୀନୁ ମାଣ୍ଡିତି ମ୍ମୁମ୍ମେସାନା ଜଲ୍ଲାଆ ଗାଟାତି ଇଞ୍ଜା ସାତା ତଲେ ମାହାପୁରୁତି ଜିରୁ ଜାପ୍ନାତି, କାୟିସରକି ସିସ୍ତ୍ର ହୁାନାୟି ମେରା କି ଆଏ, ମାମ୍ସୁ ହୁାନମି କି ଆଏ ?”

୧୫ ସାମା ଏଝାସି ଏଝାରି କାର୍ବିତି ପୁଞ୍ଜାନା ଏଝାରାଲ୍ ଏଲେଇଚେସି, “ଏନାଆଁତାକି ନାଙ୍ଗେ ତାୟିପାରି କିହିମାଞ୍ଜାଦେରି ? ର ଖେଣ୍ଡି ଟାକା ନା ତାଣା ତାଦୁ ନୀନୁ ଏଦାଆଁ ସିନିକିଲ୍ ।”

୧୬ ଏଚେଟିଏ ଏଝାରି ଏଦାଆଁ ତାତେରି, ଏଝାସି ଏଝାରାଲ୍ ଖେଚେସି, “ଇ ବମା ଅଡେ ଦରୁ ଆମ୍ବାଆରାଝାୟି ?” ଏଝାରି ଏଝାଣାଲ୍ ଏଲେଇଚେରି, “କାୟିସରଝାୟି ।”

୧୭ ଏମ୍ବାଟିଏ ଜୀସୁ ଏଝାରାଲ୍ ଏଲେଇଚେସି, “କାୟିସରଝାୟି ଏନାୟି ଏଦାଆଁ କାୟିସରକି ହୀଦୁ; ଇଞ୍ଜା ମାହାପୁରୁଝାୟି ଏନାୟି ଏଦାଆଁ ମାହାପୁରୁକି ହୀଦୁ ।” ଏଚେଟିଏ ଏଝାରି ଏଝାଣି କାତାତାକି କାବା ଆଡେରି ।

ସାଦୁକିୟାଁ ହାକିଟି ଖେଣ୍ଡେ ନିଜ୍ଜିନି କାତା ଖେନାୟି
(ମାତି ୨୨:୨୩-୩୩; ଲୁକ ୨୦:୨୭-୪୦)

୧୮ ☆ଏମ୍ବାଟିଏ ହାକିଟି ଖେଣ୍ଡେ ନିଜ୍ଜିନାୟି ହିଲେଏ ଇଞ୍ଜିମାନି ସାଦୁକି ଲକୁ ଜୀସୁ ତାଣା ଝାହାନା ଖେଚେରି, ୧୯ “ଏ ଗୁରୁ ମସା ମାଙ୍ଗେତାକି ରାଟାମାନେସି, ଇଚିହ୍ମ ଆମ୍ବାଆରି ତାୟି ହାନେସି ଇଞ୍ଜା ତାନି ତକ୍ତି ନୀତାମାନେ ଇଞ୍ଜା ଏଦାନି ଏନି କକାରି ପଦାୟାଁ ହିଲାଉ ଆତିହ୍ମ ତାନି ତାୟି ତାନି ତକ୍ତିନି ଇଟାନା ତାନି ତାୟିକି କୁଡ଼ା ଏପାକିନେସି । ୨୦ ମେହ୍ମୁ ସାତା ଜାଣା ତାୟିୟାଁ ମାଚେରି; କାଜାସି ର ଆୟାନି ବୀହା ଆଡେସି, ଇଞ୍ଜା କକାରି ପଦାଁ ଆଆନା ହାଡେସି; ୨୧ ଏଝାଣି ଜେଚତାସି

☆ ୧୨:୧୮ ୧୨:୧୮ କାମା ୨୩:୮

ଏ ଇୟାନି ଇଚିତେସି ଇଞ୍ଜା କକାରି ପଦାଁ ଆଆନା ହାତେସି; ଅଡ଼େ ଜେତତାସି ଏଲେକିତେସି, ^{୨୨} ଇଞ୍ଜା ସାଡ଼ା ଜାଣା ଜିକେଏ କକାରି ପଦାଁ ଆଆନା ହାଡ଼େରି; ବାରେତି ତାୟୁ ଏ ଇୟା ଜିକେଏ ହାଡ଼େ । ^{୨୩} ଖେଶ୍ଟେ ନିଜ୍ଜିନି ବେଲାତା ଏଚିବେଲା ଏଞ୍ଜାରି ନିଜ୍ଜିନେରି, ଏଚିବେଲା ଏଞ୍ଜାରି ବିତ୍ରାଟି ଆମ୍ବାଆରି ତକ୍ତି ଆନେ ? ସାଡ଼ା ଜାଣା ଜିକେଏ ଇଟାମାଚେରି ।”

^{୨୪} ଜୀସୁ ଏଞ୍ଜାରାଇଁ ଏଲେଇଚେସି, “ମିଙ୍ଗେ ହାରେକା ନାଡ଼ିକିନି ଅଣ୍ଡୁ ମାନେ । ଦାମ୍ବୁ ସାଡ଼େସ୍ତରି, ଇଞ୍ଜା ମାହାପୁରୁତି ବାଡ଼ୁୟୁତି କାତା ପୁଞ୍ଜାହିଲଅଚେରି । ^{୨୫} ଏନାଆଁତାକି ଇଚିହିଁ ହାଡ଼ାରି ନିଜ୍ଜିତି ତାୟୁ ଲକୁ ବୀହା ଆଅରି କି ବୀହା ହୀଅରି, ସାମା ଲାକପୁରୁତି ଦୂଡ଼ୁୟାଲେହେଁ ତୟିନେରି । ^{୨୬} ଇଞ୍ଜା ହାଡ଼ାରି ନିଜ୍ଜିନେରି ଏ କାତାତି ମୀରୁ ମସା ରାଡ଼ିତି ପତିତା ଖେହିମାନି ବୃଟାତି କାରୁ ପଡ଼ୁଞ୍ଜି ଆହାହିଲଅଚେରି କି ? ମାହାପୁରୁ ଏନିକିଁ ଏଲେଇଞ୍ଜା ମାନେସି, ‘ନାନୁ ଅବ୍ରାହାମତି ମାହାପୁରୁ, ଇସାହାକତି ମାହାପୁରୁ, ଅଡ଼େ ଜାକୁବତି ମାହାପୁରୁତେଏଁ ।’ ^{୨୭} ଏଞ୍ଜାସି ହାଡ଼ାରି ମାହାପୁରୁ ଆଏ, ସାମା ଜୀଞ୍ଜୁଗାଟାରି ମାହାପୁରୁ ମୀରୁ ହାରେକା ନାଡ଼ିକିଞ୍ଜି ଆହାମାଞ୍ଜରି ।”

କାଜା ହୁକୁମି

(ମାତି ୨୨:୩୪-୪୦; ଲୁକ ୧୦:୨୫-୨୮)

^{୨୮} ଏଚିବେଲା ର ମେରା ଜାପ୍ନାସି ତାଗେ ଖାହାନା ଏଞ୍ଜାରି ବାଦିବାଦା ଆହିମାଚାଣି ଖେଞ୍ଜାନା ଅଡ଼େ ଜୀସୁ ସାଦୁକି ଲକୁଇଁ ସମାନା କାତା ଖେଶ୍ଟେ ଖେସିମାଚାଣି ଖେଞ୍ଜାନା ଜୀସୁଇଁ ଖେଚେସି, “ଆମିନି ହୁକୁମି ଦାମ୍ବୁପତିତା ବାରେକିହାଁ କାଜାୟି ?”

^{୨୯} ଜୀସୁ ଏଲେଇଚେସି, “କାଜା ହୁକୁମି ଇଦି ‘ଏ ଇସ୍ରାୟେଲ ଖେଞ୍ଜୁ; ପ୍ରବୁ ମା ମାହାପୁରୁ ରଣ୍ଡିଏ ପ୍ରବୁ ମାନେସି; ^{୩୦} ଅଡ଼େ ନୀନୁ ନୀ ବାରେ ହିୟା ବାରେ ଜୀଞ୍ଜୁ ମନ ହୀହାନା ଅଡ଼େ ବାରେ ବାଡ଼ୁୟୁ ତଲେ ପ୍ରବୁ ନୀ ମାହାପୁରୁଇଁ ଜୀଞ୍ଜୁ ନମୁ ।’ ” ^{୩୧} ଅଡ଼େ ରଣ୍ଡି ଇଦି ନୀନୁ ନୀ ପାଡ଼ିତାଣାଇଁ ନୀ ଜାହାରାଲେହେଁ ଜୀଞ୍ଜୁ ନମୁ । ଇ ହୁକୁମିକା ପିସ୍ପେ ଅଡ଼େ ଆମିନି କାଜା ହୁକୁମି ହିଲେଏ ।

୩୨ ଏମ୍ବାଟିଏ ଏ ଫେରା ପୁନାସି ଜୀସୁଇଁ ଏଲେଇରେସି, “ଏ ଗୁରୁ ଏଡ଼ି ସାତା ମାହାପୁରୁ ରଅସିଏ ଇଞ୍ଜା ଏଞ୍ଜାଟି ପିସ୍‌ପେ ଅଡ଼େ ଆମ୍ବାଆସି ହିଲଅସି, ଏଦାଆଁ ନୀନୁ ନେହଁ କିଁ ଖେସ୍ତାତି; ୩୩ ଇଞ୍ଜା ବାରେ ହିୟାଁ, ବାରେ ବୁଦି, ବାରେ ବାଡ଼ୁୟୁ ହୀହାନା ଏଞ୍ଜାଣାଇଁ ଜୀସୁନନାୟି ଇଞ୍ଜା ପାଡ଼ିତାଣାଇଁ ମା ଜାହାରାଲେହେଁ ଜୀସୁନନାୟି ବାରେ ଜନ୍ତୁତି ପୂଜା ହାନି* କିହାଁ କାଜାୟି ।”

୩୪ ☆ଏଞ୍ଜାସି ବୁଦିତଲେ ଜଳାମାଞ୍ଜାନେସି ଇଞ୍ଜିଁ ମେସାନା ଜୀସୁ ଏଞ୍ଜାଣାଇଁ ଏଲେଇରେସି, “ମାହାପୁରୁତି ରାଜିଟି ନୀନୁ ହେକ ହିଲଅତି । ଏଚେଟିଏ ଆମ୍ବାଆସି ଜୀସୁଇଁ ଏନାଆଁ ଖେଞ୍ଜାଲି ସାସା କିଆତେସି ।”

କ୍ରୀସ୍ତୁ ଆମ୍ବାଆରି ମୀରଏସି
(ମାତି ୨୨:୪୧-୪୭; ଲୁକ ୨୦:୪୧-୪୪)

୩୫ ସାମା ଜୀସୁ ପ୍ରାଡାନା ଇଲୁତା ଜାପୁହି ମାଟିବେଲତା ଏଲେଇରେସି, “କ୍ରୀସ୍ତୁ ଦାସୁଦ ମୀରଏସି, ଇଦାଆଁ ଫେରାପୁନାରି ଏନିକିଁ ଏଲେଇନେରି? ୩୬ ତାନୁଏ ଦାସୁଦ ମାହାପୁରୁତି ସୁଜୀସୁ ବେଟାଆହାନା ଖେସାମାରେସି, ପ୍ରବୁ ନା ପ୍ରବୁଇଁ ଏଲେଇରେସି,

ନାନୁ ଏଚେ ପାତେକା ନୀ ସାଡୁୟାଁଇଁ ନୀ କଡ଼ାଁ ଡ଼ଇ କିହାହିଲଅଁ,
ଏଚେ ପାତେକା ନା ଚିଃନିଞ୍ଜାକି କୁଗାମାନାମୁ ।’

୩୭ ଦାସୁଦ ତାନୁଏ ଏଞ୍ଜାଣାଇଁ ପ୍ରବୁ ଇଞ୍ଜିମାନେସି; ଆତିହଁ ଏଞ୍ଜାସି ଏନିକିଁ ଦାସୁଦ ମୀରଏସି ।” ।

ଫେରାପୁନାରି ତାଣାଟି ଜାଗ୍ରାତା କିନାୟି
(ମାତି ୨୩:୧-୩୬; ଲୁକ ୨୦:୪୫-୪୭)

୩୮ ମାନ୍ଦା ଲକୁ ରାହାଁଟି ତାନି କାତା ଖେଞ୍ଜିମାରେରି, ଅଡ଼େ ଖେଣ୍ଡେ ଏଞ୍ଜାସି ତାନି ଜାପୁହି ମାଟି କାତାତା ଏଲେଇରେସି, “ଫେରାପୁନାରି ତାଣାଟି ଜାଗ୍ରାତା, ଏଞ୍ଜାରି ଲାମ୍ବା ହିମ୍ବୁରିକା ହୁଚାନା ରେଜାଲି ଇଞ୍ଜା ହାଟା ବାଜାରାତା ଜହରା ବେଟାଆହାଲି ରାହାଁ ଆନେରି, ୩୯ ଜୀହୁଦି ଲକୁତି କୁଟମି ଇଲୁତା† କାଜା କୁଟି, ବଜିତା ନେହଁ ଗାୟୁତା

* ୧୨:୩୩ ୧୨:୩୩ ହେରୁପିନାୟି ☆ ୧୨:୩୪ ୧୨:୩୪ ଲୁକ ୧୦:୨୫-୨୮ † ୧୨:୩୯ ୧୨:୩୯ ସିନଗର

କୁଗାଲି ପାରିନେରି; ୪୦ ଏଞ୍ଜାରି ରାଢ଼େଣିସିକା ଇଲକା ସେନ୍ଦିନେରି, ଲକ୍ଷୁଣି ତସାଲି ଲାମ୍ବା ପ୍ରାଡ଼ାନା କିନେରି; ଏଞ୍ଜାରି ହାରେକା ତଣ୍ଡ ବେଟାଆନେରି ।”

ରାଢ଼େଣି ଇୟାନି ଦାନା
(ଲୁକ ୨୧:୧-୪)

୪୧ ତାୟୁ ଜୀସୁ ମାହାପୁରୁ ଇଲୁତି ଦାନା ପେଡ଼ା ତାଗେ କୁଗାନା ଲକ୍ଷୁ ଏମ୍ବାଆଁ ଏନିକ ଦାନା ହାହିମାନେରି, ଏଦାଆଁ ସିନିକିହିମାଚେସି । ଏଚିବେଲାତା ହାରେକା ଦନ ଗାଟାରି ଗାଡ଼ି ମେଡ଼ହେରି; ୪୨ ଅଡ଼େ ର ହାକି କାକୁଲିଗାଟି ରାଢ଼େଣି ଇୟା ଖାହାନା ରୀ ଢ଼ଣା ତାମ୍ବାତି ଆଦଲି‡ ଏ ପେଡ଼ାତା ମେଡ଼ହେ । ୪୩ ଏଚେଟିଏ ଜୀସୁ ତାନି ସୀସୁଣି ତାଗେ ହାଟାନା ଏଲେଇଚେସି, “ନାନୁ ମିଜେ ସାତା ଖେସିମାଞ୍ଜାଇ, ଦାନା ପେଡ଼ାତା ଟାକାୟା ମେଡ଼ହିମାନି ବାରେ ଲକ୍ଷୁ କିହାଁ ଇ ହାକି କାକୁଲିଗାଟି ରାଢ଼େଣି ଇୟା ଗାଡ଼ି ମେଡ଼ହାମାନେ; ୪୪ ଇଚିହି ବାରେଜାଣା ତାନି ହାରେକା ଦନଟି ଇଚାଣି ମେଡ଼ହା ମାନେରି, ସାମା ଇଦି ତାନି ହିଲାଆବେଲାତା ତାଜେ ନୀତାଲି ତାଜେ ଏନାୟି ମାଚେ, ଏ ବାରେ ମେଡ଼ହାମାନେ ।”

୧୩

ପ୍ରାଡ଼ାନା ଇଲୁ ନସ୍ତ ଆନାଣି ଜୀସୁ ଖେହ୍ନାୟି
(ମାତି ୨୪:୧-୨; ଲୁକ ୨୧:୫-୭)

୧ ଜୀସୁ ମାହାପୁରୁ ଇଲୁଟି ହାଜିମାଚାଟି ତାନି ସୀସୁୟାଁ ବିତ୍ରାଟି ରଅସି ଏଞ୍ଜାଣାଇ ଏଲେଇଚେସି, “ଏ ଗୁରୁ ମେହ୍ନୁ ଏନିଲେହେତି ଅଜିତି ଖାଲକା ଅଡ଼େ ଏନିଲେହେତି ଅଜିତି ମେଡ଼ା ଇଲକା !”

୨ ଏଚେଟିଏ ଜୀସୁ ଏଞ୍ଜାଣାଇ ଏଲେଇଚେସି, “ନାନୁ ଏନାଆଁ ଇ କାଜା ମେଡ଼ା ମେସିମାଞ୍ଜି ? ର ଖାଲି ଅର ଖାଲି ଲାକ ତୁୟେଏ, ବାରେ ମେଣ୍ଟାହାନୁ ।”

କସ୍ତ୍ର ଅଡ଼େ ସାସ୍ତି କାତା ଖେହ୍ନାୟି
(ମାତି ୨୪:୩-୧୪; ଲୁକ ୨୧:୭-୧୯)

‡ ୧୨:୪୨ ୧୨:୪୨ ରୀ ଢ଼ଣା ତାମ୍ବାତି ଆଦଲି, ରୀ ଆଟାଅଣା ର ଟାକାତି କାଜା ଆଦଲି ସମାନା, ଏଦି ଗ୍ରିକ୍ ତଲେ ଢ଼ଣା ଆଦଲିତି “ଲେପଟସ” କାଜା ଆଦଲିତି “କତ୍ରାନଟସ” ଇନେରି ।

୩ ତାହା ପ୍ରାଚୀନ ଇଲୁ ନକିତା ମାନି ଜୀବ ହରୁ ଲାକ କୁଗାଲିଏ ପିତର, ଜାକୁବ, ଜହନ, ଅଡ଼େ ଆନ୍ଦ୍ରିୟ ତାନି ତାଣା ମେଣେଏ ଝାହାନା ଝେରେରି, “ଇ ବାରେ ଏରେଲା ଆନେ, ୪ ଅଡ଼େ ଆମିନି ବେଲାତା ଇ ବାରେ ଗଟଝି ଆନେ ଏ ବେଲାତି ସିନା ଏନାୟି, ଏଦାଆଁ ମାଙ୍ଗେ ଝେସ୍ତାମୁ ।”

୫ ଏମ୍ବାଟିଏ ଜୀସୁ ଏଝାରାଇଁ ଏଲେଇଚେସି, “ଜାଗ୍ରାତା, ଆମ୍ବାଆସି ଏନିକିଁ ମିଙ୍ଗେ ନାଡ଼ି କିୟଅସି । ୬ ହାରେକା ନା ଦରୁତଲେ ଝାହାନା, ‘ନାନୁ ଏଝାତେଏଁ’ ଇଞ୍ଜିଁ ହାରେକା ଲକୁଣି ନାଡ଼ି କିନେରି । ୭ ସାମା ମୀରୁ ଏଚିବେଲା ଜୁଜୁତି କାତା ଅଡ଼େ ଗଡ଼ହାତି ହାଡ଼ା ଝେଞ୍ଜେରି, ଏଚିବେଲା କିଲିବିଲି ଆଆଦୁ; ଏ ବାରେ ଆନାୟି ମାନେ, ସାମା ଏ କାଲା ଜିକେଏ ଜୁଗୁ ରାନାୟି ଆଏ । ୮ ଇଚିହଁ ଦେସା କପାଟି ଦେସା, ରାଜି କପାଟି ରାଜି ନିଙ୍ଗନେ, ବାରେଝାକି ବୁମି ଝୀତିନେ ଅଡ଼େ କାଡ଼ାରା ଆନେ; ଇ ବାରେ କକାରି ପଦାୟି ଆନାଟି ଲୁଞ୍ଜିନି ବାସା ଲେହେଁ ।”

୯ ✧ ସାମା ମୀରୁ ମିଙ୍ଗେ ତାକି ଜାଗ୍ରାତା ଆହାମାଞ୍ଜୁ; ଲକୁ ମିଙ୍ଗେ ନୀହାୟି କିନି ତାଣା ଦସାନା ଅୟାନେରି, ଅଡ଼େ ମିଙ୍ଗେ ଜୀହୁଦି ଲକୁଡ଼ି କୁଟମି ଇଲକାଣା* ଝେତାନେରି, ଇଞ୍ଜା ନା ତାକି ସାଲଝି କିନାରି ତାଣା ରାଜାୟି ନକିତା ନିଦେରି, ଏଝାରି ନକିତା ସାକି ଆଦେରି । ୧୦ ଇଞ୍ଜା ବାରେ କୃଡ଼ା ନକିତା ନେହଁ କାବୁ ନଚକଏ ଝେସ୍ପି ଆନେ । ୧୧ ଇଞ୍ଜା ଏଚିବେଲା ଲକୁ ମିଙ୍ଗେ ଅହାନା ହେରପାନେରି, ଏଚିବେଲା ମୀରୁ ଏନାଆଁ ଜଲିଦେରି, ଏ କାତା ନଚକଏ ଅଣ୍ପାଆଦୁ, ସାମା ଏ ବେଲାତା ମିଙ୍ଗେ ଏନାଆଁ ଜଲଲି ହୀପକିଆନେ ଏଦାଆଁ ଝେହୁଦୁ; ଇଚିହଁ ମୀରୁ ଜଲିନାତେରି ଆଏ ସାମା ସୁଦୁଜୀଝୁ ଜଲିନାୟି । ୧୨ ତାୟି ତାୟିଇଁ ଅଡ଼େ ତାଞ୍ଜି ମୀରଏଣାଇଁ ହାହାଲି ତାକି ହେରପିନେରି; ଇଞ୍ଜା ମୀରକା ତାଲି ତାଞ୍ଜି କପାଟି ନିଙ୍ଗନା ଏଝାରାଇଁ ପାୟିନେରି; ୧୩ ✧ ଅଡ଼େ ନାଙ୍ଗେତାକି ବାରେ ଲକୁ ମିଙ୍ଗେ ଅପଅରି; ସାମା ଆମ୍ବାଆସି ରାଜି ପାତେକା ସାସା ଆସାନା ଡ଼ୟିନେସି ଏଝାସି ଗେଲ୍ପି ଆନେସି ।

✧ ୧୩:୯ ୧୩:୯ ମାତି ୧୦:୧୭-୨୦; ଲୁକ ୧୨:୧୧,୧୨

* ୧୩:୯ ୧୩:୯ ସିନଗର

✧ ୧୩:୧୩ ୧୩:୧୩ ମାତି ୧୦:୨୨

ନାସା ଆନି କାଲମି
(ମାତି ୨୪:୧୫-୨୮; ଲୁକ ୨୧:୨୦-୨୪)

୧୪ ମାରୁ ଏଚିବେଲା ଏ ନାସାକିନି ଅପାଆଗାଟି ଆସ୍ତି ଆମିନି ତାଣା ଡ଼ୟିନି କାତା ହିଲେଏ, ଏମ୍ପାଆଁ ଡ଼ୟାମାନାଣି ମେହ୍‌ଦେରି (ପଡ଼଼ି ଆନାରି ତେଲହାପେରି) ଏଚିବେଲା ଆମ୍ପାଆରି ଜୀହୁଦା ଦେସାତା ମାନେରି, ଏଞ୍ଜାରି ହରକାଣା ହଣପେରି; ୧୫ ✨ଆମ୍ପାଆସି ଇଲୁ ଲାକ ମାନେସି, ଏଞ୍ଜାସି ଇଲୁ ବିତ୍ରା ଖାହାନା ଏନି ଦିଶ୍‌ସୁ ଅହାଲି ରେତା ଖାଆପେସି କି ବିତ୍ରା ହାଲାଆପେସି; ୧୬ ଇଞ୍ଜା ଆମ୍ପାଆସି ବାଡ଼ାତା ମାନେସି, ଏଞ୍ଜାସି ତାନି ହିମ୍ପରି ଅହାଲି ଖେଣ୍ଡେ ଖାଆପେସି । ୧୭ ଏ ବେଲାତା ଆମିନି ଗାଟାଇ ପୁରାମାସା ଆହାମାନୁ ଇଞ୍ଜା ପାଲୁ ଉଚ୍‌ହିମାନୁ, ଏ ଦିନା ଆୟତା ଏଞ୍ଜି ଏଚେକା କସ୍ତୁ ବେଟାଆନୁ । ୧୮ ସାମା ଏଦି ଏନିକିଁ ପେନି ବେଲାତା ଆଏ ଏଦାଆଁତାକି ପ୍ରାତାନା କିଦୁ । ୧୯ ✨ଇଚିହ୍‌ ଏ କାଲାତା ଇଲେତି କସ୍ତୁ ଖାନ୍, ମାହାପୁରୁ ଗାଡ଼ିକିତି ଦିନାଟିଏ ନୀଞ୍ଜୁପାତେକା ଏଲେକିଁ ଆହା ହିଲେଏ, ଇଞ୍ଜା ଏଲେକିଁ ଏଚେଲାଞ୍ଜା ଆଏ । ୨୦ ସାମା ପ୍ରୁ ଏ ଲାଗେଏତି କାଲାଇଁ ଉଣା କିହାମାନେସି । ଏଲେ କିହାହିଲାଆତମା, ଏଦି ଏମ୍ପାଟି ଆମ୍ପାଆରି ଗେଲ୍‌ପି ଆଆତେରିମା । ତାନି ଆଚ୍‌ଞ୍ଜିଆଡ଼ି ଲକୁତାକି ଏ କାଲା ଉଣା କିହାମାନେସି ।

୨୧ “ଏଚିବେଲା ‘ମେହ୍‌ଦୁ କ୍ରୀସ୍ତ ଇମ୍ପାଆଁ’ ଅଡ଼େ ‘ଏମ୍ପାଆଁ’ ଇଞ୍ଜିଁ ଲକୁ ମିଙ୍ଗେ ଖେସ୍ତାନେରି, ଆଡ଼ିହ୍‌ ମାରୁ ଏଦାଆଁ ନାମାଆଦୁ । ୨୨ ନାଡ଼ିକିନି କ୍ରୀସ୍ତ ଅଡ଼େ ମାହାପୁରୁ ବଲୁ ମିତି ଖେହ୍‌ନାରି ନିଙ୍ଗାନା ଇଲେତି ସିନା ଅଡ଼େ କାବାଆନି କାମାୟା ତହ୍‌ନେରି, ଆଡ଼ିତିହ୍‌, ଆଚ୍‌ଞ୍ଜିଆଡ଼ି ଲକୁଣି ଜିକେଏ ନାଡ଼ି କିନେରି । ୨୩ ସାମା ମାରୁ ଜାଗ୍ରାତା ଆହାମାଞ୍ଜୁ; ନାନୁ ମିଙ୍ଗେ ତଲିଏ ବାରେ ଖେସିମାଞ୍ଜାଇଁ ।

ମାଣସି ମାର୍‌ଏସି ଖେଣ୍ଡେ ଖାନାୟି
(ମାତି ୨୪:୨୯-୩୧; ଲୁକ ୨୧:୨୫-୨୮)

୨୪ ✨ସାମା ଏ ବେଲାତି ଏ କସ୍ତୁ ଡାୟୁ ଖେଡ଼ା ଆନ୍ଦେରି ଆନ୍ଦେ ଅଡ଼େ ଲେଞ୍ଜୁ ଉଜେଡ଼ି ହାଏ, ୨୫ ✨ହୁକାୟାଁ ହାଗୁଟି ତରଗାଲି ମାଚ୍‌ନୁ ଅଡ଼େ

✨ ୧୩:୧୫ ୧୩:୧୫ ଲୁକ ୧୭:୩୧ ✨ ୧୩:୧୯ ୧୩:୧୯ ଖେ ବଲୁ ୭:୧୪ ✨ ୧୩:୨୪ ୧୩:୨୪ ଖେ ବଲୁ ୭:୧୨ ✨ ୧୩:୨୫ ୧୩:୨୫ ଖେ ବଲୁ ୭:୧୩

ହାଗୁ ଲାକଡ଼ି ବାଡ଼ୁଛୁ ବାରେ କିଲିବିଲି ଆନ୍ଦେ । ୨୭ ☆ଏତିବେଳା ଲକ୍ଷ୍ମୀ ମାଣସି ମୀରୁଏଣାଇ କାଜା ବାଡ଼ୁଛୁଟି କାଜାପାଣା ତଲେ ହାଗୁ ଲାକଡ଼ି ଖାନାଣି ମେହ୍ନେରି । ୨୭ ଏତିବେଳା ଏଞ୍ଜାସି ଦୂତୁୟାଣି ପାଣ୍ଡାନା ଦାରତି ମୁଟପେତି ସାରିଞ୍ଜାକିଟି ତାନି ଆଡ଼ାମାନି ଲକ୍ଷ୍ମଣି ରୁଣ୍ଡା କିନେସି ।

ତୟା ମାରୁନୁଟି ଜାପିନାୟି
(ମାତି ୨୪:୩୨-୩୫; ଲୁକ ୨୧:୨୯-୩୩)

୨୮ ତୟା ମାରୁନୁ ପୁଣ୍ଡି କିନି କାତାଟି ଜାପାଦୁ । ଏତିବେଳାତା ଏ ମାରୁନୁତା କଡ଼ଗି କମାୟା ଅଡ଼େ ଗଞ୍ଜେଡ଼ି ଗାଲୁନୁ, କାରା କାଲୁମି ଖାଡ଼େ ଇଞ୍ଜି ପୁଞ୍ଜେରି । ୨୯ ଏଲେକିହି ଏ ମୀରୁ ଜିକେଏ ଇ ବାରେ ମେସ୍ତିସାରେ ଏଞ୍ଜାସି ଦୁଞ୍ଜେରି ତାଗେ ମାନେସି ଇଞ୍ଜି ପୁଞ୍ଜେରି । ୩୦ ନାନୁ ମିଙ୍ଗେ ସାତା ଖେସିମାଞ୍ଜାଇ ଇ ବାରେ ଆଆପାତେକା ଇ କାଲାତି ଲକ୍ଷ୍ମୀ ଏନିଜିକେଏ ମେଣ୍ଡାଅରି । ୩୧ ହାଗୁପାକା ଦାରତି ବାରେ ମେଣ୍ଡାଜିନେ, ସାମା ନା ବଲୁ ଏରେଲାଞ୍ଜା ମେଣ୍ଡାଜେଏ ।”

ଆମ୍ବାଆସି ଇ ଦିନା ଅଡ଼େ ବେଲାତି ପୁନଅସି
(ମାତି ୨୪:୩୬-୪୪)

୩୨ ☆ସାମା ଏ ଦିନା କି କାଲାତି କାତା ଆମ୍ବାଆରି ପୁନଅରି, ଲାକପୁରୁତି ଦୂତୁୟା କି ମୀରୁଏସି ଜିକେଏ ପୁନଅସି, ଖାରଇ ଆବାଦେ ପୁନେସି । ୩୩ ମୀରୁ ଜାଗ୍ରାତା ଆହାନା ମାଞ୍ଜୁ, କାଡ଼ାନା ମାଞ୍ଜୁ; ଇତିହି ଏ ବେଲା ଏରେଲା ଆନ୍ଦେ ଏଦାଆଁ ମୀରୁ ପୁନଅଡେରି । ୩୪ ☆ଏଡ଼ି ଇଲେକିହି, ର ମାଣସି ତାନି ଇଲୁ ପିସାନା ହେକ ରାଜିତା ହାନେସି, ଅଡ଼େ ତାନି ହଲିୟାଙ୍ଗାଣି ବାରେ କାମାତି ଅଦିକାରା ହୀତେସି ଇଞ୍ଜା ଦୁଞ୍ଜେରିତା କାଡ଼ାଲି ଜିକେଏ ହୁକୁମି ହୀତେସି । ୩୫ ଏଦାଆଁତାକି କାଡ଼ାନା ତୟାମୁ; ଇତିହି ନୀନୁ ପୁଞ୍ଜାହିଲଅତି ଇଲୁତି ସାଞ୍ଜୁକାରି ଏରେଲା ଖାନ୍ଦେସି, ମିଡ଼ଅଲା କି ମାଦି ଲାଆୟା, ଖେୟାଆ ନଟକେଏ କି ଖେଡ଼ା ହନି ବେଲାତା ଏଞ୍ଜାସି ଖାନ୍ଦେସି । ୩୬ ଏଞ୍ଜାସି ଦେବୁଣିଏ ଖାଡ଼ିସାରେ ମୀରୁ ହୁଞ୍ଜାମାନାଣି ମେସ୍ତିଆପେସି । ୩୭ ନାନୁ ମିଙ୍ଗେ

☆ **୧୩:୨୭** ୧୩:୨୭ ଖେ ବଲୁ ୧:୭ ☆ **୧୩:୩୨** ୧୩:୩୨ ମାତି ୨୪:୩୬ ☆ **୧୩:୩୪** ୧୩:୩୪ ଲୁକ ୧୨:୩୬-୩୮

ଏହାଆଁ ଝେସିମାଞ୍ଜାଇଁ, ଏହାଆଁ ବାରେଡି ଝେସିମାଞ୍ଜାଇଁ, ଜାଗ୍ରାତା ମାଞ୍ଜୁ
।

୧୪

ଜୀସୁଇଁ ଆସାଲି ପାରୁ ପାରିନାୟି

(ମାତି ୨୭:୨-୫; ଲୁକ ୨୨:୧-୨; ଜହ ୧୧:୪୫-୫୩)

୧ ପିସପିଆନି ପାରୁଁ ଇଞ୍ଜା ପୁଲାଏୟୁ ଆଣ୍ଡାଆତି ରୁଟି ତିନି ପାରୁଁ
ଆହାଲି ରୀ ଦିନା ମାତେ । ଏତିବେଲାତା କାଜା ପୂଜେରାଜା ଇଞ୍ଜା
ମେରା ପୁନାରି ଏନିକିଁ ଏଞ୍ଜାଣାଇଁ ନାଡ଼ିକିହାଁ ଆସାନା ପାୟିନେରି
ଏହାଆଁତାକି ପାରୁ ପାରିମାତେରି । ୨ ଇଚିହଁ ଏଞ୍ଜାରି ଏଲେଇଚେରି,
“ପାରୁଁ ବେଲାତା ଆଏ ଏଚେତା ଲକୁ ଗଡ଼ହା କିନେରି ।”

ବେତନିୟାତା ଜୀସୁ ତାୟିଁ ତୁ ନିୟୁଁ ଝାକ୍ନାୟି

(ମାତି ୨୭:୬-୧୩; ଜହ ୧୨:୧-୮)

୩ ଜୀସୁ ବେତନିୟାତା କାଜା ରଗାଗାଟି ସିମନ ଇଜ ତିଞ୍ଜାଲି
କୁଗାମାଚାଟି ର ଇୟା ର ଗାଜୁତା ହାରେକା ଦାରାତି ଗାନ୍ଦା ନିୟୁଁ
ତାତାନା ଗାଜୁତି ଦେତାନା ଜୀସୁ ତାୟିଁ ତୁ ଝାକ୍ନାଲି ମାଟ୍‌ହେ ।
୪ ସାମା ଏଚେକା ଲକୁ କାରବି ଆହାନା, ତାମ୍‌ତାମ୍‌ସୁ ଝେସପି
ଆଚେରି, “ନିୟୁଁ ଏହାଆଁତାକି ନସ୍ତ ଆଚେ ? ୫ ଇ ନିୟୁଁ ସାତାକଡ଼ି
ଦସଗକା କିହାଁ ଆଗାଡ଼ା ପାରୁପି ଆହାନା ହାକି ଗାଟାରାକି ହୀପକି
ଆହାଲି ଆଡ଼ିଦେମା” ଏହାଆଁତାକି ଏଞ୍ଜାରି ଏ ଇୟାନି ଲାଗାଲି
ମାଟ୍‌ହେରି ।

୬ ସାମା ଜୀସୁ ଏଲେଇଚେସି, “ଏହାନି ପିହ୍‌ଦୁ; ଏହାଆଁତାକି କସ୍ତ
ହୀହିମାଞ୍ଜେରି ? ଏଡି ନାଞ୍ଜେତାକି ନେହଁ କିହାମାନେ । ୭ ଇଚିହଁ
ହାକି ଗାଟାରି କାଲେଏ ମୀ ତାଣା ମାନେରି, ଅଡ଼େ ମିଞ୍ଜେ ଏଚେତା
ମନ ଏଚେତା ଏଞ୍ଜାରି ସାୟେମି କିହାଲି ଆଡ଼ିଦେରି; ସାମା ନାନୁ
କାଲେଏ ମୀ ତାଣା ତୟଅଁ । ୮ ଏଡି ଏହାଆଁ ଆଡ଼ିନାୟି ମାନେ ଏହାଆଁ
କିହାମାନେ; ଏଡି ନା ଆଜାତି ମୁସାଲି ତାକି ତଲିଏ ନିୟୁଁ ଝାକ୍ନା
ତିୟାରା କିହାମାନେ । ୯ ନାନୁ ମିଞ୍ଜେ ସାତା ଝେସିମାଞ୍ଜାଇଁ, ବାରେ
ଦାରତିତା ଆମ୍‌ୟା ଜିକେଏ ନେହଁ କାରୁ ଝେକ୍‌ନେରି, ଏ ଚାୟୁତା

ଇ ଇୟାନି ଅଶ୍ୱପାଲିତାକି ଏଦାନି ଇ କାମାତି କାତା ଜିକେଏ ଖେସ୍‌ପି ଆନ୍ନେ ।”

ଜୀହୁଦା ଜୀସୁ ଆସ୍‌ପି କିହାଲି ରାଜି ଆନାୟି

(ମାତି ୨୭:୧୪-୧୭; ଲୁକ ୨୨:୩-୭)

୧୦ ଏମ୍ବାଟିଏ ବାରଜାଣା ବିତ୍ରାଟି ଇସ୍ପାରିୟତ ଜୀହୁଦା ଦରୁଗାଟାସି ରଅସି ଜୀସୁଇଁ କାଜା ପୂଜେରାଜା କେୟୁତା ହେରପାଲି ଏଝାରିତାଣା ହାରେସି । ୧୧ ଏଝାରି ଏଦାଆଁ ଖେଞ୍ଜାନା ରାହାଁ ଆଡେରି, ଇଞ୍ଜା ଏଝାଣାକି ଟାକାୟାଁ ହାହାଲି ଆଞ୍ଜିତେରି, ଏମ୍ବାଟିଏ ଏଝାସି ଏଝାଣାଇଁ ଆସ୍‌ପି କିହାଲି ନେହଁ ପାରୁ ପାରିତେସି ।

ତାନି ସୀସୁୟାଁ ତଲେ ପିସ୍‌ପିଆନ୍ତି ପାର୍ବୁତି ବଜି

(ମାତି ୨୭:୧୭-୨୫; ଲୁକ ୨୨:୭-୧୪, ୨୧-୨୩; ଜହ ୧୩:୨୧-୩୦)

୧୨ ତାୟୁ ପୂଲାଗୁଣ୍ଡା ଆଣ୍ଡାଆତି ରୁଟି ତିନି ପାର୍ବୁତି ମୁଲୁ ଦିନାତା ଆମିନି ନେରୁ ପିସ୍‌ପିଆନ୍ତି ପାର୍ବୁତି ମେଣ୍ଡା ତାଲୁତି ହେରପିଆନ୍ନେ, ଏ ଦିନା ତାନି ସୀସୁୟାଁ ଏଝାଣାଇଁ ଖେଚେରି, “ମାମ୍ବୁ ହାଜାନା ଆମିନି ଟାୟୁତା ନିଜେତାକି ପିସ୍‌ପିଆନ୍ତି ପାର୍ବୁତି ବଜି କିନି ଇଞ୍ଜିଁ ନୀନୁ ଅଶ୍ୱପିମାଞ୍ଜି ?”

୧୩ ଏମ୍ବାଟିଏ ଏଝାସି ତାନି ସୀସୁୟାଁ ବିତ୍ରାଟି ରିଆରାଇଁ ଏଲେଇଞ୍ଜା ପାଣ୍ଡିତେସି, “ମୀରୁ ଗାଡ଼ାତା ହାଜୁ ଇଞ୍ଜା ଏୟୁ ଡକା ଅହିମାନି ରଅସି ମିଜେ ବେଟାଆୟାନେସି; ଏଝାଣି ଜେଟ ଜେଟ ହାଜୁ; ୧୪ ଏଝାସି ଆମିନି ଇଜ ହଡ଼ନେସି, ଏ ଇଲୁ ଗାଟାଣାଇଁ ଖେଞ୍ଜୁ, ‘ଗୁରୁ ଖେଞ୍ଜିମାଞ୍ଜାନେସି, ନାନୁ ନା ସୀସୁୟାଁ ତଲେ ଆମିନି ଟାୟୁତା ପିସ୍‌ପିଆନ୍ତି ପାର୍ବୁତି ବଜି କିହାଲି ଆନ୍ନେ ଏ ବାକ୍ରା ଆମିନାୟି ?’ ୧୫ ଏରେଟିଏ ଏଝାସି ମିଜେ ନେହଁ କିଁ ତିୟାରା ଆହାମାନି ଲାକନି ପାରୁତି ର କାଜା ବାକ୍ରା ତସ୍ତାନେସି; ଏମ୍ବାଆଁ ମାଜେତାକି ରାହା ଝାଜାଦୁ ।”

୧୬ ଏମ୍ବାଟିଏ ସୀସୁୟାଁ ହାଜାନା ଗାଡ଼ାତା ହଡ଼େରି, ଇଞ୍ଜା ଏଝାସି ଏଝାଣାଇଁ ଏନିକିଁ ଖେସାମାରେସି, ଏଲେକିଁ ମେସାନା ପିସ୍‌ପିଆନ୍ତି ପାର୍ବୁତି ବଜି ଝାଜିତେରି ।

୧୭ ମିତ୍ରଅଲ୍ଲା ଆହାଲିଏ ଜୀସୁ ବାରଜାଣା ସୀସୁୟାଁ ତଲେ ୱାଡେସି । ୧୮ ଏଞ୍ଜାରି କୁଗାନା ରାନ୍ଦା ତିଞ୍ଜି ମାଚାଟି ଜୀସୁ ଏଲେଇଚେସି, “ନାନୁ ମିଙ୍ଗେ ସାତା ୱେସିମାଞ୍ଜାଇଁ, ମୀ ବିତ୍ରାଟି ରଅତେରି ନାଙ୍ଗେ ସାତୁ କେୟୁତା ହେର୍ପାଦେରି ।”

୧୯ ଏମ୍ବାଟିଏ ଏଞ୍ଜାରି ଦୁକୁ ଆହାନା ରଅ ରଅରି ଏଞ୍ଜାଣାଇଁ ୱେଞ୍ଜାଲି ମାଟ୍‌ହେରି, “ନାନୁ ଏଞ୍ଜାଡେଏଁ କି ?”

୨୦ ଜୀସୁ ଏଞ୍ଜାରାଇଁ ଏଲେଇଚେସି, “ବାରଜାଣା ବିତ୍ରାଟି ରଅସି, ଆମ୍ବାଆସି ନା ତଲେ ସାଡ଼଼଼ାତା କେୟୁ ମେଡ଼଼଼ି ମାନେସି । ୨୧ ମାଣ୍ଡସି ମୀରଏଣା କାତା ଏନିକ୍‌ ରାସ୍‌କି ଆହାମାନେ, ଏଲେକିହ୍‌ ଏ ହାନ୍‌ନେସି ସାତା, ସାମା ଆମିନି ଲକୁ ଡାଣାଟି ମାଣ୍ଡସି ମୀରଏସି ସାତୁ କେୟୁତା ହେର୍ପିଆନ୍‌ନେସି, ଆୟତା ଏଞ୍ଜାଣି ତଣ୍ଡ ! ଏ ଲକୁତି ଜାନା ଆହାହିଲ୍ଲାଆଡ଼଼଼ି ଏଞ୍ଜାଣାକି ନେହେଁ ଆଡେମା ।”

ପ୍ରବୁତି ବଢ଼ି

(ମାତି ୨୭:୨୭-୩୦; ଲୁକ ୨୨:୧୪-୨୦; ୧କର ୧୧:୨୩-୨୫)

୨୨ ଏଞ୍ଜାରି ତିଞ୍ଜି ମାଚାଟି ଜୀସୁ ରୁଟି ଅହାନା ମାହାପୁରୁଇଁ ଜହରା କିହାନା ଏଦାଆଁ ଡିକ୍‌ହା ହୀହାନା ଏଲେଇଚେସି, “ଅଦୁ ତିଞ୍ଜୁ, ଇଦି ନା ଆଙ୍ଗା ।”

୨୩ ଇଞ୍ଜା ଏଞ୍ଜାସି ଗହ୍‌ନି ସଲ୍ଲା ଆସାନା ମାହାପୁରୁଇଁ ଜହରା କିହାଁ ଏଞ୍ଜାରାକି ହୀଡେସି, ଇଞ୍ଜା ବାରେଜାଣା ଏଦାଆଁ ଗସ୍ତେରି । ୨୪ ଇଞ୍ଜା ଜୀସୁ ଏଞ୍ଜାରାଇଁ ଏଲେଇଚେସି, “ଆମିନି ରାଜିମାନା ନେତେରି ହାରେକା ଲକୁତାକି ୱାଙ୍ଗାମାନେ, ଇଦି ଏ ନା ନେତେରି । ୨୫ ନାନୁ ମିଙ୍ଗେ ସାତା ୱେସିମାଞ୍ଜାଇଁ, ଆମିନି ଦିନା ମାହାପୁରୁତି ରାଜିତା ପୁଠିନି କିହ୍‌ ଅଞ୍ଜୁରି ପାଡେୟିତି ରାସା ଗହ୍‌ଇଁ ଏ ଦିନା ପାଡେକା ଇଦାଆଁ ଅଡେ ନାନୁ ଏଚେଲା ଗହ୍‌ଅଁ ।”

୨୬ ଇଞ୍ଜା ଏଞ୍ଜାରି ଜହରା ପାରୁ ପାଟିତି ତାୟୁ ଜୀତ ହରୁତା ହଡା ହାଚେରି ।

ପିତର ଜୀସୁଇଁ ପୁଞ୍ଜାହିଲଅଁ ଇନି କାତା

(ମାତି ୨୭:୩୧-୩୫; ଲୁକ ୨୨:୩୧-୩୪; ଜହ ୧୩:୩୬-୩୮)

୨୭ ଏଚିବେଲା ଜୀସୁ ଏଞ୍ଜାରାଇଁ ଏଲେଇଚେସି, “ମୀରୁ ବାରେ ପିସା ହାଜାଦେରି, ଇଚିହଁ ରାସ୍‌କି ଆହାମାନେ, ନାନୁ ମେଣ୍ଡା ଗଡ଼ୁ ପାୟିଲ୍ ଇଞ୍ଜା ମେଣ୍ଡାୟା ଆଲାରା ଆହାହାନୁ । ୨୮ ☆ସାମା ନାନୁ ହାହାନା ଝେଣ୍ଡେ ନିଜିତି ତାୟୁ ମୀ ନକିତା ଗାଲିଲିତା ହାଇଁ ।”

୨୯ ଏମ୍ବାଟିଏ ପିତର ଏଲେଇଚେସି, “ବାରେଜାଣା ପିସା ହାଜାନେରି ନାନୁ କଡେ ନିଜେ ଏଚେଲା ପିସୁଅଁ ।”

୩୦ ଜୀସୁ ପିତରଇଁ ଏଲେଇଚେସି, “ନାନୁ ନିଜେ ସାତା ଝେସିମାଞ୍ଜାଇଁ, ନୀଞ୍ଜୁ ଇ ଲାଆଁୟା କୟୁ ରୀ ଦେବା କେଣ୍ଡା ମାନାଟିଏ, ନାନୁ ଏଞ୍ଜାଣାଇଁ ପୁଞ୍ଜାହିଲଅଁ ଇଞ୍ଜୁ ତାନିପାଲି ଏଲେଇଞ୍ଜି ।”

୩୧ ସାମା ପିତର ଆଟ୍‌ଞ୍ଜା ତଲେ ଏଲେଇଚେସି, “ନାଜେ ନୀ ତଲେ ହାହାଲି ଆଡି ଜିକେଏ ନାନୁ ନିଜେ ଏଚେଲା ପୁଞ୍ଜାହିଲଅଁ ଇଞ୍ଜୁଅଁ ।” ଇଞ୍ଜା ବାରେଜାଣା ଜିକେଏ ଏଲେଇଚେରି ।

**ଜୀସୁ ଗେଡ଼ସିମନିତା ପ୍ରାତାନା କିନାୟି
(ମାତି ୨୭:୩୭-୪୭; ଲୁକ ୨୨:୩୯-୪୭)**

୩୨ ତାୟୁ ଏଞ୍ଜାରି ଗେଡ଼ସିମନି ଇନି ର ଚାୟୁତା ଝାଡେରି, ଇଞ୍ଜା ଜୀସୁ ତାନି ସୀସୁୟାଁଇଁ ଏଲେଇଚେସି, “ନାନୁ ପ୍ରାତାନା କିହିମାନି ପାତେକା ଇମ୍ବାଆଁ କୁଗାନା ମାଞ୍ଜୁ ।” ୩୩ ଇଞ୍ଜା ଏଞ୍ଜାସି ପିତର, ଜାକୁବ ଅଡେ ଜହନଇଁ ତାନିତଲେ ଅଡେସି । ଏଞ୍ଜାସି ହାରେକା ଦୁକୁଡି କସ୍ତ ତାକି କିଲିବିଲି ଆଡେସି । ୩୪ ଏଚେଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ନା ଜୀଞ୍ଜୁ ହାନିଲେହେଁ ହାରେକା କିଲିବିଲି ହଡ଼ିମାଞ୍ଜାନେ; ମୀରୁ ଇମ୍ବାଆଁ ତେଃଏଲାନା କାଟାମାଞ୍ଜୁ ।”

୩୫ ଜୀସୁ ନକିତା ହାଜାନା ବୁମିତା ମୁନୁ କୁଡିଚେସି, ଅଡେ ଆହାଲି ଆଡିତିହଁ, ଏ ଦୁକୁ ଏଞ୍ଜାଣି ତାଣାଟି ଏନିକଁ ହେକ ଆନେ, ଏଦାଆଁତାକି ପ୍ରାତାନା କିଚେସି । ୩୬ ଇଞ୍ଜା ଜୀସୁ ଏଲେଇଚେସି, “ଆବା, ନାନୁ ବାରେଏ କିହାଲି ଆଡିଦି; ଇ କସ୍ତ ବାଦା ନା ତାଣାଟି ହେକ କିମ୍ବୁ; ଆଡିଜିକେଏ ନା କାତା ଆଏ ନୀ କାତେଏ ଆପେ ।”

୩୭ ଇଞ୍ଜା ଏଞ୍ଜାସି ଝାହାନା ସୀସୁୟାଁ ଇଦା କିତାଣି ମେସ୍ତେସି, ଇଞ୍ଜା ପିତରଇଁ ଏଲେଇଚେସି, “ସିମନ ନାନୁ ତୁରିଡିକି ? ଗାଡ଼େକା ଜିକେଏ

☆ ୧୪:୨୮ ୧୪:୨୮ ମାତି ୨୮:୧୭

କାଚାଲି ଆଡ଼ାଆଡ଼େରି ? ୩୮ ଏଦାଆଁତାକି କାଚାନା ପ୍ରାଚାନା କିଦୁ; ଏନିକି ମାରୁ ପାନ୍ଦାତା ହେଉଅଡ଼େରି, ମନ ମାନେ ସାତା, ଆଙ୍ଗାତା ବାଡ଼ୁଲୁ ହିଲେଏ ।”

୩୯ ଏଝାସି ଅଡ଼େ ଝେଣ୍ଡେ ହାଜାନା ତଲିତିଲେହେଁ ପ୍ରାଚାନା କିଡେସି । ୪୦ ଅଡ଼େ ଝେଣ୍ଡେ ଝାହାନା ଏଝାସି ଏଝାରାଇଁ ଇଦା କିହାମାନାଣି ମେସ୍ତେସି, ଇଚିହେଁ ଏଝାରି କାଣ୍ଡାକା ପଦ୍ଢି ଆହିମାରୁ, ଇଞ୍ଜା ଏଝାରି ଏଝାଣାଇଁ ଏନାଆଁ ଜଲିନେରି ପୁଞ୍ଜାଲି ଆଡ଼ାଆଡ଼େରି ।

୪୧ ଜୀସୁ ତାନି ଦେବା ଝାହାନା ସୀସୁୟାଁଇଁ ଏଲେଇଚେସି, “ମୀରୁ ଗାଡ଼େକା ତୁରାନା ଜମାଦୁ; ହାରେକା ବେଲା ଆଡ଼େୟିଏ, ଏ ବେଲା ଏଗାଝାହିମାନେ; ମେହ୍ଦୁ ମାଣସି ମୀରୁଏସି ସାତୁୟାଁ କେୟୁତା ହେଉପି ଆହିମାନେସି । ୪୨ ନିଙ୍ଗାଦୁ, ମାର ହାନ, ମେହ୍ଦୁ ଆମ୍ବାଆସି ନାଙ୍ଗେ ସାତୁୟାଁ କେୟୁତା ହେଉପାନେସି ଏଝାସି ଏଗାଝାଡ଼େସିଏ ।”

ଜୀସୁ ସାତୁ କେୟୁତା ହେଉପି ଆନାୟି

(ମାତି ୨୭:୪୭-୫୭; ଲୁକ ୨୨:୪୭-୫୩; ଜହ ୧୮:୩-୧୨)

୪୩ ଏ ଦେବୁଣିଏ ଜୀସୁ ଝେସିମାତି ବେଲାତା, ବାରଜାଣା ବିତ୍ରାତି ଜୀହୁଦା ଦରୁଗାଟାସି ରଅସି ଇଞ୍ଜା ତାନିତଲେ କାଜା ପୂଜେରାଙ୍ଗା, ମେରା ପୁନାରି ଇଞ୍ଜା ଲକ୍ଷ୍ମି କାଜାରି ତାଣାଟି କାଣ୍ଡା ଟେଙ୍ଗା ଆସାନା ଝାଡ଼େରି । ୪୪ ଜୀସୁଇଁ ସାତୁୟାଁ କେୟୁତା ହେଉପିନାସି ଏଝାରାଇଁ ଇସିନା ଝେସାମାଚେସି, “ନାନୁ ଆମ୍ବାଆରାଇଁ ନଶ୍ଟିଇଁ ଏଝାସିଏ ଏଝାସି । ଏଝାଣାଇଁ ଦସାନା ଜାଗ୍ରାତା ତଲେ ଅଦୁ ।”

୪୫ ଇଞ୍ଜା ଏଝାସି ଏ ଦେବୁଣିଏ ଏଝାଣି ତାଗେ ହାଜାନା, “ଏ ଗୁରୁ” ଇଞ୍ଜାନା ଏଝାଣାଇଁ ନଶ୍ଟିଡେସି । ୪୬ ଏମ୍ବାଟିଏ ଏଝାରି ଏଝାଣାଇଁ ଆସାନା ଦସା ଅଡ଼େରି । ୪୭ ସାମା ତାଗେ ନିଚାମାଟି ଲକ୍ଷ୍ମି ବିତ୍ରାତି ରଅସି କାଣ୍ଡା ହପ୍ତହେସି ଇଞ୍ଜା କାଜା ପୂଜେରା ହଲେଏଣା କିୟୁ ଦାଡ଼େସି । ୪୮ ଜୀସୁ ଏଝାରାଇଁ ଏଲେଇଚେସି, “ସରୁଇଁ ଆସାଲି ହାନିଲେହେଁ କାଣ୍ଡା ଅଡ଼େ ଟେଙ୍ଗା ଆସାନା ମୀରୁ ନାଙ୍ଗେ ଆସାଲି ଝାଡ଼େରି ? ୪୯ ନାନୁ ବାରେଦିନା ମୀ ତଲେ ପ୍ରାଚାନା ଇଲୁତା ମାଞ୍ଜାନା ଜାପ୍ତହି ମାଞ୍ଜାଡେସି, ସାମା ମୀରୁ ନାଙ୍ଗେ ଆସାଆଡ଼େରି; ସାମା ଦାମ୍ବୁ

☆ ୧୪:୪୯ ୧୪:୪୯ ଲୁକ ୧୯:୪୭; ୨୧:୩୭

ପତିତି ରାସ୍ତାକୁ ଆଡ଼ି ବଲୁ ଏନିକିଁ ସାତା ଆନେ, ଏଦାଆଁତାକି ଇ ବାରେ ଆହିମାନେ ।”

୫୦ ଏଚିବେଲା ବାରେଜାଣା ସୀସୁୟାଁ ଏଞ୍ଜାଣାଇଁ ପିସାନା ହାଚେରି ।

୫୧ ର ଦାଂଗଣା କକାସି ର ହିମ୍ବୁରି ପିଡ଼ଗାହାଁ ଜୀସୁ ଦେଚ ଦେଚ ହାଜିମାଚେସି; ଏଞ୍ଜାରି ଏଞ୍ଜାଣାଇଁ ଆସାଲି ହାଜାଲିଏ, ୫୨ ଏଞ୍ଜାସି ଏ ପାଡ଼ାଡ଼ା ହିମ୍ବୁରି ପିସାନା ଖାରଇ ଆଙ୍ଗାଟି ହଟାତୁସ୍ତେସି ।

ଜୀସୁଇଁ ବେରଣିମାଣ୍ଡାତା ନୀହାଁୟି କିନାୟି

(ମାତି ୨୬:୫୭-୬୮; ଲୁକ ୨୨:୫୪-୫୫, ୬୩-୭୧; ଜହ ୧୮:୧୩-୧୪, ୧୯-୨୪)

୫୩ ତାୟୁ ଏଞ୍ଜାରି ଜୀସୁଇଁ କାଜା ପୂଜେରା ନକିତା ଅଡେରି, ଇଞ୍ଜାଁ କାଜା ପୂଜେରା, ଲକ୍ଷୁତି କାଜାରି ଅଡେ ମେରା ପୁନାରି ବାରେ ଖାହାନା ରୁଣ୍ଡା ଆଡେରି । ୫୪ ପିତର ହେକ ମାଞ୍ଜାନା ଏଞ୍ଜାଣି ଦେଚ ଦେଚ କାଜା ପୂଜେରା ଆଂଗେଣି ବିଡ଼ା ହାଚେସି ଇଞ୍ଜାଁ ଜାମାନାଙ୍ଗା ତଲେ କୁଗାନା ହିରୁ କେରଞ୍ଜି ମାଚେସି । ୫୫ ଏମ୍ବାଟିଏ କାଜା ପୂଜେରାଙ୍ଗା ଇଞ୍ଜାଁ ବେରଣି ମାଣ୍ଡାତି ବାରେଜାଣା ଜୀସୁଇଁ ପାୟାଲି ଏଞ୍ଜାଣି କପାଟି ସାକିୟାଁ ପାରିଡେରି, ସାମା ଏନି ଦହ ବେଟାଆଆଡେରି; ୫୬ ଇଚିହଁ ହାରେକା ଏଞ୍ଜାଣି କପାଟି ମିଚି ସାକିୟାଁ ହାତି ଜିକେଏ ଏଞ୍ଜାରି ହାତି ସାକି ଆଣ୍ଡାଆଡେ ।

୫୭ ତାୟୁ ଏଚରଜାଣା ହଟାନା ଏଞ୍ଜାଣି କପାଟି ମିଚି ସାକି ହୀହାନା ଏଲେଇଚେରି, ୫୮ “ମାୟୁ ଛୁଞ୍ଜାଣାଇଁ ଇ କାତା ଖେସିମାଚାଣି ଖେଞ୍ଜାମାନମି, ନାନୁ ଇ କେୟୁଟି କେପିତି ପ୍ରାଡାନା ଇଲୁତି ଡିକହାନା ତାନିଦିନା ବିଡ଼ା ଅଡେ ମାଣ୍ଡସି କେପାଆତି ପ୍ରାଡାନା ଇଲୁ କେପିଇଁ । ୫୯ ସାମା ଏମ୍ବାଆଁ ଜିକେଏ ସାକି ଆଣ୍ଡାଆଡେ ।”

୬୦ ଏଚେଟିଏ କାଜା ପୂଜେରା ମାଦିଏ ନିଚାନା ଜୀସୁଇଁ ଖେଚେସି, “ନୀ କପାଟି ଇଞ୍ଜାରି ଆମିନି ସାକି ହାହିମାନେରି, ଖେଣ୍ଡେ ଜଲାଇଁ ଏନି କାତା ହିଲେଏ କି ?”

୬୧ ସାମା ଏଞ୍ଜାସି ପାଲେଏ ଆହାନା ଏନି କାତା ଜଲ୍ଲାଆଡେସି, କାଜା ପୂଜେରା ଅଡେ ଖେଣ୍ଡେ ଏଞ୍ଜାଣାଇଁ ଖେଚେସି, “ନୀନୁ କି ମାନିଗାଟି ମାହାପୁରୁ ମୀରଏଣାତି କ୍ରୀସୁ ?”

୨୭ ଜୀସୁ ଏଲେଇରେସି, “ନାନୁ ଏଞ୍ଜାଡେସ୍, ମୀରୁ ମାଣ୍ଡସି ମୀରଏଣାଲ୍ ବାଡ଼ୁୟୁଗାଟି ଚିଃନିଝାକି କୁଗାମାନାଣି ମେହ୍‌ଦେରି ଇଞ୍ଜା ହାଗୁ ଦୁହାଟି ଖେଣ୍ଡେ ଖାନାଣି ମେହ୍‌ଦେରି ।”

୨୮ ଏରେଟିଏ କାଜା ପୁଜେରା ତାନି ହିମ୍ବୁରି ଗେସାନା ଏଲେଇରେସି, “ମାଙ୍ଗେ ଅଡ଼େ ଏନି ସାକିୟା ଲଡ଼ା ହିଲେଏ ।” ୨୯ ମୀରୁ ମାହାପୁରୁ ନିନ୍ଦା ଖେରେରି; ମୀ ଅଣ୍‌ପୁ ଏନାୟି ?”

ଏମ୍ବାଟିଏ ବାରେଜାଣା ଏଞ୍ଜାସି ହାନି ତଣ୍ଡ ବେଟାଆଡ଼ପସି ଇଞ୍ଜା ଏଲେଇରେରି ।

୩୦ ଇଞ୍ଜା ଆମ୍ବା ଆମ୍ବାଆରି ଏଞ୍ଜାଣିଲାକ ହୁପିତେରି ଇଞ୍ଜା ଏଞ୍ଜାଣି କାଣ୍‌କା ପଜାନା ଏଞ୍ଜାଣାଲ୍ ଖେଟାନା ଖେରେରି, “ମାହାପୁରୁ ଅଣ୍‌ପୁଟି ବଲୁ ଖେହ୍‌ନାତି ଆମ୍ବାଆସି ନିଙ୍ଗେ ଖେଟାଡେସି, ଖେସ୍ତାମୁ !” ଜାମାନାଙ୍ଗା ଜିକେଏ ଆସାନା ସାପ୍‌ଡ଼ା ଖେଟିହ୍ ଅଡ଼େରି ।

ପିତର ଜୀସୁଲ୍ ପୁଞ୍ଜାହିଲଅଁ ଇନାୟି

(ମାଟି ୨୨:୨୯-୩୫; ଲୁକ ୨୨:୫୭-୬୨; ଜହ ୧୮:୧୫-୧୮, ୨୫-୨୭)

୩୧ ଏମ୍ବାଟିଏ ପିତର ଆଂଗେଣିତା ମାଟିବେଲାତା କାଜା ପୁଜେରା ହୁଲେଣି ଖାହାନା ପିତର ହିରୁ କେର୍‌ଞ୍ଜି ମାଟାଣି ମେସ୍ତେ, ୩୨ ଇଞ୍ଜା ପିତରଲ୍ ସିନିକିହାନା ଏଲେଇରେ, “ନୀନୁ ଜିକେଏ ନାଜ୍‌ରିତ ଜୀସୁତଲେ ମାଟି ।”

୩୮ ସାମା ଏଞ୍ଜାସି, ନାନୁ ଏଞ୍ଜାଣାଲ୍ ପୁଞ୍ଜାହିଲଅଁ, ନୀନୁ ଏନାଆଁ ଖେସିମାଞ୍ଜି ନାନୁ ପୁଞ୍ଜିହିଲଅଁ, ତାୟୁ ଏଞ୍ଜାସି ଆଂଗେଣି ଦୁଖେରିତା ହାରେସି, ରେରୁଏ କୟୁ କେଣ୍‌ଡେ ।

୩୯ ଇଞ୍ଜା ଏ ହୁଲେଣି ଏଞ୍ଜାଣାଲ୍ ମେସାନା ଦାରିତା ନିଟାମାନି ଲକୁଣି ଅଡ଼େ ଖେଣ୍ଡେ ଖେସାଲି ମାଟ୍‌ହେ, “ଇଞ୍ଜାସି ଏଞ୍ଜାରି ବିତ୍ରାଟି ରଅସି ।”

୪୦ ସାମା ଏଞ୍ଜାସି ଅଡ଼େ ଖେଣ୍ଡେ ପୁଞ୍ଜାହିଲଅଁ ଇରେସି, ଅଡ଼େ ଗାଡ଼େକା ଆହାଲିଏ ଦାରିତା ମାଟି ଲକୁ ପିତରଲ୍ ଏଲେଇରେରି, “ନୀନୁ ସାଡେଏ ଏଞ୍ଜାରି ବିତ୍ରାଟି ରଅତି, ଇରିହ୍ ନୀନୁ ର ଗାଲିଲି ଲକୁଟି ।”

୭୧ ସାମା ଏଝାସି ପାର୍ମାଣା ଇଞ୍ଜା ବାକା ଇଚାନା ଏଲେଇଚେସି, ମୀରୁ ଆମିନି ଲକୁତି କାତା ଝେସିମାଞ୍ଜେରି, ନାନୁ ଏଝାଣାଇଁ ପୁଞ୍ଜାହିଲଅଁ ।

୭୨ ଏ ଦେବୁଣିଏ କୟୁ ରୀ ଦେବା କେଣ୍ଡେ । ଏମ୍ବାଟିଏ କୟୁ ରୀ ଦେବା କେଣ୍ଡା ନକେଏ ନୀନୁ ନାଞ୍ଜେ ତୀନି ଦେବା ନାନୁ ପୁଞ୍ଜାହିଲଅଁ ଇଞ୍ଜାଦି, ଆମିନି କାତା ଜୀସୁ ପିତରଇଁ ଏଲେଇଞ୍ଜାମାଚେସି, ଏଦି ଏଝାଣି ମନତା ଝାଚେ, ଇଞ୍ଜା ଏଝାସି ଏ କାତା ଅଣ୍ଡିହିଁ ହାରେକା ତୀହାଲି ମାଚ୍‌ହେସି ।

୧୫

ପିଲାତ ନକିତା ଜୀସୁ

(ମାତି ୨୭:୧-୨, ୧୧-୧୪; ଲୁକ ୨୩:୧-୫; ଜହ ୧୮:୨୮-୩୮)

୧ ଲାଇଁ ଝେୟାଲିଏ ବେରଣି ମାଣ୍ଡାତାରି, ଇଚିହିଁ ଲକୁତି କାଜାରି ଇଞ୍ଜା ମେରା ପୁନାରି ତଲେ କାଜା ପୂଜେରାଞ୍ଜା ବେରଣି କିହାନା କାତା ଆଚେରି । ଜୀସୁଇଁ ଦସପା ଅହାନା ପିଲାତ କେୟୁତା ହେରପିତେରି । ୨ ପିଲାତ ଏଝାଣାଇଁ ଝେଚେସି, “ନୀନୁ କି ଜୀହୁଦି ଲକୁତି ରାଜା ?”

ଜୀସୁ ଏଝାଣାଇଁ ଏଲେଇଚେସି, “ନୀନୁଏ ଏଲେ ଇଞ୍ଜିମାଞ୍ଜି ।”

୩ ଇଞ୍ଜା କାଜା ପୂଜେରାଞ୍ଜା ଜୀସୁ କପାଟି ହାରେକା କାତାୟାଁ ଝେସ୍ତେରି । ୪ ଏମ୍ବାଟିଏ ପିଲାତ ଅଡେ ଝେଣ୍ଡେ ଏଝାଣାଇଁ ଝେଚେସି, “ନୀନୁ ଏନାଆଁତାକି ଝେସିମାଞ୍ଜଅତି ? ମେହ୍‌ମୁ ଇଝାରି ନୀ କପାଟି ହାରେକା କାତା ଜଲିମାନେରି ।”

୫ ସାମା ଜୀସୁ ଏଦି ହାଡା ଜଳାଆଚେସି, ଏଚେଟିଏ ପିଲାତ କାବା ଆଚେସି ।

ଜୀସୁ ହାନ୍ଦି ତଣ୍ଡ

(ମାତି ୨୭:୧୫-୨୭; ଲୁକ ୨୩:୧୩-୧୫; ଜହ ୧୮:୩୯; ୧୯:୧୭)

୬ ସାମା ପାର୍ବୁ ବେଲାତା ଲକୁ ଆମିନି କାୟିଦିତା ମାଚାଣାଇଁ ରାସିମାଚେରି, ଏଝାଣାଇଁ ପିଲାତ ଏଝାରି ତାକି ପିସିମାଚେସି । ୭ ଆମିନି ଗଡ୍‌ହା ଗାଚାରି ଗଡ୍‌ହା ବେଲାତା ଲକୁଣି ପାୟାମାଚେରି, ଏଝାରିତଲେ ବାରବା ଦରୁଗାଟାସି କାୟିଦିତା ମାଚେସି ।

୮ ଏଦାଆଁତାକି ତାନି ମେରା ଲେହେଁ କିହାଲି ପିଲାତଇଁ ବାତିମାଲିତେରି । ୯ ଏମ୍ବାଟିଏ ପିଲାତ ଏଞ୍ଜରାଇଁ ଏଲେଇଚେସି, “ମୀରୁ ଏଦାଆଁ ଅଣ୍ଡପିମାଞ୍ଜେରି ? ନାନୁ ମିଙ୍ଗେତାକି ଜୀହୁଦି ଲକ୍ଷୁତି ରାଜାଇଁ ପିସାହିୟାଇଁ ?” ୧୦ ଇଚିହିଁ କାଜା ପୂଜେରାଞ୍ଜା ଏଞ୍ଜାଣାଇଁ ତାହାରା ତଲେ ହେର୍ପାମାଚେରି, ଏଦାଆଁ ଏଞ୍ଜାସି ପୁଚେସି ।

୧୧ ସାମା ଏଞ୍ଜାସି ଏନିକିଁ ଏଞ୍ଜାରି ତାକି ବାରବାଇଁ ପିହ୍ନେସି, ଏଦାଆଁତାକି କାଜା ପୂଜେରାଞ୍ଜା ଲକ୍ଷୁଣି ଝେସ୍ତେରି । ୧୨ ସାମା ପିଲାତ ଝେଣ୍ଡେ ଏଞ୍ଜରାଇଁ ଏଲେଇଚେସି, “ଆତିହିଁ ଆମ୍ବାଆରାଇଁ ଜୀହୁଦି ଲକ୍ଷୁତି ରାଜା ଇଞ୍ଜିଁ ମାଞ୍ଜେରି, ଜୀସୁଇଁ ନାନୁ ଏଦାଆଁ କିଇଁ ?”

୧୩ ଲକ୍ଷୁ ବାରେ କାଲ୍‌ଝି ଆହାନା ଏଲେଇଚେରି, “ଏଞ୍ଜାଣାଇଁ ପାସି ଏକଦୁ ।”

୧୪ ଏମ୍ବାଟିଏ ପିଲାତ ଏଞ୍ଜରାଇଁ ଝେଚେସି, “ଏଦାଆଁତାକି ଏଞ୍ଜାସି ଏନି ଦହ କିହାମାନେସି ?”

ସାମା ଏଞ୍ଜାରି ଗାତି କାଲ୍‌ଝି ଆହାନା ଏଲେଇଚେରି, “ଏଞ୍ଜାଣାଇଁ ପାସି ଏକଦୁ ।”

୧୫ ଏଚେଟିଏ ପିଲାତ ଲକ୍ଷୁଣି ରାହାଁ କିହାଲି ମନ କିହାନା ଏଞ୍ଜାରି ତାକି ବାରବାଇଁ ପିସ୍ତେସି, ଇଞ୍ଜାଁ ଜୀସୁଇଁ ସାଟ୍‌ଣି ତଲେ ଝେପି କିହାନା ପାସି ମୁଣ୍ଡାତା ଏକହାଲି ହେର୍ପିତେସି ।

**କସ୍କା ଜୀସୁଇଁ ନିନ୍ଦାକିହିଁ କାକ୍‌ନାୟି
(ମାତି ୨୭:୨୭-୩୧; ଜହ ୧୯:୨-୩)**

୧୬ ଏମ୍ବାଟିଏ କସ୍କା ଜୀସୁଇଁ ଆଂଗେଣିଟି ମେଡ଼ା ଇଲୁ ବିତ୍ତା ଅହାନା ବାରେ କସ୍କାଣି ହାଟ୍‌ନା ରୁଣ୍ଡା କିତେରି । ୧୭ ଏଞ୍ଜାରି ଏଞ୍ଜାଣାଇଁ ହେୟାଁ ଖାଣା ହିମ୍ବରି ହୁଚିକିତେରି ଇଞ୍ଜାଁ ହାପ୍‌କା ଚପେରି ଆଲାନା ଏଞ୍ଜାଣି ତାୟଁ ତୁା ତୁରୁଝି କିତେରି; ୧୮ ଅଡ଼େ “ଏ ଜୀହୁଦି ଲକ୍ଷୁତି ରାଜା ଜହରା” ଇଞ୍ଜିଁ ଏଞ୍ଜାଣାଇଁ ନିନ୍ଦାକିତେରି । ୧୯ ଇଞ୍ଜାଁ ଏଞ୍ଜାରି ରିବାଡ଼ଗା ଆସାନା ଏଞ୍ଜାଣି ତାୟଁ ତୁା ଝେତେରି ଇଞ୍ଜାଁ ମେଣ୍ଡାକୁତାନା ଜହରା କିତେରି । ୨୦ ଏଞ୍ଜାରି ଏଞ୍ଜାଣାଇଁ ଲାଜାକିହିଁ କାକ୍‌ହି ତାୟଁ, ଏ ହେୟାଁ ଖାଣାଗାଟି ହିମ୍ବରି ହୁକହା ଅହାନା ତାନି ହିମ୍ବରି ହୁଚିକିତେରି । ଇଞ୍ଜାଁ ଏଞ୍ଜାରି ଏଞ୍ଜାଣାଇଁ ପାସି ମୁଣ୍ଡାତା ଏକହାଲି ପାଞ୍ଜାତା ଅଡ଼େରି ।

ଜୀସୁଙ୍କ ପାସି ଏକନାୟି

(ମାତି ୨୭:୩୨-୪୪; ଲୁକ ୨୩:୨୭-୪୩; ଜହ ୧୯:୧୭-୨୭)

୨୧ ☆ଏତିବେଳା ଆଲେକଜାଣ୍ଡାର ଇଞ୍ଜା ରୁପତାମି ଆବା ସିମନ ଦରୁଗାଟି ର କୁରିଣିୟ ଲକୁ ନାୟୁଟି ଖାହାନା ଏ ଜିରୁଟି ହାଜିମାତେସି; ଏଝାରି ଏଝାଣାଙ୍କ ଜୀସୁତି ପାସିମୁଣ୍ଡା ଡେକାଲି ବାଲ୍ୟାମାତମି କିତେରି । ୨୨ ଇଞ୍ଜା ଏଝାରି ଏଝାଣାଙ୍କ ଗଲ୍‌ଗତା ଇଚିହିଁ “ତାୟୁଁ ରୁପା” ଇନି ଗାୟୁତା ତାତେରି । ୨୩ ଇଞ୍ଜା ଏଝାରି ଏଝାଣାକି ପୁଲା ଆଣ୍ଡିତି ଅଞ୍ଜୁରି ରାସା ଗସାଲି ହାତେରି, ସାମା ଏଝାସି ଏଝାଆଁ ଗହୁଆତେସି । ୨୪ ଏଚେଟିଏ ଏଝାରି ଏଝାଣାଙ୍କ ପାସି ମୁଣ୍ଡାତା ଏକହେରି, ଇଞ୍ଜା ଆମ୍ବାଆସି ଏନାଆଁ ବେଟା ଆନେସି, ଏଦାଆଁ ପାଦି କିହାନା ତାନି ହିମ୍ବୁରିକା ତାମ୍ବୁ ତାମ୍ବୁ ବାଟି କିହାନା ଅଡେରି । ୨୫ ଦିନା ନ ଗଂଟା ବେଲାତା ଏଝାରି ଏଝାଣାଙ୍କ ପାସି ମୁଣ୍ଡାତା ଏକହେରି । ୨୬ ଇଞ୍ଜା ଏଝାଣିଲାକ ଇଲେଇଞ୍ଜିଁ ରାସ୍‌କି ଆହାମାତେ, “ଇଝାସି ଜୀହୁଦି ଲକୁତି ରାଜା ।” ୨୭ ଇଞ୍ଜା ଏଝାଣି ଚିଃନିଝାକି ରଅଣାଙ୍କ ଅଡେ ଚେଟ୍ଟିଝାକି ରଅଣାଙ୍କ, ଇଲେକିହିଁ ରା ସରକାଣି ଏଝାରି ଏଝାଣିତଲେ ପାସି ମୁଣ୍ଡାତା ଏକହେରି । ୨୮ ଏଚେଟିଏ ଦାମ୍ବୁ ପତିତି କାତା ସାତା ଆଡେ, ଏଝାସି ପାପୁ ଗାଟାରି ତଲେ ଲେକା କିଝିଆଡେସି ।*

୨୯ ☆ଏ ଜିରୁଟି ହାଜିମାନି ଲକୁ ତାମି ତାର୍‌କା ଗୁଟ୍‌କିକିହିଁ ଏଝାଣାଙ୍କ ନିନ୍ଦାକିହିଁ ଏଲେଇଚେରି, “ଆବା, ମାହାପୁରୁ ଇଲୁତି ଡିକ୍‌ନାତି ଇଞ୍ଜା ତାନି ଦିନାଟିଏ ଏଦାଆଁ କେପିନାତି, ୩୦ ପାସି ମୁଣ୍ଡାଟି ରେଟାଝାହାନା ନିଙ୍ଗେ ଗେଲ୍‌ପା କତାମୁ ।”

୩୧ କାଜା ପୂଜେରାଙ୍ଗା ଜିକେଏ ଏଲେକଁ ମେରାପୁନାରି ତଲେ ତାମ୍ବୁ ତାମ୍ବୁ ଏଝାଣାଙ୍କ ନିନ୍ଦାକିହିଁ ଏଲେଇଚେରି, “ଏଝାସି ଅର ଲକୁଇଁ ଗେଲ୍‌ପିତେସି, ସାମା ତାଙ୍ଗେ ଗେଲ୍‌ପାଲି ଆଡ଼ିହଲଅସି । ୩୨ ଇସ୍ରାୟେଲତି ରାଜା କ୍ରୀସୁତି ଇଚିହିଁ ଦେବୁଣିଏ ପାସି ମୁଣ୍ଡାଟି ରେଟା ଝାମ୍ବୁ, ଏନିକଁ ମାମ୍ବୁ ଏଦାଆଁ ମେସାନା ନାମାନମି ।”

☆ ୧୫:୨୧ ୧୫:୨୧ ରମି ୧୭:୧୩ * ୧୫:୨୮ ୧୫:୨୮ ଜିସାୟ ୫୩:୧୨ କଚେକା ସାସ୍ତେରିତା ଇ କାତା ରାସ୍‌କି ଆହାହିଲେଏ । ☆ ୧୫:୨୯ ୧୫:୨୯ ମାର୍କ ୧୪:୫୮; ଜହ ୨:୧୯

ଇଞ୍ଜା ଆମିନି ଗାଗରାଇଁ ଜୀସୁତଲେ ପାସି ମୁଣ୍ଡାତା ଏକହା ମାଚେରି, ଏଞ୍ଜାରି ଜିକେଏ ଏଞ୍ଜାଣାଇ ନିନ୍ଦାକିତେରି ।

ଜୀସୁ ହାନାୟି

(ମାତି ୨୭:୪୫-୫୬; ଲୁକ ୨୩:୪୪-୪୯; ଜହ ୧୯:୨୮-୩୦)

୩୩ ବାର ଗଂଟା ବେଲା ଏ ଦେସା ଆନ୍ଦେରି ଆହାନା ତାନି ଗଂଟା ପାତେକା ଡୟିତେ । ୩୪ ତାନି ଗଂଟା ବେଲାତା ଜୀସୁ କାଜା ହାଡାତଲେ ହାଟାନା ଏଲେଇଚେସି, “ଏଲହି ଏଲହି ଲାମା ସାବକ୍ତାନି ?” ଇଚିହିଁ “ଏ ନା ମାହାପୁରୁ ଏ ନା ମାହାପୁରୁ ନୀନୁ ନାକ୍ଷେ ଏନାଆଁତାକି ପିସ୍ତାତି ?”

୩୫ ଈ ହାଡା ଖେଞ୍ଜାନା ଦାରିତା ନିଚାମାନି ଲକୁ ଆମ୍ବା ଆମ୍ବାଆରି ଏଲେଇଚେରି, “ମେହୁଦୁ ଏଞ୍ଜାସି ଏଲିୟଇଁ ହାଟି ମାନେସି ।” ୩୬ ଈଞ୍ଜା ରଅସି ହଚିହିଁ ହାଜାନା ର ଡ୍ରାଃଆଲି ପୁଲା ଅକ୍ସୁରି ରାସାତା ମେଡ଼ହାନା ଏଦାଆଁ ର ବାଡ଼ଗାତା ରୁପାନା ଏଞ୍ଜାଣାକି ଗସାଲି ହାହାନା ଏଲେଇଚେସି, “ହେଶୁ ଏଲିୟ ଈଞ୍ଜାଣାଇଁ ଗେଲପାଲି ଖାହିମାନେସି କି ଆଏ ସିନିକିନି ।”

୩୭ ସାମା ଜୀସୁ କାଜା ଗିୟାତଲେ ଜଲାନା ହାଡେସି ।

୩୮ ଈଞ୍ଜା ମାହାପୁରୁ ଇଲୁତା ଲେଚାମାନି ହିମ୍ବୁରି ଲାକଟିଏ ଡ଼ଇ ପାତେକା ଗେଞ୍ଜାନା ରୀ ବାଗା ଆଡେ । ୩୯ ଏଞ୍ଜାଣି ନକିତା ନିଚାମାନି ପାସାକଡ଼ି କସ୍କା ମୁହେଁ କାଜାସି ଏଞ୍ଜାଣି ଇଲେତି ହାଡାଣି ମେସାନା ଏଲେଇଚେସି, “ସାଡେଏ, ଈଞ୍ଜାସି ମାହାପୁରୁତି ମୀରୁଏସି ମାଚେସି ।”

୪୦ ☆ଏଚେକା ଇୟାସିକା ଜିକେଏ ହେକଟି ସିନିକିହିମାତୁ; ଏଞ୍ଜାସିକା ବିତ୍ରାତି ମଗ୍ଦଲିନି ମରିୟମ, ଡ଼ଣା ଜାକୁବ ଈଞ୍ଜା ଜସିତି ଇୟା ମରିୟମ, ଅଡେ ସାଲମି ମାତୁ; ୪୧ ଏଞ୍ଜାସି ଗାଲିଲିତା ମାଚାଟି ଏଞ୍ଜି ଏଞ୍ଜାଣି କେଚ ହାଜାନା ଏଞ୍ଜାଣି ସେବା କିହିମାତୁ; ଏଞ୍ଜାସିକା ତଲେ ଜିରୁସାଲମତା ଖାହାମାନି ହାରେକା ଇୟାସିକା ସିନିକିହିମାତୁ ।

ଜୀସୁଇଁ ମାହଣି ମାଣ୍ଡାତା ମୁହନାୟି

(ମାତି ୨୭:୫୭-୬୧; ଲୁକ ୨୩:୫୦-୫୬; ଜହ ୧୯:୩୮-୪୨)

☆ ୧୫:୪୦ ୧୫:୪୦ ଲୁକ ୮:୨,୩

୪୨ ଖେଡ଼ା ହାଜିମାଗାଟି, ଏ ଦିନା ତିୟାରା ଆନି ଦିନା ଇଚିହିଁ ଜମିନି ଦିନାତି ନକିତି ଦିନା ମାଚାକି, ୪୩ ହାରାମାତିୟାତି ଜସେପ ଦରୁଗାଟି କାଜା ବେରଣିମାଣ୍ଡାତି ମାନି ଗାଟାସି ମାଚେସି, ଇଞ୍ଜା ଆମିନିଗାଟାସି ତାନୁଏ ମାହାପୁରୁତି ରାଜି କାଟିମାଚେସି, ଏଝାସି ସାସାତଲେ ପିଲାତ ତାଣା ହାଜାନା ଜୀସୁତି ଆଙ୍ଗା ରାସ୍ତେସି । ୪୪ ସାମା ଏଝାସି ହାଚେସିଏ ଇ କାତା ପିଲାତ ଖେଞ୍ଜାନା କାବା ଆଚେସି, ଇଞ୍ଜା ପାସାକଡ଼ି କସ୍କା ମୁହେଁ କାଜାଣାଇଁ ତାଗେ ହାଟାନା ଖେଚେସି, “ଏଝାସି ହାହାନା ହାରେକା ବେଲା ଆଚେୟିଏ ?” ୪୫ ପାସାକଡ଼ି କସ୍କା ମୁହେଁ କାଜାଣି ତାଣାଟି ଏ କାତା ପୁଞ୍ଜାନା ଆଙ୍ଗାତି ଅହାଲି ଜସେପଇଁ ହେଲ ହାଚେସି । ୪୬ ଏଝାସି ର ପାତାତା ହିମ୍ବରି କତାନା ଏଝାଣାଇଁ ରେପହା ତାଟାନା ଏ ହିମ୍ବରି ରୁପିଚେସି ଇଞ୍ଜା ହରୁତା କାରୁହାମାନି ମାଡ଼ହା ମୁହନି ଚାୟୁତା ଏଝାଣାଇଁ ଇଟାନା ଦୁଝେରିତା ର କାଜା ଖାଲି ଉସି କିଚେରି । ୪୭ ଏଝାଣାଇଁ ଆମିନି ଚାୟୁତା ଇଚିକି ଆହାମାନେ, ଏଦାଆଁ ମଗ୍ଦଲିନି ମରିୟମ ଇଞ୍ଜା ଜସି ତାମି ଇୟା ମରିୟମ ମେସାମାଚୁ ।

୧୭

ଜୀସୁ ଖେଣ୍ଡେ ନିଜିନାୟି

(ମାତି ୨୮:୧-୮; ଲୁକ ୨୪:୧-୧୨; ଜହ ୨୦:୧-୧୦)

୧ ଜମିନି ଦିନା ରାୟାଲିଏ ମଗ୍ଦଲିନି ମରିୟମ, ଜାକୁବ ତାମି ଇୟା ମରିୟମ, ଇଞ୍ଜା ସାଲମି ଗାନ୍ଦାଗାଟି ନିୟୁଁ କଡ଼ିତୁ, ଏନିକିଁ ଏଝି ହାଜାନା ଜୀସୁ ଆଙ୍ଗାତା ରୁବାଲି ଆଡ଼ିନୁ । ୨ ଏଝି ଖାରାତି ମୁଲୁ ଦିନା ଲାଈ ଖେଡ଼ା ହନି ବେଲାତା ମାହଣି ମାଣ୍ଡାତା ହାଚୁ । ୩ ଏଝି ତାମ୍ବୁ ତୁମ୍ବୁ ରୁଝସପି ଆହିମାଚୁ, “ଆମ୍ବାଆସି ମାଙ୍ଗେତାକି ମାହଣି ମାଣ୍ଡା ଦୁଝେରିତି ଖାଲି ଉସିକିହା ହିୟାନେସି ?” ଏଦାଆଁତାକି ଇଚିହିଁ ଏ ଖାଲି ହାରେକା କାଜାୟି ମାଚେ । ୪ ସାମା ଏଝି ଏମ୍ବାଆଁ ସିନିକିନି ବେଲାତା, ଖାଲି ଉସିକିଝି ଆହାମାଚେ । ୫ ଏଝି ମାହଣି ମାଣ୍ଡାତା ହତାନା ଦବଲା ହିମ୍ବରି ହୁଟାମାନି ର ଦାଂଗ୍‌ଶେଏଣାଇଁ ଚିଠନିଝାକି କୁଗାମାନାଣି ମେସାନା ହାରେକା କାବାଆଚୁ ।

୬ ଏମ୍ବ୍ରାଟିଏ ଏଝାସି ଏଝାସିକାଣି ଏଲେଇଚେସି, “ଆଜାଆଦୁ; ମୀରୁ ପାସି ମୁଣ୍ଡାତା ହାହାମାନି ନାଜୁରିତ ଜୀସୁଇଁ ପାରିମାଞ୍ଜେରି; ଏଝାସି ନିଜାମାନେସି, ଏଝାସି ଇମ୍ବାଆଁ ହିଲଅସି, ସିନିକିଦୁ ଇମ୍ବାଆଁ ଏଝାଶାଇଁ ଇଟାମାଚେରି । ୭*ସାମା ମୀରୁ ହାଜାନା ତାମି ସୀସୁୟାଁ ଇଞ୍ଜା ପିତରଇଁ ଝେହ୍ଦୁ, ଏଝାସି ମୀ ନକି ନକିତା ଗାଲିଲିତା ହାଜିମାନେସି; ଏଝାସି ମିଙ୍ଗେ ଏନିକିଁ ଝେସାମାଞ୍ଜାତେସି, ଏଲେକିହିଁଏ ମୀରୁ ଏଝାଶାଇଁ ଏମ୍ବାଆଁ ମେହ୍ଦେରି ।”

୮ ଏମ୍ବ୍ରାଟିଏ ଏଝି ମାହୁଣି ମାଣ୍ଡାଟି ହରୁ, ଇଚିହିଁଏ ଏଝି କାବା ଆହାନା ଆଜିତାକି ତୀରଗିମାଚୁ, ଇଞ୍ଜା ଆମ୍ବାଆରାଇଁ ଏନାଆଁ ଝେହ୍ଦାତୁ* ।

ଜୀସୁ ମଗ୍ଦଲିନି ମରିୟମଇଁ ତଞ୍ଜା ଆନାୟି

(ମାତି ୨୮:୯-୧୦; ଜହ ୨୦:୧୧-୧୮)

୯ ଖାରାତି ମୁଲୁତି ଦିନା ଲାଇସିଏ ଏଝାସି ଝେଣ୍ଡେ ନିଜାମା, ଆମିନିଗାଟାଣି ସାଡାଗଟା ବୁଡୁୟାଁ ପିସ୍ପି କିହାମାଚେସି, ଏ ମଗ୍ଦଲିନି ମରିୟମି ତଲିଏ ତଞ୍ଜାଆଡେସି । ୧୦ ଏଡି ହାଜାନା ଆମିନି ଗାଟାରି ତାମିତଲେ ମାଚେରି, ଏଝାରାଇଁ ଝେସ୍ତେ; ଇଚିହିଁଏ ଏଝାରି ଦୁକୁଟି ଡାହି ମାଚେରି । ୧୧ ଜୀସୁ ନୀତାମାନେସି, ଇଞ୍ଜା ଏଦାନି ତଞ୍ଜା ଆହାମାନେସି, ଇଦାଆଁ ଝେଞ୍ଜାନା ଏଝାରି ନାମାଆଡେରି ।

ଜୀସୁ ରୀ ସୀସୁୟାଁଣି ତଞ୍ଜା ଆନାୟି

(ଲୁକ ୨୪:୧୩-୩୫)

୧୨ ଏଚେଟିଏ ଇ ବାରେ ଆଡି ତାୟୁ ଏଝାରି ବିତ୍ରାଟି ରୀ ସୀସୁୟାଁ ର ନାୟୁତା ହାଜିମାଚାଟି ଏଝାସି ଅର ଖାଣା ତଲେ ଏଝାରାଇଁ ତଞ୍ଜାଆଡେସି, ୧୩ ଇଞ୍ଜା ଏଝାରି ହାଜାନା ଏଟକା ତାରାଇଁ ଝେସ୍ତେରି; ସାମା ଏଝାରି କାତା ଜିକେଏ ଏଝାରି ନାମାଆଡେରି ।

☆ ୧୭:୭ ମାତି ୨୭:୩୨; ମାର୍କ ୧୪:୨୮ * ୧୭:୮ ୧୭:୮ ଏଝି ପିତର ତଲେ ମାତି ବାରେ ଲକୁତାଣା ଏ କାତା ଝେସ୍ତୁ ୧୭:୨୦ ଇଦାଆଁ ତାୟୁ, ଜୀସୁ ତାୟୁଏ ଜିକେଏ ଏଝାସିକା ତଲେ ସୁଦୁ ଅଡେ କାଲାକାଲାତି ଗେଲ୍ପି ଆନାଣି ଝେକ୍‌ହାଲି ତାକି ଝେଡା ହପୁ ଖାକିଟି ଝେଡା ହାନି ଖାକି ପାଣ୍ଡିତେସି ।

ଜୀସୁ ଏଗାର ଜାଣା ସୀସୁୟାଁଇଁ ତଞ୍ଜା ଆନାୟି

(ମାତି ୨୮:୧୭-୨୦; ଲୁକ ୨୪:୩୭-୪୯; ଜହ ୨୦:୧୯-୨୩; କାମା ୧:୭-୮)

୧୪ ଏମ୍ବାଟିଏ ଏଗାର ଜାଣା ସୀସୁୟାଁ ତିଞ୍ଜାଲି କୁଗାମାତାଟି ଜୀସୁ ଏଞ୍ଜାରାଇଁ ତଞ୍ଜାଆଡେସି ଇଞ୍ଜା ଏଞ୍ଜାରି ନାମିହିଲିଆତାକି ଇଞ୍ଜା ହିୟାତି ଆଟ୍ଞାତାକି ଏଞ୍ଜାରାଇଁ ଦାକା ହାଡେସି, ଇଟିହିଁ ଆମିନି ଗାଟାରି ଏଞ୍ଜାଣି ଝେଣ୍ଡେ ନିଞ୍ଜିତାଣି ମେସାମାରେରି, ଏଞ୍ଜାରି କାତା ଏଞ୍ଜାରି ନାମା ହିଲିଆତେରି । ୧୫ ଇଞ୍ଜା ଜୀସୁ ଏଞ୍ଜାରାଇଁ ଏଲେଇରେସି, “ମୀରୁ ବାରେ ଦାର୍ତତିତା ହାଜାନା ବାରେ କୃତ୍ତାତି ଲକୁତାଣା ନେହିଁ କାରୁ ଝେହ୍ଦୁ । ୧୬ ଆମ୍ବାଆସି ନାମାନା ବାପ୍ତିସ୍ମା ଅନେସି ଏଞ୍ଜାସି ଗେଲ୍ପି ଆନେସି; ସାମା ଆମ୍ବାଆସି ନାମଅସି ଏଞ୍ଜାସି ତଣ୍ଡ ବେଟାଆନେସି । ୧୭ ଇଞ୍ଜା ନାମିନାରାକି ଇ ସିନାୟା ଆନୁ, ଏଞ୍ଜାରି ନା ଦରୁତଲେ ବୁତୁୟା ପିସ୍ପି କିନେରି, ପୁଃନି ପୁଃନି ହାଡାତଲେ ଜଲିନେରି, ୧୮ କେସ୍ମାତଲେ ରାସ୍‌କା ଆହ୍‌ନେରି, ଇଞ୍ଜା ହାନ୍ତି ଅସ ଗସ୍ତିହିଁ ଜିକେଏ ଏଞ୍ଜାରି ଏନାଆଁ ଆଅରି; ଏଞ୍ଜାରି ନମେରି ଦୁକା ଗାଟାରି ଲାକ କେୟୁ ଇଟିତିହିଁ ଏଞ୍ଜାରି ନେହିଁ ଆନେରି ।”

ଜୀସୁ ଲାକପୁରୁ ଅଞ୍ଜିଆନାୟି

(ଲୁକ ୨୪:୫୦-୫୩; କାମା ୧:୯-୧୧)

୧୯ ✧ଇଲେକିହିଁ ଏଞ୍ଜାରାଇଁ ବାରେ କାତା ଝେସ୍ତି ତାୟୁ ଜୀସୁ ଲାକପୁରୁ ଅଞ୍ଜିଆହାନା ମାହାପୁରୁତି ଟିଃନିଞ୍ଜାକି କୁଗିତେସି । ୨୦ ସାମା ଏଞ୍ଜାରି ହାଜାନା ବାରେଞ୍ଜାକି କାରୁ ଝେସ୍ତେରି, ଇଞ୍ଜା ପ୍ରବୁ ଜୀସୁ ଏଞ୍ଜାରିତଲେ କାମା କିହାନା ତାନି ବାରେ ସିନାୟା ତଲେ ଏଞ୍ଜାରି ଝେକ୍‌ହାମାନାଣି ସାତା ଇଞ୍ଜା ତସ୍ତେସି ।

lxx

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33